

JONI

Jonido Vua Amure

Joni fu e be fure e tuero (12) rena Jesuna oenoekinu vua fuone fie. Fure maza boeje e tuero ijena besu oenoekinu Jesu i fu menoeno ije gakinu vua fuone fu nijasiamo ije fie. Ro suvuare ije fu e Makikiro Matiu ro Ruki ijiebe ude isoekoga Joni fu rade buki ige isoe. Ro vua ije fune Godido Kavene Akae ijare vierafejakoga fu isoe. Ro vua ije Joni fu zinuevena isoema ije fu Kuraesi fu Godire kuaga fu ruakono kuaema fu ije isoe. Areme fu kuke izege Jesu fu ire sumiki renoenoga e bu giavo buka oeseradiaema fu ijene isoe. Fu ijiege isoekina no ijia da giana vierafero Jesu fune ma Godido Fariro no ijiege vierafero fu ije isoe. Ro ja Jonido buki fu isoema ije dakuva ja gaga Jesu fu ma karivako ijadufuo zinu maeje ja ije gake. Ro kuke fuje fuka e mave-sifi mukoe samuagiamo ijieki ijadufuo fure no mukoreigia samuaguoke. Ro fuje fu vame ije no Godi Asoe ije fino ijia vadufuo ijene. Ro e Jesu fuje fuka kai nuvuone ro kuke fuka E Ireobo nuvuone ijene.

Jonido vua binobino fu isoema ijeja -

1:1-18 E Jesu ije era ro fu izia ruaema ijene

1:19-51 Joni e do ruoriamo ijiajirro e ije bu ude Jesudo vua fieva ijene

2:1-12:50 Jesu fu samadukua kekena e boeje ijiebuo nidua ijia imenoema ijene.

13:1-19:42 Jesu fu izege maza radekuma ijia Jerusareme guove ro are irifo ivuake ijia oenoema ijene.

20:1-21:25 Jesu fu baronena una uri e vua fuone fievo ije bediaema ijene.

Jesu fu ruaema ijene

1 ¹Iko zinume Godi fu aesakae ige naebe amaerima ijia Vua Ije fune ijia fuosiki fina ruae. Ro Vua Ije fu Jesure Godiki fi ro kuke Jesu fudua fu Godi. ²Iko zinume ijia Jesu fune Godiki fi. ³Ro Godi fu Jesudo ive ijia ro kuke daro fuone ijia ire boege ameriae ro ire besukua be fu arema baki. ⁴Ro Jesu fuje fu vame maeje ijia karivako ijene. Ijadufuo fure vame maeje sanaema ije abena e boege miae. ⁵Jesu fu Sanaema ije abena ume ige titutema ijia romoga e ume igia ise renoejo ije bu naebe abe udae.

⁶⁻⁷Areme Godi fu e Joni kuavo e vua fuone abe oenoeno ije kuamoga fu Sanaema ijadufuo vua ije abena ume igia ruae. Joni fu urina ume igia e boege Sanaema ijadufuo kuariaga bu vua fuone ije mukoe fiena ma vierafekiro fu ruae. ⁸Joni fuje fu Sanaema ije fu baki ro fume ude Sanaema ije ruakuvenco ijadufuo vua ije abena e ije kuarianoe. ⁹Ro Jesu fure fu ma Sanaema ije ro fure ume igia e boege sanaema fuone ije abe nijasiae.

¹⁰Iko zinume ijia Godi fu Jesudo duvado ijia aesakae igiakiro ire boege ado ijia naovo ije amaeriae. Areme Jesu fu una ema ren a ume igia ruae rove e boeje buka naebe fu mukoreigia gana vierafei. ¹¹Jesu fu ma una aesakae fuone igia ruae rove e fuone ije bu naebe fu oemarejana mesiri. ¹²Rove eranebe bu fu ma vierafe areme oemarekinu mesirivoga fu daro miambo bu una Godido anafa rei. ¹³Ro bu ema ijiege buone vierafeva ije nafeva baki. Ro fune Godire Kavene fuone ije kena uniaejiama ijadufuo bune ma Godido anafa. ¹⁴Areme Vua Ije fune una ema ren a maza aokube noena besu ume igia oeno. Jesu fu Asoe fuone kave gufe fino ijadufuo Fari besu ijene. Ro kuke fuone sanaema ije Asoefuo fu abe maema ije none gae. Jesu fuje fu vame maeje ijene ro kuke fuka e boeje ifejiakinu ka marejianoeno.

¹⁵Joni fu e ijadufuo kuaena kuae, E Ije fu rade nuvedie ruome ro fuje fuka e anuigi be ro fure na ma asidie. Ijadufuo maeje naeje bu rade bietanie ro fuje fume isuibe Godiki ijia fi ruae. ¹⁶Jesu fuka e oetuakinu ifejiana ma rejiamo. Ijadufuo fuka maza besubesu no mukoreigia oetuana ifejuokinu ma rejuomo. ¹⁷Ro Godido akae ije fu e Mosisire abena no kuarue. Rove fune Jesure korofuo arina vame maeje nijasuokinu no marejue. ¹⁸Ro Godi fu erare gaema baki. Rove fune Fari fuone ije fu maza boeje fuosiki besu oenoeno ijare Godi fu e izeki ro izege fu kenoeno ije samadukua nijasue.

Joni e ije e do ruorianoema ijene (Matiu 3:1-12, Maki 1:1-8, Ruki 3:1-8)

¹⁹Areme e Jiusibuo e mamekanu are Jerusareme kariva ije bu e Godido zinone ifaejevo ije abero e Rivaeti ije gue kiavo bu Joni kuagakuae vae. Bu va gafia usiaena kuae, Eko aeje a erano kuae? ²⁰Bu ijiege kuavoga Joni fu naebe fei ro fuka urina samadukua visuna kuariae. Fu kiae, Nana E Ije Godi fu kuaga fu ro e boege karauniadufuo ije bakino kiae. ²¹⁻²²Ro e ije bu una Joni kuae, Ro aeje a vieraferga a e Iraeja ke a erano kuae? Bu ijiege kuavoga fu una kiae, Nana e Eraeja bakino kiamoga bu una kuae, Ro a vieraferga aeje a e be Godido vua vieraferga kuaemo ijene ke a erano kuae? Bu ijiege kuavoga Joni fu una kiae, Nana e ije Godido vua vieraferga kuaevu ije bakino kiamoga bu una kuae, Ro a vieraferga aeje a era? Ni ive one ije kuaruoga no una va e gafe bu kuaruovo no ruaeva ije kuariano kuae.

²³ Bu ijiege kuaravoga Joni fu urina e be Godido vua vierafena kuaemo e Asaeado vua ijia bijana ijiege kuariae. Fu kia,

Naeje na e be fu ae sao ijie fina kume, E Ireobo ijadufuo vame ije mukoreigia urari amaeriga fu rono kumemo ijeno kiae.

²⁴⁻²⁵ Areme e ije e Feresi bu kiavo bu ruaeva ije bu una Joni kuae, A kuo nana E Ije Godi fu kuamo fu ruaema ije bakino kue. Ro kuke a e Iraeja ro e Godido vua vierafena kuaemo ije bakino kue. Ro a irerefuo a e do ruoriamono kuae? ²⁶⁻²⁷ Bu ijiege kuaravoga Joni fu una kiae, Na jaeje name kena do ijiaru ruoriave. Rove e be ja naebe vierafeva ije fu jaena ijia manine. E ije fu rade nuvedie ruome ro naeje nana naebe manido na dia suri fuone azojakono kiae. ²⁸ Ro ire boeje fu are Beteni do Joden irifo gara Joni fu e do ruoriaema ijia ijiege rei.

Godi E Ije fu abena zinone ifaejedufuo ijene

²⁹ Areme nituame Joni fu gake Jesu fu romoga fu uri e ije kiae, Ni gafia gafo! E Ije Godi fu abena zinone ifaejega fu e boeje igiebuo ise ije karauniadufuo ije fu gafi ruomo gafo. ³⁰ Na e ijadufuo kuariana kia e be fu rade nuvedie ruomo kiae. Ro fuje fuka ma e anuigi ro nana baki. Ijadufuo maeje fuje fune isuibe Godiki ijia fikoga naeje bu rade bietanie. ³¹ Ro nadua na e ije na naebe mukoe vierafei. Rove name e ije do ruoriaga e boeje are Isurero kariva ije bu fu mukoreigia gana vieraferkono na ijadufuo vieraferkono kiae.

³² Areme Joni fu izege Godido Kavene fu gaema ijene e boeje kuariae. Fu kiae, Na gake Godido Kavene fu ume tuvuaeki igege kave gufia arina Jesudo nigofo ijia kunaemo nane gae. ³³ Rove na E Ije na naebe mukoreigia gana vierafei. Ro fu Godi e ije na kiemo na e do ruoriavo ijare kie, A do ruoriakinu gaga Kavene Akae fu ume igege arina e befu nigofo ijia kunaegaro fu e ijare Kavene Akae ije kena ja uniaejiakono kie. ³⁴ Ro na E Ije nane ni none ijia gae. Ijadufuo na ma vieraferg E Ije fune ma Godido Farino kiae.

E ije bu iko zinume ijia Jesudo vua fieva ijene

³⁵⁻³⁶ Areme nituame Joni fune una Do Jodenij ijia e vua fuone fievo inokiro ijena ijia oenoeno ijia fu gake Jesu fu ni fuone ijia ruvak fu gae. Areme fu uri e inokiro ije kiae, E ije Godi fu abena nuvueluo zinone ifaejedufuo ije fu gafifurekino kiae. ³⁷ Fu ijiege kiamoga e Jonido vua fievo inokiro ije bu vua ije fiena bune uri Jesu nuvena vae. ³⁸ Bu nuve vakoga fu giana una dakudena kiae, Ja irere rerenoevono kiae. Ro bu una kuae, Rabae, a izia fino ruaemano kuae? (Ro vua Rabae ijadufuo maeje E Nijasiamo). ³⁹ Bu ijiege kuaravoga Jesu fu una kiae, Ni roga na nijasia ja gano kiae. Ro maza ije fu ve nakisirema ijia ijadufuo e inokiro ije bune Jesuna vakuma are fu fino ijia usiaena fuina ijia kari vakuma ve mui.

⁴⁰Ro e inokiro ije be ive fuone ije Eduru e Saemoni Fitado uvia.

⁴¹Ijadufuo e Eduru fune migegire una va gafia kekena Saemoni Fita kuae, Uviano no Kuraesi e ije Godi fu kuaga fu ro no karaunuodufuo ije none gaevano kuae. ⁴²Areme e Eduru fune Saemoni mesirina una Jesu fino ijia ruae. Bu ijia rovoga Jesu fu uri Saemoni verima areme kuae, E gare a Saemoni e Jonido fari. Ro aeje rade bu una Kifasi kuakono kuae. (Ro ive Kifasikiro Fita ijadufuo maeje Mune Ifiki. Ijadufuo maeje rade fuone ma vieraefemo ije fuka gikikimana rega e boeje Jesu ma vierafevo ije fure tugie igege bijuakiake).

Jesu fu Firifikiro Natanero kumeno bu fu nuveva ijene

⁴³Areme nituame Jesu fune are Gareri ijia vakiro vieraefenoeno ijia fu e Firifi bie. Fu biена kuae, Urina na nuvedieno kuae. ⁴⁴Ro e Firifi fu e are Besaeda e Saemonikiro Eduru ijiebuo are ijeko. ⁴⁵Areme e Firifi fune e Natanero rerena va biена kuae, Eko, no e ije e Mosisikiro e Godido vua vieraefena kuaevo bu isuibe buki akae ijia isoena kuae fu ruakono kuaevo ije none bie. Ro e ije ive fuone Jesu fu Josofu e are Nasaretiko ijadufuo farino kuae. ⁴⁶Fu ijiege kuaramoga Natanero fu una e Firifi kuae, Eko, are iseke Nasareti ije ire ma be fu ijia rekuma baki. E Natanero fu ijiege kuaramoga Firifi fu una kuae, A nime nosiki vaekina a koro gano kuae.

⁴⁷Areme bune vakoga Jesu fu gake Natanero fu romoga fu kuae, E gare fu ma e Isurerokobuo uifari be. Ro fuje fuka e iti kufuiki bakino kuae. ⁴⁸Jesu fu ijiege kuamoga Natanero fu una kuae, E Nijasiamo a vame izege none na kenoejo ije giena vieraefemano kuae. Ro Jesu fu una kuae, Eko Natanero Firifi aeje fu rade biedana kuamoga a fuosiki ruae. Rove naeje nane ude gafe a ine zinume ijia fima na ijia a e izeki ije nane gaevano kuae. ⁴⁹Ro Natanero fu una kuae, E Nijasiamo na vieraefega aeje a ma Godido Fari ro kuke a e Isureroko ijiebuo Kinino kuae. ⁵⁰Fu ijiege kuaramoga Jesu fu una kuae, Natanero, a na ma vieraefemano ijadufuo maeje na uria gafe ine zinume a fima ijia a e izeki ije nane gaevano kuaevo ijadufuo a ijene ma vierafe. Ro fu ire ijiaru baki ro na kuke rade ire sumiki mamekanu binodua rega a giake. ⁵¹Ro naka ma kuarave. Rade saove fu daovega anera bu ijia arina Ema ijiebuo Fari ige none ruakinu una ajiana Asoe none fino ijia vaga ja giake.

Bu are Kena ijia maninamikuae iro iva ijene

2 ¹⁻²Areme mu inokiro furinoga bu are Keina sakae Gareri guove ijia maninamikuae iro ireobo be ivoga Jesudo asie ije fu ijia vae. Ro Jesukiro e vua fuone fievo ije budua bu iro ije sarekuae kiavo bune ijia vae. ³E boeje bune iro ije ikinu do vuaeni ina vakuma vuaeni ije fune furi. Ijadufuo Jesudo asie ije fune uri Jesu kuae, E ije do vuaeni bu ivo ije fune furimano kuae. ⁴Rove Jesu fu una kuae, Asieno a irerefuo na ijiege

kuarieme? Na ire boeje nane vierafe rove na maza none na zinuevena i none medufuo ije fu naebe ruaemano kuae. ⁵Fu ijiege kuaramoga Jesudo asie ije fune una e ije bu ire karina e ije vajiaovo ije kiae, Ni irere Jesu fu kuariamo ije mukoreigia fiema reno kiae.

⁶Ro are ije bu karina ire ivo ivuake ije bu sukore mamekanu umui fague ro dikine besu ijiege ijia nae. Ijadufuo maeje e Jiusi ijiebuo akae ije bu vierafero bu do ruevo ije bune Godido nidua ijia maturaevoro bu ijiege vierafe. Ijadufuo bu sukore mamekanu ije kena do jiana ijia nae. ⁷Ijadufuo Jesu fu uri e ijia imevo ije kiae, Ni sukore ige do jiana usiano kiae. Fu ijiege kuariamoga bune do jiana usiavoga boeje buneka iritoeje. ⁸Areme fune una kiae, Nine sukore guria do ije bino jiana va e gafe iro ige samuamo ije vajano kiae. ⁹⁻¹⁰Ijadufuo e imevo bune urina do gue vesena va e iro ije samuamo ije vajae. Areme e ije fu do ije kena i fieke fuka vuaeni mukore. Ro e ije fu do ije bu izia vesena ruaeva ije fu naebe vierafei. (Ro bune e ije do vese vaeva ijiebe bu izia vesena vaeva ije bune vierafei). Ijadufuo e iro samuamo ije fune e ije bara abema ije kuae, No vame nuvuone no kevo ije fu be. No vuaeni mukore no ude ikinu e boeje vajama furiga no sone rade vuaeni sibaneke maeje ivo. Rove aeje a vuaeni maeje a abe njia fina rade abe vese vajuemano kuae.

¹¹Jesu ire sumiki ije fu zinuevena remoga e boeje bu gaeva ije fu are Keina sakae Gareri guove ijia rei. Fu are ijia vame fuone sanaema ije remoga e boeje bu gae. Ro e vua fuone fievo boeje bu ijia gana uri fu ma vierafei. ¹²Areme Jesukina asie fuone ro uvirafa fuone ijiakina e vua fuone fievo ije bune urina vakuma are Kafoniamu ijia usiaena mu sibaneke ijia kari.

Jesu fu Godido Are ijia aru vaema ijene
(Matiu 21:12-13, Maki 11:15-17, Ruki 19:45-46)

¹³Areme e Jiusi ijiebuo mazani ije bu kua Fasovano kuavo ije fune ivuare ijadufuo Jesu fune Jerusareme ijia vae. Ro iro Fasova ijadufuo maeje e Jiusi bu iro ije ikinu izege asaerafa buone bu aesakae Ijifiti ijia imekinu isejavaevoga Godi fu karauniaema ije vierafevo. ¹⁴Jesu fune va Jerusareme kekena Godido Are ijia aruna gake e boeje bu ijia aruna fanuve kaukina sifi ro ume ije kena zinonefu una e guebu fuaeveve. Ro kuke e gue bu fata ijia karina moni dana vajuemamivo fu gliae. ¹⁵Ijadufuo fu urina ine dabe ifiamo bu usiae subikoga fu e ijiebuo fata ije kame kuderiana moni buone kame didue korei. ¹⁶Areme fu una e ije karina ume fuaevejo ije kiae, E gurie ume jone kaenamiana usiae vafo. Ro Asoe none ijadufuo Are ige ja dabe makete igege amaerivo ije arenou kiae. ¹⁷Jesu fu ijiege remoga e vua fuone fievo ije bu una izege Godido vua ije bu isuibe buki akae ijia isoeva ije vierafei. Ro vua ije bu isoeva ije fu ijiege kiae,

O Godi, na Are one ije ireobo oetuavo ije oe none fuka miane igege naeno kuae.

¹⁸ Jesu fu ijiege remoga e Jiusibuo e mamekanu ije bu una kuae, Aeje a erare daro maema ijadufuo a no kuriaereme? Ni ire sumiki be rega no ijia gana vierafero a daro namo ijadufuo a ijiege renoenoro no ijiege vierafero kuae. ¹⁹ Areme Jesu fu una kiae, Ja Godido Are ireobo ige faraekuva na mu inokubeke guove ijia una sa furikono kiae. ²⁰ Fu ijiege kuariamoga bu una kuae, Are ige no juaevasia foti sigisi (46) guove ijia sae. Rove a kuae na mu inokubeke una sa furikono kuaema ije a izegre rekono kuae? ²¹ Rove Jesu vua ije fu ijiege kuaema ije fu ma Godido Are ijadufuo kuaema baki. Ro fu vajae fuone ijadufuo ijiege bijana kuaemo e Jusi ije buka naebe mukoe vierafei. ²² Ro rade Jesu fu baronena mu inokubeke furiko fu una urimoga e vua fuone fievo ije bu ijia sone una vua ije fu Godido Are ijia bija kuaema ije vierafei. Areme bu ijia una Jesudo vua fu kuaema ijiakiro Godido buki akae ije ma vierafei.

²³ Jesu fu iro Fasova bu ivo ijia fu Jerusareme ijia fikinu ire sumiki boeje renoenoga e boeje bu ijia giana fu ma vierafei. ²⁴⁻²⁵ Jesu fu e boeje ijiebuo oe ije fune giae. Ijadufuo fu erare una ema izegre bu vierafera kenoejo ijene nijaekuva baki. Ijadufuo fu vame fuone maeje fu naebe abe samadirejiamo bu gae.

Jesu fu Nikodimasi vua nijaema ijene

3 ¹⁻² Ro e Feresi be ive fuone Nikodimasi fu e Jiusi ijiebuo e ireobo be. E ije fu muge be vakuma Jesu fino ijia kekena kuae, E Nijasiamo, no vierafera aeje a Godire kuamo a e boeje no nijasuokiro ruae. Ijadufuo no vierafera fu erare ire sumiki ka daroki boeje a renoeno ijieki bino renoekuma baki. Ro fune e ije erare maza boeje Godiki oenoeno ijare ire sumiki ige a renoeno ijieki binobino rekono kuae. ³ Fu ijiege kuaramoga Jesu fu una kuae, Vua ige na ma kuarave. E ije erare fu vierafera fuka e ije Godi fu oe buone ije samuagiamo ijena maziekuma nika Godi kuaga fu Kavene Akae abe nujaejane. Areme Kavene Akae ije fu oe fuone ijia fina daro maga fu una e iviaeko reno kuae.

⁴ Jesu fu ijiege kuararamoga Nikodimasi vua ije fuka naebe mukoe fie. Ijadufuo fu una Jesu kuae, E Nijasiamo e ije bune e maki reva ije bu izegre una ame isekte igege bietenamina e iviaeko rekono kuae? ⁵ Ro Jesu fu una kuae, Vua ige naka ma kuarave. Erare vierafera fuka e ije Godi fu oe buone ije samuagiamo ijena maziekuma e ije fuka Godi kuaga fu daro fuone ijia do ijiakiro Kavene Akae ijadufuo daro ijia oe fuone ije soejaga fu una e iviaeko rene. ⁶ Ro ame iviaeko ije bu ema ijiebe nafevo ro Kavene Akae ije fu Godire korofuo abena e ije nujaejiale. ⁷ Ijadufuo ade vua ige na kua anika Kavene Akae ije abena una e iviaeko reno kuaeva ije fiela oe iseremo. ⁸ Ro ni igia fie, majaufi fu ufi ruoro fu ufi vako ije no gavo

baki ro nome vua fuone ijiaru fievo. Vame besu ijiege Godido Kavene fu e besubesu oe ijia imeno ije no izege gakuva bakino kuae. ⁹Jesu fu ijiege kuaramoga Nikodimasi vua ije fu naebe mukoe fie. Ijadufuo fu una Jesu kuae, Vua ije a kuariemo ije fu izege rekono kuae?

¹⁰Ro Jesu fu una kuae, Aeje aka e Isureroko ijiebuo e vua nijasiamo be. Rove a vua ige na kuaravo ije aka naebe mukoreigia fieme. ¹¹Vua boeje no kuaenoejo ije noka kufuimevo baki. Ro noka irere no vierafekinu ro giaeava ije kuariave. Rove vua nuvuone ije jaka mukoe fiena kenoevo baki. ¹²Ro iviamma na ume igadufuo vua ije abe kuariavo ije jaka ma vierafevo baki. Ijadufuo na una saove gufadufuo vua ije kuariakuva jaka izege ma vierafekuva baki. ¹³Ro fu erare saove gufia ajia vaema baki ro fune Ema ijiebuo Fari ije Godi fu kuamo fu ari ruaema ijare fuosukua.

¹⁴E Mosisi fu ae sao ijia ire be abe tabare amaerina kabo ijia kiramo e adagi bu ije gavone adame buone fu madiam. Vame besu ijiege ro Ema ijiebuo Fari ige nadua bu abe kurosi kaniena abe kafe nifurike. ¹⁵Ijadufuo erare fu kurosi kave ije na baronevo ije gienma vierafekuma fu vame ma karivako ije abeke. ¹⁶Ro Godi fuka e boeje ume igia oenoeko ije ireobo oetuaema ijadufuo fu Fari fuone besu ije kuamo fu ari ruae. Ijadufuo erare fu Fari fuone ije ma vierafekuma fube baroneke ro fume maza boeje Godiki ijia fivake. ¹⁷Godi fu Fari fuone ije kuamo fu e boeje ume igia ise renoejo ijiebuo ise ije kena mazie giakiro ruaema baki ro fume bu karauniakiro ruae.

¹⁸Ijadufuo erare fu Godido Fari ije ma vierafekuma Godi fube rade ise fuone fu rema ijadufuo dabe isekafake. Ro erare fu Godido Fari besu ije naebe ma vierafekuma e ije Godire rade dabe isekafake. ¹⁹Ro Godido sanaema ije fune ume igia e boeje ise renoejo ijiebuo ise ije kena mazie giakiro ruae. Rove e ije buka ire ise uruvana renoevo ijadufuo bu sanaema ije bu ijuonena una titutema ije oetuae. ²⁰Ijadufuo erare fu ise renoeno ije sanaema ije fuka ijuonemo ijadufuo fube una sanaema ijia ruake. Ijadufuo maeje fu una sanaema ijia ruakuma ise fuone bu samadirekiro fuka jumei. ²¹Ro erare fu vame ma ijiaru renoeno ije fu una sanaema ijia ruakiro fube jumeke. Ijadufuo maeje ire boeje fu renoeno ije fu Godi oemaedufuo ijiaru renoene.

Joni fu Jesudo vua abe kuarianoema ijene

²²Jesu fu ijiege kuaria areme fune e vua fuone fievo ijena e Judiakobuo are ijia vae. Fu va ijia maza sibaneke e ijena fikinu bu kaenamiana do ruoriae. ²³Ro maza besu ijia e Joni fudua fu are Aenoni are Sarime ivuake ijia fine. Ro are Aenoni ijia fuka do boeje ijadufuo e boeje bu fuone ruakoke fu kaenamiana do ruoriame. ²⁴Ro e Joni ire ije fu renoema ije bu naebe abe dibure nujaeva ijia fu ijiege renoe.

²⁵Joni fu ijiege e do ruorianoeno ijia e vua fuone fievo gue bu urina e Jiusi be ijena izege e Jiusi bu buenina e kena do ruoriavo ijadufuo

bue kuaena sagui.²⁶ Ijadufuo bu va usiaena Joni kuae, E Nijasiamo a e be fu osiki do Jodeni gara ijia oenoema ije abe vierafe? E ije a fuesina kuaruema ije fune iviama e do ruoriaga e uruvana bune una fuone vakono kuae.

²⁷Bu ijiege kuaravoga Joni fu una kiae, Fu e be erare ume igia daro fuone ijia ire ijieki gue renoekuma baki ro fune Godire kuakuma fu ire ijieki ije renoeke. ²⁸Ro jane kojo naena oenoekinu fiekgaga na kuae, nana e ije Godi fu kuaga fu ume igia ari ruakono kuaema ije bakino kuae. Ro naeje name ude vame fuone ije amaerina ruae ro fuje fu rade nuvedie ruome. ²⁹⁻³⁰Ro igia fie, e be fu kai fuone ijadufuo vame amaeriga fu bara abeke ro fu fiega kai fuone fune bara abejoga fuka ireobo oemareke. Vame besu ijiege ro naeje na E Ije fu ruakuveno ijadufuo vame ije amaeri ruae. Ro iviama na fiega E Ije fune ruae ijadufuo naka ireobo oemadieme. Ijadufuo maeje fuje rade fuka e anuigi rekiro naeje name e isekube redufuo.

E ije fu kave gufia ari ruaema ijene

³¹Ro E Ije fu kave gufia ari ruomo ije fuka e anuigi be fu ire boeje asidia ro kuke ire boeje fure samuagiamo. Ro e ije bu ume igia bieteva ije fu e ume igeko ijadufuo vua fuone boeje fu kuaenoeno ije fu ume igadufuo ije kuaenoeno. ³²Ro E Ije fu kave gufia ari ruomo ije fu vua irere boeje fu saove gufia fiekinu glaema fu ijene abena e ume igia kariva ije kuariamo. Rove fu erare vua fuone mukoe oemarekinu fiemo baki. ³³Ro erare fu vua fuone ije mukoe fiema ije fu vierafero Godi fuka maro fu ijiege vierafermo. ³⁴Ro E Ije Godi fu kuaga fu ari ruaema ije fu vua irere Godi fu kuaraema fu ijiaru abe e boege kuariamo. Ijadufuo maeje fune Godido Kavene daroki ijare oe fuone ijia fino. ³⁵Ro Godi Asoe ije fuka Fari fuone mukoe oetuamo ijadufuo ire boeje fu Fari fuone ije kuaga fure samuagiamo. ³⁶Ro igia fie, erare fu Fari fuone ije ma vieraferkuma e ije fu vame ma karivako ije abeke. Ro erare fu fari fuone ijadufuo vua ije naebe fiena iriniakuma e ije Godido ziemo ije fuka maza boeje fuosiki navake. Ro kuke fube vame ma karivako ije abeke.

Jesu fu bara be are Sameriako ijiaki vua kuaema ijene

4 ¹Areme e Feresi ije bu fieke e uruvana buka Jesudo vua ije fiekinu una fuone vako ke kaenamiana do ruoria ro Joni bu arevo bu ije fie. ²Rove Jesu fu korufuo e ije kena do ruoriamon baki ro bu e vua fuone fievo ijiebe e ije kaenamia do ruoriave. ³Jesu fu fieke e Feresi ije bune vua ije abe kuaenojoga fune sakae Judia ije arena una Gareri ijia vae. ⁴Ro Jesu fu Gareri vakiro vierafera fune sakae Sameria ijia urana Gareri vae. ⁵Ijadufuo Jesu fune ruoma are Saeka Sameria guove ijia kekei. Ro are Saeka fu sakae aobe Jekafure abena fari fuone Josofu maema

ijadufuo ivuake ijia. ⁶Ro e Jekafudo do be fu sakae guove ijia jiamo ije fu ijia. Ijadufuo Jesu fu vame jiagado ruoma aemamoga fu maza uvuoka ijia do irifo ijia fi.

⁷Jesu fu ijia finoga bara Sameriako be fu do jiakiro rueae. Ijadufuo fu urina bara ije kuae, Do be jia mie na ino kuae. ⁸(Ro e Jesudo vua fievo boeje bune are ijia ire bu idufuo ije fuaevekuae vakoga fu fuosukua ijia fi). ⁹Jesu fu bara ije dofuo kuamoga fu una kuae, Eko aeje a e Jiusi ro naeje na bara Sameriako. Ijadufuo a irerefuo na dofuo kiemono kuae? (Bara ije fu Jesu ijiege kuaema ijadufuo maeje e Jiusi ije bu e Sameriako ijena ganamikinu ire ivajuenamivo baki). ¹⁰Ro Jesu fu una kuae, A irere Godi fu vajamo ijiajirro e ige erare igia fina a dofuo kuamo ije mukoe giana vierafemobitie a kuaga fure do maeje e bu ina ma karivako ije jiana makono kuae. ¹¹Ro bara ije fu una kuae, E Ireobo, do ige fuka mako dibuore gamia nafue rove aeje a bakete baki. Ijadufuo a irerebe abena do ije bu ina ma karivako ije jiake? ¹²Igia fie, do ige fu asae nuvuone Jekafure ruma aremo do ije fu ijia nafuemoga anafa fuone ijiajirro fanu fuone boeje bu ijia ikinu oenoe. Ro a vierafero a are e anuigi ro Jekafu fu e isekubero a ijiege vierafero kuae.

¹³Bara ije fu ijiege kuaramoga Jesu fu una kuae, E ije erare do ige nafuemra ijia jia ikuma fuka rade una do duaek. ¹⁴Ro erare fu do ige nare jiana mavo ije abe ikuma rade e ije fube una do duaek. Ijadufuo maeje do ije nare jia miavo ije fu maza boeje ifejiaga ja vame ma karivako ije abekono kuae. ¹⁵Ro bara ije fu una kuae, E Ireobo, na vierafero a nika do ije a kuaemo ije iviama jia miega na abe ine. Na maza boeje ro mako igia do jiakoke fuka isedieme. Ijadufuo ni do ije a kuaemo ije jia miega na ikina rade nabe una do duadieno kuae.

¹⁶Bara ije fu ijiege kuaramoga Jesu fu una kuae, Ni una va are gafia baru one ije mesirina una rono kuae. ¹⁷Rove bara ije fu una kuae, Nana baru bakino kuae. Fu ijiege kuaramoga Jesu fu una kuae, A kie a baru bino bakino kiema ije ane ma kuarie. ¹⁸Rove ane ude baru umui fague maniae ro iviama baru ije a fuosiki fino ije fu ma baru one baki. Na iviama kuavoga a kie na baru bakino kiema ije ane ma kuariemano kuae.

¹⁹Jesu fu ijiege kuaramoga bara ije fu una kuae, E Ireobo, na gaga aeje a e ije Godido vua vierafero kuaemo be. ²⁰Ijadufuo na vua be kuarako fiene. Isuibe asaerafa nuvuone bu uruo igia ajiana Godido baname isoekinu aroev. Ro e Jiusi jaeje ja kuae Godido are no baname isoekinu aroedufuo ije fu Jerusareme ijiano kuaev. ²¹Bara Sameriako ije fu ijiege kuaramoga Jesu fu una kuae, Vua ige naka ma kuaravone mukoreigia fiene. Maza rade nobe una uruo igia ro are Jerusareme ijia karina Godido baname isoekinu fu aroek. ²²Ro e Sameriako jaeje ja erado baname isoev ije jaka naebe mukoe vierafero. Ro no e Jiusi noeje no erado baname isoekinu aroev ije none vieraferi. Ijadufuo maeje Godi E Ije fu kuaga fu

ro e boeje karauniadufuo ije fu e Jiusi ijia kuaga fu ruake. ²³Ijadufuo maza ije e bu kavene ijia Godi Asoe ije ma vierafekinu baname isoena aroedufuo ije fu ruomo ije fune iviama igifureki. Ijadufuo Godi fuka e ije bu ijiege baname isoovo ije reriam. ²⁴Ro Godi fuje fu e Kavene ijadufuo erare fu Godido baname isoemo ije fuka kavene ijia ma vierafekinu baname isoeno kuae.

²⁵Jesu fu ijiege kuaramoga bara ije fu una kuae, Na E Ije Kuraesino kuavo ije Godi fu kuaga fu ro e boeje karauniadufuo ije nane vierafei. Ijadufuo na vierafe E Ije fu ruakuma fure ire boeje mukoreigia kuaruoga no fiekonu kuae. ²⁶Ro Jesu fu una kuae, E Ije Godi fu kuaga fu ruadufuo ije na igifureki nare osiki manina vua kuaevono kuae.

²⁷Bu ijiege kuaovo ijia e Jesudo vua fievo ije bu are ijia vaeva una ijia usiae. Bu usiaena gake Jesu fu bara ijiaki vua kuaemoga buka oeseradiae. Rove bu naebe una bara ije kua, A irere abekiro vierafe? Ro kuke bu naebe una Jesu kua, A irerefuo bara ijiaki vua kuaemono kuae? Ro buka totiamoga bume ijia irena giae. ²⁸⁻²⁹Areme bara ije fune do ije fu jiaema ije ijia arena una are ijia vae. Fune va gafia kekena uri e boeje kiae, E be fu ro gamifureki na biediena uri ire boeje na nuriete renoeva ijene samadukua furana kuariemo na fie. Ijadufuo na vierafe e ije fute Kuraesi E Ije Godi fu kuaga fu ruakono kuaema ijene ijadufuo ni ro gano kiae. ³⁰Bara ije fu ijiege kuariamoga e boeje bune are buone ije arena usiae Jesu gakuae vae.

³¹Ijiege rekoga e Jesudo vua fievo ije bu urina Jesu soesoena kuae, E Nijasiamo ire bino ino kuae. ³²Bu ijiege kuavoga fu una kiae, Na ire none na ina daro abevo ije ja naebe vierafevano kiae. ³³Ro e vua fuone fievo ije bu mauike una buoe kuae, E Ije fubite e binobe ire kena ro vajavano kuae. ³⁴Ro Jesu fu izege bu kuaovo ije fune giae. Ijadufuo fu una kiae, Na ire none na idufuo ijeja na Asoe none ije fu kiemo na ruaeva irere fu vierafema ije irinana ka re furike. ³⁵Ro na be bija kuariako ni fiego. Ja kuae no asame inokirokilo inokiro furikuva no juare masikono kuaovo. Ro ni juare garia gafo, ire boeje bune duima furi ijadufuo bune masidufuo samuae. ³⁶Ro e ije juae masina kanafui are mukore ijia naga bu maza boeje ijia naovadufuo ije fu fei fuone abemo. Ijadufuo e ije ui daejumo ijiakiro e ui kanafuimo ije bu giaga e uruvana bu una oe kuderiana vame ma karivako ije abevo buka oemarevo. ³⁷Ijadufuo vua ije bu kuaovo e be fu ui daeu ro be fu ui masimono kuaovo ije fuka ma. ³⁸Ijadufuo na kiavono ni va juare ije ja naebe meva ijia ire duiva ije masifo. Ro juare ije bu e guebe meva ja ijia ire ije duiva ijene masina karino kiae.

³⁹Areme e Sameriako gue are ijia kariva ije buka Jesu ma vierafe. Ijadufuo maeje bara ijare kia, Fu ire boeje na nuriete renoeva ije kuariemano kiaema ijadufuo bu ijiege rei. ⁴⁰Ijadufuo e Sameriako bu usiaena Jesu soesoena kuae, No vierafe aka noena igia fikono kuavoga fune mu inokiro

ijia buina fi. ⁴¹Jesu fune buina ijia fikinu vua nijasiamoga e uruvana buka ve ijia fu ma vierafei. ⁴²Areme bu una usiaena bara ije kuae, No ivia noneka konuvuo vua fuone maeje fu kuaromo no fieva ijadufuo no fu ma vierafei. Ro no are kuaruema ijadufuo no fu ma vierafevo baki. Ijadufuo iviama no vieraferga E Ije fune ma e ume igia oenoego ije karauniakiro ruaema ijene.

Jesu e ireobo be ijadufuo ame ije fu adame abema ije kenujaema ijene

⁴³Ijiege rena mu inokiro furinoga Jesu fune una urina gafia Gareri vae. ⁴⁴Ijadufuo maeje Jesu fu korufuo e vua fuone fievo kuariana kia, E Godido vua vierafena kuaemo ije e aeko fuone ije bube fu mukoreigia aguaena vua fuone irinakono kiaema ijadufuo fu ijiege rei. ⁴⁵Areme Jesu fu vakuma Gareri ijia kekemoga e ijia kariva ije buka fu oemarejana mesiri. Ijadufuo maeje bune maza ije bu Jerusareme ijia iro Fasova ije ikuae vaeva ijia bu ni buone ijia ire sumiki binobino fu remo bu gaeva ijadufuo bu ijiege rei.

⁴⁶Areme Jesu fune maza be una kuke vakuma are Keina aesakae Gareri guove ijia kekei. (Ro are ije fu ude ijia do ije abena una vuaeni amaerima ijene). Ro are Kafoniamu ijia e gamani ijiebuo imeno be ijadufuo ame ije fuka adame ireobo be abei. ⁴⁷Ijadufuo e ireobo ije fu fieke Jesu fune sakae Juda arena una Gareri ruaema fu fie. Ijadufuo e ije fu vierafe fu va Jesu kuaga fu ro fari fuone fu adame abena baronekuveno ijene ifejana kenujakiro fu vae. ⁴⁸Fu vakuma gafia kekena kuamoga Jesu fu una kuae, Ja e boeje ja vierafe naka ire sumiki bino rega ja gia areme ijare una na ma vieraferkuae ja ijiege vierafervano kuae. ⁴⁹Jesu fu ijiege kuaramoga e ireobo ije fu una kuae, E Ireobo, Aesekie anika nosiki vako rone. Ro a saroekuma na vierafe fari none ije funeka baronekono kuae. ⁵⁰Rove Jesu fu una kuae, Na vierafe fari one ije fube baronekiro fu una maekono ni una vano kuae. Ijadufuo e ireobo ije fune Jesudo vua fiena fuka ma vierafena fune una are fuone ijia vae.

⁵¹Fune una vakiro vakoga e fuone imevo gue bu rade vua abena ruoma vame ijia fu bie. Areme bu urina kuae, E ireobo ame one adame fu abeno ije fune una maemano kuae. ⁵²Areme e ireobo ije fu mazani irerebe fari fuone fu una maema ijadufuo kiae. Fu kiamoga bu una kuae, Fu isuome mazani una gura manino ijia fu una urimano kuae. ⁵³Ijadufuo e ireobo ije fu ijia sone una vierafero ame ije fune maza besu Jesu fu kuarako fu ijia una urimaro fu ijiege vierafei. Ijadufuo fu agane fuone ijena bu ve ijia una Jesu ma vierafei. ⁵⁴Jesu vame sumiki inokiro ije fu rema ije fu Judia oenoena areme una Gareri ruaema ijia fu ijiege rei.

Jesu do irifo ijia e adagi be kenujaema ijene

5 ¹Areme maza sibaneke furikoga Jesu fune una Jerusareme ijia e Jiusi bu afuina iro ijo ijia vae. ²Ro sidove Jerusareme viene ireobo be bu kua Sifi Vieneno kuavo ije ivuake ijia do be fu ijia nafue. Ro do ije e Iburukobuo isama ijia bu kua Betezatano kuavo. Ro do ije nafuema irifo ijene

bu are isesina bino e bu ijia karidufuo ije sa ufuaenoena arei. ³⁻⁵Ijadufuo e adagi ijiakiro e dia ise ro ni kuzeki ro vajae gareva uruvana bu ijia naove. Ro e be fuka juaevasia uruvana adame abema ijare ijia name. ⁶Ijadufuo Jesu fu keke e ije namo ije gana vierafero e ije fuka isuibe adame abena ijia namoro fu ijiege vierafei. Ijadufuo fu urina kuae, Eko a vierafe adame one fuka migegire madakiro a ijiege vierafermano kuae?

⁷Jesu fu ijiege kuaramoga e adagi ije fu una kuae, E Ireobo, naeje fu erare umuikiega na do gure avaemo ijia ruekuva baki. Na do gure fu iko avaega na ruekiro urivo ije bune e guebe ude asidiiena ruega naeje na ijia arevono kuae. ⁸Fu ijiege kuaramoga Jesu fu una kuae, Ni urina suve one ije ke datena vano kuae. ⁹Areme e ijadufuo adame ije funeka saroruba maemoga fu uri suve fuone ije ke datena fune una are fuone vakiro vae.

Ro Jesu e adagi ije fu kuamo fu suve kena date vaema ije fu maza ije e Jiusi bu mauike karina Godido baname isoево ijia ijiege rei. ¹⁰Areme e Jiusibuo e mamekanu gue bu usiaena e ije gana kuae, Ivia maza ige fuka akae no mauike karioj ijadufuo no maza ije nobe ire bino kena oenoake. Ijadufuo no vierafe suve guraje a ke datena ruomo ije aka akae ije dabe tuasemono kuae ¹¹Rove e adagi ije fu una kiae, Na e ije fu amaeriema ijare kie ni suve one ije ke datena vano kiema ijadufuo na ije abena ruovono kiae. ¹²Fu ijiege kuariamoga bu una kuae, Ro e ije erare kuaga a suve ije ke datena ruomono kuae? ¹³Rove e adagi ije fu e ije fu amaerima ije fuka naebe mukoe vierafe. Ijadufuo maeje buka e uruvana ijia afuiva ijadufuo Jesu fune migegire e kafare ijia vako fu naebe mukoreigia gae. ¹⁴Areme Jesu fu rade una Godido Are ireobo bu baname isoево ijia e ije fu amaerima ije bie. Fu biena kuae, Eko vajae one guraje funeka una mukoreigia maradae ijadufuo ade rade una kuke va ise bino renoeno. Ro a faememarena una ise bino renoekuma ire ka ma ise be fu una one rega a gakono kuae.

¹⁵Areme e ije fune va e Jiusibuo e mamekanu ije kuariana kiae, E ije fu Jeshire na amaeriemano kiae. ¹⁶Ijadufuo e mamekanu ije bune uri vame ije Jesu fu rema ijadufuo una vua ise bino fuesina kuae. Ijadufuo maeje Jesu fu maza akae ije e Jiusi bu mauike karina Godi baname isoево ijia e adagi ije amaerima ijadufuo bu ijiege rei. ¹⁷Bu ijiege kuaevoga Jesu fune giana una kiae, Na Asoe none ije fuka maza boeje imeno ijadufuo na vierafe nadua naka maza boeje imekono kiae. ¹⁸Jesu fu vua ijiege kuaemoga e Jiusibuo e mamekanu ije buka uruke defarudiamoga bu uri Jesu kanakuae vierafe. Ijadufuo maeje fu akae ije bu mauike karina Godi baname isoево ijiaru abe tuasema baki. Ro kuke fu kuae Godi fuka Asoe fuoneno kuae. Ijadufuo bu vieraferga fuje fuka korofuo dabe una Godiki besu remo ijadufuo bu ijiege rei.

Godи fu fari fuone Jesu daro maema ijene

¹⁹Ijadufuo Jesu fu una kiae, Vua ige naka ma kuariavo mukore fiefo. Na Godido Fari ige irere na renoejo ije name nare none vieraferva ijia

renoeko baki. Ro nane irere Asoe none fu rega na giavo na ire ijiaru renoeve.²⁰ Ijadufuo maeje Asoe none ije fu Fari fuone ige naeje fuka oetuamo. Ijadufuo ire boeje fu renoeno ije fune Fari fuone ige na kuarieko na ije renoeve. Ro fu uri ire mamekanu gue igafiki ije nijasie na rega ja giabitie jaka oeseradiadufuo.²¹ Ro Asoe none fu e oevo ije fu kiaga bu una urivo. Ijadufuo Fari fuone ige nadua na e ije erane na vierafeva ije kia bu una urike.²² Ro Asoe none ije fu e ume igia ise renoeojo ije ise buone kena mazie giamo baki. Ro ire ije fune una na kuariega nare e ume igia ise renoeojo ijiebuo ise ije fina ke mazie giake.²³ Ro na ijiege revo ijadufuo e boeje bu izege Asoe none ije bu aroevu ijiege buka una na dabe arorieke. Ijadufuo eranebe bu naebe na arorievo ije bu kuke Asoe none fu kiemo na ari raea ije aroevu baki.

²⁴ Ro vua ige naka ma kuariave, erare fu vua none fiema una e ije fu kiemo na raea ije ma vieraferkuva e ije fu vame ma karivako ije abeke. Fu ijiege rekina Godi fube rade una ise fuone ije kena mazie giana dabe isekafake. Ijadufuo maeje fune korufuo vame baronedufuo ije fune biona una vame ma karivako ijia ruae.²⁵ Ro vua ige naka ma kuariave maza ije e oeva bu Godido Fari ige itire none ije fiedufuo ije fune ivuare ro fune igifureki ruae. Ijadufuo eranebe bu itire none fiekuva bu una urike.²⁶ Asoe none ijare e ije vame ma karivako ije abe miomo. Ro vame besu ijiege fu daro miedo nadua na e ije vame ma karivako ije abe miake.²⁷ Ro kuke naeje na Ema ijiebuo Fari ijadufuo Godi fu daro miedo nare fina e ume igia ise revo ije kena mazie giake.²⁸ Ijadufuo jade uri vua ige na kuariavo ijadufuo oeserevo. Ijadufuo maeje maza ije fune ivuaredo e game mako ijia uniaeva ije bu itire none ije fiekuva bu mako ijia una usiae ruake.²⁹ Areme e ije bu ma ijiaru kenoeva ije bu una uriga Godi fu kiaga bu ijia ma karivake. Ro e ije bu ise renoeva ije bu una uriga Godi fu kame isekafiak.

E ije bu Jesudo vua abe kuaenoejo ijene

³⁰ Ro nana irere ume igia daro none ijia renoevu baki. Ro e ume igiebuo ise ije na kena mazie giavo ije naneka ma ijia renoeve. Ijadufuo maeje na none vieraferva ijia renoevu baki ro nane Asoe none fu kiemo na raea ije irere fu vieraferma na ijiaru renoeve.³¹ Ro na kono uri kiako vua none ige na kuariavo ije fuka mano kiakuva ja izege vua none ije ma vieraferkuva baki.³² Rove fu Godire noesina una e gue kuariakuma ije na vieraferva irere fu kuariamo ije fuka ma.³³ Jare e kiavo bu va e Joni noesina kuavoga fuka samadukua vua maeje kuariae.³⁴ Rove na ema ijiebe noesina kuariavo ije na naebe ireobo vierafer. Ro na vua ijiege kuariakina ja fiema ma vieraferkuva Godi fu maza rade ja karauniake.³⁵ Ro e Joni vua fu kuaenoeoma ije fu ikuosae abe sanana raea ije. Fu sanaema ije abe romoga Jame maza aokube fu oemarejae.

³⁶ Ro Joni vua ije fu noesina kuariaema ije fume sibaneke. Rove ire sumiki daroki ige na iviama revo ijare fuka ma ireobo. Ijadufuo ire mamekanu sumiki ige na rega ja giavo ije i jje Asoe none fu na miema ijene. Ijadufuo ja ire ije na revo ijia giana ma vierafero naeje na Godire kiemo na ruaevaro ja ije vieraferofuo. ³⁷⁻³⁸ Ro kuke Asoe none fu kiemo na ruaeva ije fune korofuo noesina kuariamo. Rove itire fuone ije jaka naebe fie ro kuke ni fuone ije ja naebe gae. Ijadufuo maeje ja e ije fu kiemo na ruaeva ije ja ma vierafero baki. Ro kuke vua fuone ije bu oe jone ijia naovo baki. ³⁹ Ja vierafero ja Godido vua bu isuibe isoeva ije mukoreigia danokuva ja vame ma karivako ije abekiro ja ijiege vieraferi. Rove igia fie, vua boeje bu kuaena isoeva ije bu noesina isoe rove ja giavo baki. ⁴⁰ Ro kuke ja none roga nare ifejiaga ja ma karivadufuo ije jaka ijuoneve.

⁴¹⁻⁴² Na ema jare na dabe nidosiekiro na ije vierafero baki. Ro kuke nane samadukua giaga ja izege Godi fu e oetuamo ja ijiege e oetuavo baki. ⁴³ Nana Asoe none ijadufuo daro ro ive fuone ijia ruae. Rove jaka oe jone boeje ijiakuma vua none ije mukoe fiena abevo baki. Ro ja e be fume daro ro ive fuone ijia kekena vua fuone dabe kuariabitie jaka mukoreigia fiekinu irinake. ⁴⁴ Ja vierafero jaka una joe nidoenamikuae vierafero. Rove ja Godire nidosiadufuo ije ja ireobo vierafera uri ijafunevo baki.

⁴⁵ Ro kuke jade vierafero na nare ise jone ja renoejo ijene giana una Asoe none ije kuarakiro jade ijiege vierafero. Ro fune Mosisido akae ije ja dabe ma vierafero e ijare una ise jone kena mazie giake. ⁴⁶ Ro ja akae ije Mosisi fu abe miaema ije ja ma vieraferojobitie ja kuke na ma vierafero. Ijadufuo maeje vua gue fu isoena kuaema ije fu noesina kuae. ⁴⁷ Ro ja Mosisido vua ije ja naebe ma vieraferkuva ja izege una vua none ije ma vieraferkono kiae?

Jesu e uruvana ire vajiaema ijene
(Matiu 14:13-21, Maki 6:30-44, Ruki 9:10-17)

6 ¹ Jesu fu vua ijiege kuariama areme fune vanage abena una Do Gareri ro ive be bu kua Do Taebiriasino kuavo irifo gara vae. ² Fu ijia vakoga e ka uruvana bu vame sumiki daroki ije fu rena e adagi karauniamo ije gaeva ijadufuo bu nuvena ijia vae. ³ Jesu fune e vua fuone fievo ijena uruo be ajia vakuma makave ijia usiaeina ijia kari. ⁴ Ro maza ije e Jiusi bu iro Fasova ivo ije fune ivuaremo ijia bu ijiege rei. ⁵ Areme Jesu fu gake buka e uruvana nuvevoga fu una Firifi kuae, Buka e uruvana ruoro a vieraferga no izia ire fuaevena vajiaaga bu ikono kuae? ⁶ Ro Jesu fu izege redufuo ije fune vieraferi rove fume Firifi biesirina izege fu vierafera ije gakiro fu ijiege kuarae.

⁷ Ro Firifi fu una kuae, E Ireobo e gure buka e uruvana ijadufuo aka moni ma uruvana kena burete boeje fuaevena vajiake. Rove na vierafer

moni ije fuka naebe manikono kuae. ⁸⁻⁹Fu ijiege kuaramoga Aduru e Saemoni Fitado iviene fuone ije fu uri Jesu kuae, Na ame isekube fu burete isesina umui fague ro kijume inokiro ke romo na gae. Rove ije na vierafe fu izege e boeje bu iga fu deufiakuma bakino kuae.

¹⁰Rove Jesu fu una kiae, Ni e boeje kiaga bu ari karino kiae. Ro are ije bu ireva ije fu vajoma uruvana naema bu ijia ari kari. Ro e ije ruaeva buka e uruvana faeve tauseni (5,000) ijiege. ¹¹Areme Jesu fune uri burete ame iseke ije fu kena vaema ije kena Godido baname isoena oemarei. Areme fune kena e fuone vajiamoga bu karina una e boeje ivajiae. Jesu fu ijiege re areme una kuke kijume ije kena ude fu rema ijiege kena baname isoena vajiamoga bu ivo buka deufiae. ¹²Areme Jesu fune uri e vua fuone fievo ije kiae, Ja ire nugune bino jade nisekiro nika mukoreigia kanafuino kiae. ¹³Ijadufuo bune urina burete ijiakiro kijume nugune bu areva ije karina una tere tuero ijiege utise.

¹⁴Ijiege rena Jesu fu ve ijia ire sumiki ije remoga e boeje bu gae. Areme bu kuae, E Ije fune ma e ije Godido vua vierafena kuaemo fu ruakono kuaema ijeno kuae. ¹⁵Ro Jesu fu giake e bune fu dabe kini buone igege rekuae kikecumavoga fune urina fuosukua uruo ijia ajia vae.

Jesu fu do ado ijia bierena vaema ijene

¹⁶Areme ve fune nakisiremoga e Jesudo vua fievo ije bune uruo ije arena una Do Gareri ijia ari vae. ¹⁷Bune va ijia usiaena vanage be abena una are Kafoniamu nake ijia vae. Ro ije funeka ve titutema ijia bu buosukua vae ro Jesu fu baki. ¹⁸Ro bu vako ijia fuka majaufi ireobo ufikoke davare ije fuka ireobo firame. ¹⁹Ro e vua fuone fievo ije bune vanage abena sibaneke davare ukua ijia vaeva ijia bu gake Jesu fu gafa una davare ado ijia bierena romogana buka urukeigia jumei. ²⁰⁻²¹Bu ijiege jumevoga Jesu fu uri kiae, Na narenko jade jumevono kiamoga bune una oemarekinu kuavo fu vanage ijia ajiae. Areme vanage ije funeka saroruba davare irifo bu vako ijia kekei.

E ije bu uri Jesu rereva ijene

²²Areme nituame e ije davare irifo gura fu buretekiro kijume vajiamo bu iva ije bu vierafega vanage ije fu besukua davare irifo ijia namo bune e Jesudo vua fievo ijiebe abe vako bune gae. Ro Jesu fu naebe buina vanage ijia ajiamo bu gae. ²³Ro vanage are Taebiriasiko ije bu ruoma davare irifo are ije Jesu fu e boeje burete vajiamo ijia usiae. ²⁴Ijadufuo e ije bu uri gake Jesukiro e vua fuone fievo ije bu baki. Ijadufuo bu urina vanage ije bu iko usiae naovo ijia ajiana bune Jesu rerena are Kafoniamu ijia vae.

Jesu fu ire burete bu ina maza boeje ijia karivako ijene

²⁵Bune vakuma davare gara Jesu biena kuae, E Nijasiamo, aeje a vame izane igia ruaemano kuae? ²⁶Bu ijiege kuavoga fu kiae, Naka

ma kuariave, ja na rerie ruaeva ijadufuo maeje Jame burete na vajiaovo jaka uruvana iva ja ijadufuo reriena ruae. Ro ja vame sumiki na revo ja gieva ja ijadufuo rerie ruaeva baki. ²⁷Ro igia fie, jade maza boeje uri ire ja idufuo ijiaru vierafevao. Ijadufuo maeje ire ije maza rade buka bakireke. Ro nika uri ire ije ja ina maza boeje ijia karivadufuo ije vierafera ijadufuo imenofo. Ro ire ije Ema ijiebuo Fari ige nare ja vajiadufuo. Ijadufuo maeje fune Godi Asoe none ijare ire ige na renoevo ijadufuo daro miemano kiae.

²⁸ Jesu fu ijiege kuariamoga bu una kuae, Ro a vierafe i ije Godi fu vierafe no medufuo ije no irere ije mekono kuae? ²⁹ Ro fu una kiae, I ije Godi fu vierafe ja medufuo ijeja ja e ige fu kiemo na ari ruaeva ige na ma vierafera kiae. ³⁰⁻³¹ Rove e ije bu una kuae, Ro a ire sumiki be a irere ije rega no ijia gana a ma vierafera? Ro igia fie, Godido buki akae bu isuibe isoeva ijia bu kuae, Mosisi fu ae sao ijia ire burete menano kuavo ije fume kave gufia arimo fu kena e asaerafa nuvuone ije vajiamo bu ivano kuae. Ijadufuo abe ire sumiki ijieki be rega no ijia gana una a ma vierafera kiae?

³² Bu ijiege kuaravoga Jesu fu una kiae, Naka ma kuariave burete ije Mosisi fu ae sao ijia kena asaerafa jone ije vajiamo bu iva ije fu burete maeje baki. Ro burete ije Asoe none fu iviama vajiamo ijare fu burete maeje. ³³ Ijadufuo burete maeje fu E Ijare arina e ume igia oenoeba ije ifejiaga bu ma karivakono kiae. ³⁴ Rove e ije bu una kuae, E Ireobo, anika ivia zinuevena maza boeje burete ijieki ijiaru vajuoga no ino kuae.

³⁵ Bu ijiege kuaravoga Jesu fu una kiae, Naeje na burete maeje ja ina maza boeje ma karivadufuo ijene. Ijadufuo erare fu none ruakuma fube vasia oeke. Ro kuke erare fu na ma vierafera kuma e ije fube do duaake. ³⁶ Ro igia fie, iviama na giaga ja irere na renoejo ije Jane gieve rove jaka na ma vierafera baki. ³⁷ Ro na e ije Asoe none ijare oe buone kame kuderiga bu una e none revo ije nabe rorukuriake. ³⁸ Ijadufuo maeje kave gufia na ari ruaeva ije name nare none vierafera ijia renoekiro ruaeva baki. Ro na Asoe none fu kiemo na ruaeva ije irere fu vierafera na ijiaru renoeke. ³⁹⁻⁴⁰ Ro vierafera fuone ijeja, na e ije fu oe buone kame kuderiga bu una e none revo ije bino nabe uniakoke. Ro kuke na e ije erarebe bu na gienia ma vierafera na bu karauniak. Ro bu oekuva na maza radekuma ijia kiaga bu una urina vame ma karivako ije abena ijia kari vakono kiae.

⁴¹ Jesu fu ijiege kuariamoga e Jiusi ije bu uri fuesina kuaena buoe madinami. Ijadufuo maeje fu kua, Naeje na burete ije kave gufia ari ruaema ijeno kiae. ⁴² Ro kuke bu kuae, E ije fu Jesu e Josofudo fari none vierafera ijene. No orafa fuone ije none giavo ro fu irerefuo kuae nana kave gufia ari ruaevano kuae?

⁴³ E ije bu vua ije dabe buoe saguvoga Jesu fu giana una kiae, Vua ije ja dabe joe madinamivo ije arefo. ⁴⁴ Fu erare izege korufuo daro fuone

ijia griesana na ma vierafekuma baki. Ro fune Asoe none ije fu kiemo na ruaeva ijare e ijiebuo oe ije kena kuderikuma bu ije na ma vierafeke. Areme na maza radekuma ijia bu oekuva na kiaga bu una urina ijia ma karivake. ⁴⁵Ro isuibe e ije bu Godido vua vierafena kuaevu bu isoeva ije bu ijiege isoe, E boeje bu Godire korufuo nijasiakono kuae. Ijadufuo eranebe bu Asoe none ijadufuo vua ije fiekinu vame fuone ije mukoe vierafekuva e ije bu none ruake. ⁴⁶Ro fu e be erare Asoe none ije gaema baki. Ro fune E Ije Godi fu kuamo fu ari ruaema ijare fuosukua gae. ⁴⁷Ijadufuo naka ma kuariave eranebe ja na ma vierafekuva ja vame ma karivako ije abeke.

⁴⁸Naeje na burete maeje e bu ina maza boeje ma karivako ijene. ⁴⁹Ro asaerafa jone bu isuibe ae sao ijia ire burete menano kuavo ije i rove bune oe furi. ⁵⁰Ro burete ije kave gufia ari ruaema ije fu mukore ro fuka ni be. Ijadufuo eranebe bu burete ije ikuva bube oeke. ⁵¹Ijadufuo naeje na burete maeje fu kave gufia ari ruaema ijene ijadufuo erare burete ijene ikuma fube baronekiro fuka una vame ma karivako ije abeke. Ro burete ijeja vajae suri none igene. Na vajae suri none ige abe e boege ume igia oenoeva ije miaga bu ikuva bu vame ma karivako ije abekono kiae. ⁵²Jesu fu ijiege kuariamoga e Jiusi ije bune vua ijadufuo una bue madinami. Bu kuae, E ije fu izege vajae surive fuone ije dabe muoga no ikono kuae?

⁵³Ro Jesu fu una kiae, Vua ige naka ma kuariavo fiego. Ja Ema ijiebuo Fari ijadufuo vajae suri ijiakiro kavuane ije naebe ikuva ja izege vame ma karivako ije abekuva baki. ⁵⁴Ro eranebe bu kavuane ijiakiro surive none ije ikuva e ije bu vame ma karivako ije abeke. Ijadufuo bu maza radekuma ijia oekuva na kiaga bu una urina ma karivake. ⁵⁵⁻⁵⁶Ijadufuo maeje vajae surive ijiakiro kavuane none bu kavene jone ijiebuo ire maeje. Ijadufuo erare kavuane ijiakiro surive none ije ikuma na oe fuone ijia finoekiro fuje fu nosiki finoeke. ⁵⁷Naeje na Godi Asoe none ije fume ijia fi vako ijare kiemo na ari ruae. Ro fuje fu ni uria fino ijadufuo nadua na uria five. Ijadufuo eranebe bu vajae suri ijiakiro kavuane none ije ikuva budua bu ni uria karivake. ⁵⁸Ro burete ije na kuariavo ije fu kave gufia ari ruaema ijene. Ro fu burete ije asaerafa jone bu ae sao ijia iva ijieki baki. Asaerafa jone bu ae sao ijia burete menano kuavo ije ina rade bu oe. Ro burete ige na kuariavo ije fu ijieki baki. Ijadufuo eranebe bu burete ijene ikuva bu maza boeje ma karivake. ⁵⁹Ro Jesu vua ige fu are Kafoniamu ijia are e Jiusi bu afuina vua kuaevu ijia aruna vua nijasiamo ijia fu ijiege kuariae.

Vua ije ma karivako ijene

⁶⁰Areme e Jesudo vua fievo ije bu vua ije fiena una bue kuae, Vua ije fuka ma gikikimana. Ijadufuo fu erare fiena uri mukoreigia mimata

kenoekuma bakino kuae. ⁶¹Ijadufuo Jesu fune giana uri kiae, Ja vua ije na kuariaeva ije jakia oe binobino vierafei. Ijadufuo ja vierafe ja na ma vierafevo ije ja arekuae ja ijiege vierafe? ⁶²Ro igia fie, ja Ema ijiebuo Fari ije fu una are fu ari ruaema ijia ajia vakuma ja izege reke? ⁶³Vame ma karivako ije abedufuo ije fu Kavene Akae ijare ifejiaga ja abeke. Ro tame ema jare kojo daro jone ijia vame ma karivakuva ije abekuae vierafukuva ije ja izege rekuva baki. Ro vua ige na kuariaeva ije na Kavene Akae ijadufuo vua ije kuariae. Ijadufuo fu vua ijare ja ifejiaga ja vame ma karivako ije abeke. ⁶⁴Rove e gure gue na giaga vua ije jaka abe ma vierafevo bakino kiae. Ro Jesu vua ije fu ijiege kuaema ije fu eranebe bu naebe fu ma vierafedufuo ije fune giae. Ro kuke fu erare fu abena una e ise revo ije miadufuo ije fune vieraferma ijadufuo fu ijiege kuariae. ⁶⁵Fu ijiege kuariama areme kiae, Na ijadufuo kuariana kia, fu e be erare fume korufuo una na ma vierafekuma baki. Ro fune Asoe none ijare e ijadufuo oe ije dabe dakudekuma fu ijia na ma vierafekono kiae.

⁶⁶Jesu fu ijiege kuariaema ijadufuo e vua fuone fievo gue bu una fuina oenoedufuo ije bune ijuone. ⁶⁷Ijadufuo fu uri e vua fuone fievo tuero ije kiae, E gue bune na arena vae ro jadua ja vierafe jane na are vakuae vierafervano kiae? ⁶⁸⁻⁶⁹Rove Saemoni Fita fuka una kuae, E Ireobo na vieraferga aeje aka E Akae Godire kuamo a ruae. Ro vua maeje ma karivadufuo ije ane are kuaruoga no fieve. Ro no a abueza vakuva no una e be erado vakono kuae?

⁷⁰Fita fu ijiege kuaramoga Jesu fu una kuae, E tuero gure na nare kono giana kei. Rove ije ja oenoeko ijjia e be fu kavene iseno kiae. ⁷¹Ro ije fu kiaema ije fu Judasi e Saemoni Isikariotido fari ijadufuo kuae. E ije fu e vua fuone fiemo be rove fu maza rade Jesu abe una e ise renoevo ije miake ijadufuo fu ijiege kuae.

Jesukiro uviarafa fuone ijene

7 ¹Areme rade Jesu fune aesakae Gareri ijia oenoekinu e ije vua nijasianoe ro fu naebe una sakae Judia ijia oenoekiro vierafei. Ijadufuo maeje Jiusi e mamekanu ije bu fu kanakuae samuana kariva ijadufuo fu ijiege rei. ²⁻³Ro maza ije e Jiusi bu iro ina una asaerafa ije izege bu isuibe ae sao ijia are muvuaka sana karinoeva ije vierafevo ije fune ivuare. Ijadufuo Jesudo uviarafa ije bune uri Jesu kuae, Are ige a oenoeno ije arekiro urina gamia Judia ijia vane. A va ijia ire sumiki ige a renoeno ije gue ijia rega e vua one fievo bu giane. ⁴A igia sauina fikuma e are irore boege bu izege a ma vierafekuva baki. Ijadufuo a vierafe e boeje bu a gana ma vierafekuva ni urina una gamia Judia e uruvana bu afuina iro ijo ijia va ire sumiki ije rega bu gano kuae. ⁵Ro vua ije bu Jesudo uviarafa ijiebe ijiege kuarae rove budua bu Jesu ma vierafevo baki.

⁶Ijadufuo Jesu fu una kiae, Jaeje ja maza binobino e bu iro ikuae afuivo ije maza bino ja va ro bino ja arevo ije fune marei. Rove naeje na maza none fu naebe abema ijadufuo nabe vake. ⁷Ro igia fie, e ume igeko ije jaeje bu ziegafiaivo baki ro naeje buka ziegafiekinu ijuonevo. Ijadufuo maeje na ise buone bu renoejo ije samadukua visuna kuariavo ijadufuo bu na ijiege revo. ⁸Ijadufuo ni jare iro ijia vakiro naebe nabe vuake. Ijadufuo maeje maza none fu naebe abemano kiae. ⁹Jesu fu ijiege kuariana areme fune mu sibaneke Gareri ijia finoe.

Jesu fu iro ijia vaema ijene

¹⁰Areme Jesudo uviarafa ije bune Judia iro ije bu ivo ijia vakoga fu mauike rade nuvediana vae. ¹¹Fu vakogana Jiusibuo e mamekanu iro ijia kariva ije bu urina e ije afuiva uve ijia Jesu rerei. Bu rerenoekinu uri e ije kuariana kiavo, E ije fu izieburekiga nijasuo no gano kiae. ¹²Ro e ije afuiva ijia e gue bu mauike karina fuesina bue kuaev. E ije fuka e mano kuae. Ro e gue bu kuae, E ije fuka vua kufui ije e uruvana nijasianoeno kuae. ¹³E ije bu Jesu dabe ijiege fuesina kuaenoe. Rove bu naebe abe uruke kuaena samadire ijadufuo maeje bu e Jiusibuo e mamekanu ije jumei.

¹⁴Areme iro ije bune ina ririkineva ijia Jesu fune va Godido Are ijia aru e ije vua zinuevena nijasiae. ¹⁵Fu ijiege nijasiamoga Jiusi e mamekanu ije bu gavo buka oeseradiae. Ijadufuo bu kuae, E ije fu Godido buki akae ijia bu nijaeva baki ro fu izege vua maeke mukoe vierafemano kuae?

¹⁶Bu ijiege kuaevoga Jesu fu kiae, Vua ige na kuariavo ije fu none bakiro fu e ije fu kiemo na ruaeva ijadufuo vua. ¹⁷Ijadufuo e ije erare fu Godido vierafemra ijia keneno e ijare vua ige na kuariavo ije fure gieno vierafeke. Fu giega vua ige na none vierafeva ijia kuaria ke na Godido vua ije kuariavoga ije fure vierafeke. ¹⁸Ro erare fu vierafe fuone ije dabe kuaeneno ije fu fuone aroenamikiro fu ije vieraferme. Ro e ije fu vierafe fuka e ije fu kuamo fu ruaema ije dabe aroekiro vierafermo ije vua fuone fuka ma kuaeme ro fu kufuimeno baki. ¹⁹Ro igia fie, e Mosisi fu akae ije kena vajiae rove e boeje gure kariva ije fu e besu erare akae ije mukoe irinaema baki. Ro ja irerefuo na kaniekuae rerienoejo kiae. ²⁰Jesu fu ijiege kuariamoga e ije bune urina kumei, E gafe ka kavene iseki niroema gafe a erare kanakuvega a ije kuaemono kumei.

²¹Ro Jesu fu una kiae, Na ire sumiki besu maza ije ja mauike karina Godido baname isoeko ijia revo ja gievo jaka oeseradiae. ²²⁻²³Ro iviama fu Mosisire akae ije vajiae surive kaniaufu nuga navo ije miaema ijadufuo ja ijiege kenoeve. (Rove vame ije bune asaerafa jone ijiebe isuibe ijiege rena ruae. Ro Mosisi akae ije fu rade isoena vajiae). Ja vierafe jaka Mosisido akae ije mukoreigia nuvekuae ja ijadufuo ame isesina ije ja kena maza akae ijia vajiae surive buone kaniaufu nuga navo. Ro ja irerefuo na

e adagi gafe maza akae ijia amaerivo fu maema ijadufuo una oe isema na vierafekinu zienoeve? ²⁴Ja e bino bu ire gue rega ja giana kuaevu ije ni sone irere bu revo ije gia areme rade kuaedufuo. Ro jame uri ijiebure migegire giana kuaevu ije fuka naebe maremano kiae.

E ije fute E Ije Godi fu kuamo fu ari ruaema ijene

²⁵Fu ijiege kuariamoga e Jerusaremeko gue bu una bue kuae, E ije fute e ije e mamekanu bu kanakuae rerenoeko ijene. ²⁶E ije fu jumemo baki ro fuka e boeje ijiebu niome ijia manina vua kuariame. Rove e mamekanu ije bu una vegue kuaravo baki. Ijadufuo bubite bu vierafega e ije fune ma E Ije Godi fu kuamo fu ruaema ijarega bu naebe una vegue kuarave. ²⁷Nono e gare fu izia ruaema ije none vierafe. Ro maza rade E Ije Godi fu kuaga fu no karaunuokiro ruakuma ije fu erare fu izia ruaema ije vierafekuma bakino kuae.

²⁸⁻²⁹Jesu fu uria Godido Are ijia manina vua kuariamo ijia bu ijiege kuaevoga fu kume, E boeje gure kariva gurie, ja na e izeki ro na izia ruaeva ije jaka naebe vierafei. Naeje name nare igia ari none vierafeva ijia renoekiro ruaeva baki. Ro Godi ije fu kiemo na ruaeva ije fu Godi kufui ije fu baki ro fuka ma. Ro ja fuje ja gana vierafeva bakiro nane nare nosukua fuje nane vierafei. Ijadufuo maeje naeje fure kiemo na ari ruaevano kumei.

³⁰Ijadufuo e gue bune uri fare dabe dibure nujakuae vierafe rove e besukua be fu naebe uri vajae fuone ijia niriae. Ijadufuo maeje maza ije bu fu kanadufuo ije fu naebe abema ijadufuo bu ijia arei. ³¹Rove e ije afuiva ijia e uruvana buka fu ma vierafei. Areme bu una bue kuaevu, No vierafe E Ije bu isuibe kuae fu ruakono kuaeva fu ruakuma fube ire sumiki bino e gare fu rema ije asina rekono kuae.

Bu e juo kario ije kiavo bu Jesu tokuae ruaeva ijene

³²Areme E Ferisi ije bu e ijiebe vua ijiege Jesusina kuaevoga bu fie. Ijadufuo bu urina e mamekanu Godido zinone ifaejevo ijena e juo kario ije kiavo bu Jesu tokuae ruae. ³³Bu rovoga Jesu fu urina kiae, Naeje na maza sibaneke igia oenoena areme nane una Godi e ije fu kiemo na ruaeva ijadufuo vake. ³⁴Ro na vakuva jaka uri na rerieke rove ja giekuva baki. Ijadufuo maeje ja are na vako ijia jabe vuakono kiae. ³⁵Rove e Jiusi ije bu vua ije fiema una bue kuaevu, E ije fu izia vakuveno ijadufuo fu vakuma nobe gake? Fubite fu uri e Gurikibuo sidove ije e Jiusi bu kariva ijia E Guriki ije vua nijasiake vake? ³⁶Fu kuae fu vakuma noka uri fu rereke rove nobe biekono kuae. Ro kuke no are fu fino ije nobe vakono kuaema ije fu irerefuo ijiege kuaemano kuae?

Do ije bu ina ma karivako ijene

³⁷⁻³⁸Areme maza ka ireobo be bu iro ina furikuvejo ijia Jesu fu urina e ije urukeigia aramaziae. Fu aramaziana kumei, E be erare do duaejoga ni none

roga na do ijano kumei. Ijadufuo maeje isuibe Godido buki akae ijia bu vua be ijiage isoena kuae, Eranebe bu na ma vierafekuva do ije fu bu ifejiaga bu ma karivadufuo ije fu oe buone ijia abiesekono kumei.³⁹ Ro Jesu vua ije fu do ijadufuo kumema ije fu Godido Kavene ije eranebe bu ma vierafena abedufuo fu ijadufuo kumei. Rove maza ijia bu Godido Kavene bu naebe abei ijadufuo maeje Jesu fu naebe baronena una uri are sanaema fuone kave gufia ijia vae.

E ije bu dabe atana guegue reiva ijene

⁴⁰ Areme e boeje bu ijia afuiva ijia e uruvana gue bu Jesu vua ije fu ijiage kuaema ije fie. Ijadufuo bu kuae, E ije no vierafega fune ma e Godido vua vierafena kuaemo ijeno kuae. ⁴¹ Ro e gue bu kuae, E ije fu Godi E Ije fu kuamo fu ruaema ijeno kuae. Ro gue bu kuae, Godi E Ije fu kuaga fu ruadufuo ije fu sakae Gareri ijia ruakuma baki. ⁴² Ro Godido buki akae ije bu isuibe isoeva ijia fu kuae, E Ije Godi fu kua fu ruadufuo ije fu e Devidido uifari ijia ruakono kuae. Ro kuke E Ije bu are Betirieme e Devidi fu fino ijia bietekono kuae. ⁴³ Ijadufuo e ije bune Jesusina ijiage kuaena dabe ata guegue rena bue sagui. ⁴⁴ Ro e gue buka defarudiamo bu Jesu fare tokuae vierafei rove bu e besukua be fu naebe vajae fuone ije niriae.

⁴⁵ Areme e Godido Are juo karioj ije bu Jesu tokuae ruaeva ije bune ijia arena una va e mamekanu Godido zinone ifaejevo ijiakiro e Feresi ije kariva ijia usiae. Bu usiaeavoga e Feresi bu urina kiae, Ja irerefuo e ije no kiavo ja vaeva ije ja naebe tonu mesiri ruaevano kiae? ⁴⁶ Rove e Godido Are ije juo karioj ije bu una kiae, E ije no mesirikuae vae rove no usiaena vua fuone fu kuaemo ije fievo fuka oeseraduomo no ijia arena ruaevano kiae. ⁴⁷ Bu ijiage kuariavoga e Feresi ije bu una kiae, Ijiekido no vierafega jadua jabite fune vua fuone ijare oe jone ije fune kame kuderiaejae. ⁴⁸ Rove igia fie, no e Feresi igiakiro e mamekanu ije gue nono fu ma vierafevo baki. ⁴⁹ Ro e ije ka naebe mukoe vierafevo ije bubite bu e Mosisido akae ije bu naebe mukoe vierafe ijadufuo bu una e ije ma vierafeve. Bu ijiage revo ijadufuo no vierafe Godi fuka rade bu kame vame ise ijia isekafiakono kuae.

⁵⁰⁻⁵³ Bu ijiage kuaevoga Nikodimasi e ije fu mugé be ro Jesuki fina vua kuaema ijare urina kiae, No akae nuvuone ije ude noka e ije no kena isekafiakuvejo ije irere bu isema reva ije fieke. Ro rade no ijare e ije kena isekafiakuva ije fu marekono kiae. Ijadufuo e mamekanu ijiakiro e Feresi ije bu una kuae, A ijiage kuaemo ijadufuo na vierafega adua abite a e Gareriko. Ni Godido buki akae ije bu isuibe isoeva ijia dana gane. A ijia dana gabitie a ga e Godido vua vierafena kuaemo ije fu sakae Gareri ijia ruakuma bakino kuae.

Bara ije fu ebuo baru turaema ijene

8 ¹ Areme e boeje bune una are buone ijia vakoga Jesu fune una uruu Orivi kuavo ine orivi naema ijia ajia vae. ² Areme fune

suoke mu gamia una Godido Are bu baname isoevo makave ijia ruae. Fu ijia romoga e boeje bu biona fu dabe utikuravoga fune ijia arifina vua nijasiae.³ Fu ijia vua nijasiamo ijia e Feresi gue ro e Mosisido akae nijasiavo gue bu bara be fu baru turamo ije mesirina ijia ruae. Areme bu kuavo fu e boeje ijiebuo niome ijia mani.⁴ Fu manikoga bu urina Jesu kuae, E Nijasiamo no bara gure fuka bara befuuo baru daturamoga no gana mesiri ruae.⁵ Ro akae nuvuone ije Mosisi fu nijaema ijeja no bara ijieki ije nok a mune tuana kaniaga bu oevo. Ro aeje a izege vierafejoga ni kuaruo no fiено kuae?⁶ Ro vua ije bu ma kuaraeva baki ro bume biesiri gaga fu vua isema kuaega bu tokuae bu ijadufuo ijiege kuarae. Rove Jesu fu irere bu revo ije fune vierafe ijadufuo fu daena umui fuone ijare sakae ijia isoe.

⁷Areme fu uri ninuima areme kiae, E gure ja ireva ijia e besu erare fu vierafega fu ise besukua be naebe rejoga ni ude mune kena bara gure kanano kiae.⁸ Jesu fu ijiege kuarianaro fune una daena sakae ijia isoe.⁹ Fu ijiege isoekoga e ije bu vua ije fiena bune maukeigia besubesu vagana Jesukiro bara ije bu ijia uniana vae. E maki ijiebe ude vakoga e gue ije bu rade vae.¹⁰ Areme Jesu fune una urina bara ije kuae, E ije bu ise one ijadufuo kuaena kanakuae vierafeva ije bino bubeuria irevano kuae?¹¹ Ro bara ije fu una kuae, E boeje bune vafurivano kuae. Bara ije fu ijiege kuaramoga Jesu fu una kuae, Nadua a nabe isekafake. Ijadufuo a vakuma ade una ise ijieki bino remono kuae.

Jesu fu ume igadufuo sanaema ijene

¹² Areme Jesu fune una kuke e Feresi ije kuariana kiae, Naeje na e ume igia oenoovo ijiebuo sanaema ijene. Ijadufuo eranebe bu na kenoevo ijiege urina makae none ijia mimatana kenoekuva bube titutema ijia oenoeko. Ro kuke buka none sanaema ije fu maza boeje ijia navako ijene abekono kiae.¹³ Fu ijiege kuariamoga e Feresi ije bu urina kuae, Aeje aka koro a e izeki ijene dabe no kuaruomo. Ijadufuo no vierafega vua irere a kuaemo ije fuka ma bakino kuae.¹⁴ Ro Jesu fu una kiae, Na vua ige na kuariavo ije na kono vierafega nane ma kuariave. Ijadufuo maeje na kono na izia ruae ro na izia vadufuo ije nane vierafe ro jaeje ja baki.¹⁵ Ro na ja gien a kuaev o ije Jame ema jare joenina gien a kuaeve. Rove naeje na e gue giana kuaev o baki.¹⁶ Ro igia fie, na e gue giana kuaev o ije na mukoreigia giana kuaev o. Ijadufuo maeje name nare nosukua giana kuaev o baki ro nane Asoe none fu kiemo na ruaeva no fuosiki besu giavo.¹⁷ Ro akae jone ije ja kuae, E inokiro bu e mamekanu ijiebuo niome ijia vua ni besu kuaev o ije vua buone buka ma ijiaru kuaevono kuae.¹⁸ Ijadufuo vua irere nare kono kuaev o ije Asoe none fudua fune vua besu ijene noesina kuaemono kiae.

¹⁹ Jesu fu ijiege kuariamoga e ije bu una kuae, Ro a vierafega Asoe one fu iziebure fivoga ni nijasuoga no gano kuae. Rove Jesu fu una kiae,

Jaeje ja na ro Asoe none ije jaka ma vierafevo baki. Ro ja na mukore vierafebitie ja kuke Asoe none ije mukoe vieraferkono kiae. ²⁰Ro Jesu vua ije fu kuariaema ije fu Godido Are guove be bu mavua moni rievo bu naeva ivuake ijia manina kuariae. Rove e mamekanu ije bu naebe ijia urina fu toe. Ijadufuo maeje maza fuone fu naebe abema ijadufuo bume karina vua fuone ijiaru fiejae.

Ja are na vako ijia jabe vuake

²¹Areme Jesu fu una kuke kiae, Naeje nane una vase. Ro na vakuva jaka uri na rerieke rove ja are na vako ije jabe ijia vuake. Ijadufuo maeje jaka uria ise rena ijiajuma oevo ijadufuo jabe ijia vuakono kiae. ²²Ijadufuo e Jiusibuo e mamekanu ije bu kuae, E ije fu kuae ja are na vako ije jabe ijia nuvedie vuakono kuaema ije fu irerefuo ijiege kuae? Fubite fue kananamikiro fu ijadufuo kuaemono kuae. ²³Bu ijiege kuaevoga Jesu fu una kiae, Jaeje ja e igeko ro naeje na e kave gufeko ro na e ume igeko baki. ²⁴Ijadufuo na ije kuariana kia ja naebe vierafero naeje na E Ije Godi fu kuaga fu ruakono kuaema ijenero ja ijiege vieraferkuva jaka ise jone ijiajuma oekono kiae. ²⁵Jesu fu ijiege kuariamoga bu urina kuae, Ro aeje a eraga ni mukoreigia samadukua kuaruoga no fieno kuae. Ro Jesu fu una kiae, Na iko na kuariaeva ijia naeje na era ije nane kuariae. ²⁶Na ise jone ja renoevo ije giana kuariakinu ro kame isekafiadufuo ije fuka ma uruvana rove nabe ijiege redufuo. Ro name E Ije fu kiemo na ruaeva ijadufuo vua irere fu kuariema na ijiaru abe e ume igia oenoejo ije kuariave. Ijadufuo vua fuone fu kuariema ije fuka mano kiae ²⁷Jesu fu Asoe fuone ijadufuo ijiege kuariae rove e ije buka naebe mukoe fie. ²⁸Ijadufuo fu una kiae, Ja vakuma maza ije ja Ema ijiebuo Fari ije abe kafe nifirivo ijia ja sone giena vieraferke. Ja ijia vierafero naeje na E Ije Godi fu kuaga fu ro e boeje karauniadufuo ijare ro ja ijiege vieraferke. Areme ja ijia vierafero irere igia na renoekinu kuarianoева ije name none vieraferva ijia kuarianoево baki. Ro na Asoe none irere fu nijasiema na ijiaru kuarianoеворо ja ijiege vieraferke. ²⁹Ro Asoe none ije fu na kiemo na ruaeva ije fu na nujimo baki. Ijadufuo maeje na maza boeje naneka irere fu oemaredufuo na ijiaru renoevono kiae. ³⁰Jesu fu vua ijiege kuariamoga e uruvana bu vua fuone ije fiena buka una fu ma vierafei.

E Jesudo vua fievo maeje ijene

³¹Ijadufuo Jesu fune una e Jiusi ije bu fu ma vieraferva ije kiae, Ja vua none na nijasiavo ije fiena iriniekova ja ma e vua none fievo ije reke. ³²Ja vua maeje abe ma vieraferkuva vua ijare ise jone bu ja toenamiaevo ijia karauniakono kiae. ³³Jesu fu ijiege kuariamoga bu urina kuae, Noeje no e Eburamedo uifari ijadufuo no una e binobuo imevo baki. Ro a

irerefuo kuae, No vua maeje abe ma vierafekuva fu ise nuvuone ije bu no toenamueva ijia karaunuokono kuae?

³⁴ Bu ijiege kuaravoga Jesu fu uri kiae, Vua ige naka ma kuariave. Eranebe ise renoejo e ije buje bune ise ijare samuagiako bu fuefuo imenoeve. ³⁵ Rove igia fie, ja ise ijare maza boeje ja samuagiakuma ja izege oemarekinu dazena karikuva baki. ³⁶ Ro ja Godido Fari ije fu ise jone bu ja toenamiaeja ijia karauniakuma jaka una oemarekinu dasuna karinoeke. ³⁷ Na vierafega jaeje ja e Eburamedo uifari. Rove ja vua none ige na nijasiavo ije ja mukoe fievo baki ijadufuo jaka na kaniekuae vierafe. ³⁸ Nana irere na Asoe none ijadufuo nidua ijia glaeava na ijene abe ja kuariave. Ijadufuo na vierafe jadua jaka irere asoe jone fu kuariamo ijene renoeno kiae.

³⁹ Jesu fu ijiege kuariamoga bu una kuae, No asoe nuvuone ije fu e Eburameno kuae. Ro Jesu fu una kiae, Jane ma e Eburamedo anafabitie jadua ja izege fu renoeno ja ijiege renoeke. ⁴⁰⁻⁴¹ Rove ije ja bakiro jaka una na kaniekuae vierafe. Ijadufuo maeje na vua maeje Godi fu kuariema na ijene kuariaeva ijadufuo ja ijiege reve. E Eburame fu ijiege renoema baki rove jaeje ja asoe jone irere fu renoema ja ijene renoevono kiae. Jesu fu ijiege kuariamoga bu una kuae, Noeje bu didui nafuevo baki ro no asoe nuvuone ije fu Godi. Ijadufuo no vierafega none ma anafa fuoneno kuae.

⁴² Ro Jesu fu una kiae, Ja Godi fu ma Asoe jonebitie na vierafe jaka na oetuake. Ijadufuo maeje naeje fure kiemo na ruaeva ivia na nidua jone igi manive. Ro na ari ruaeva ije name nare daro none ijia ruaeva baki ro fune Godire kiemo na ruea. ⁴³ Ro ja irerefuo vua ige na kuariavo ije ja naebe mukoreigia fievo? Ijadufuo maeje ja vua none ije ja oetuana fiekuae vierafevo baki. ⁴⁴ Jaeje ja asoe jone e Setanido anafa ijadufuo jaka irere fu vierafemo ije renoekuae vierafe. Iko zinume ijia ruoma iviama ige fuje fuka e kaniaga bu oevo. Ro fu vame maeje renoeno baki ijadufuo maeje vua maeje fu oe fuone ijia namo baki. Ro fuje fuka vua kufui kuaemo ijadufuo maeje fu e iti kufuiki. Ro kuke fuje fuka e kufuimenoeo ijiebu asoe ijene. ⁴⁵ Na vua ige naka ma kuariave rove jaka na ma vierafevo baki. ⁴⁶ Ro ja vierafega na ise be rejoga ni kuarie na fieso. Ro ja giega nane ma kuariavoga ja irerefuo naebe na ma vierafeve? ⁴⁷ Ro igia fie, e ije erare fune Godido e rema e ije fu Godido vua ige na kuariavo ije fu mukoreigia oetuana fiemo. Rove na giaga jaeje ja Godido e baki ijadufuo ja vua fuone ije na kuariavo ije jaka mukoe fievo bakino kiae.

Jesukiro Eburame

⁴⁸ Areme e Jiusi ije bu una Jesu kuae, Ro a vierafega ige no kuae aeje a e Sameriteniko ro kuke a kavene ise ijare a nirokaemano kuaeva ije note ma kuaevano kuae. ⁴⁹ Bu ijiege kuaravoga Jesu fu kiae, Nana

kavene ise ijare na nirokiemo baki. Ro na Asoe none ije abe aroeve rove jaeje ja na arorievo baki. ⁵⁰Ro igia fie, nana kono sanaema none ijene dabe aroekiro vierafevo baki ro fune Godire na aroriemo. Ijadufuo no ma renoe ro no isema renoejo ije fu fure fuosukua guodufuo. ⁵¹Ijadufuo naka ma kuariave, erare fu vua none ige mukoe fiela iriniemo e ije fube baronekiro fume ijia ma fi vakono kiae.

⁵²Jesu fu ijiege kuariamoga e Jiusi ije bu urina kuae, Iviam no samadukua gaga aeje aka kavene ise ijare nirokai. E Eburamekiro e Godido vua vierafera kuaevu ije bune oe furi ro a irerefuo kuae erare vua none ige fiela iriniekova bube oekono kuae? ⁵³A vierafera a are aka e anuigi ro Eburame fuje fu e isekubero a ijiege vierafera? E Eburamekiro e Godido vua vierafera kuaevu ije bune oe furi. Ro aeje a era varekiga a vua ijiege kuaemono kuae?

⁵⁴Bu ijiege kuariavoga fu una kiae, Na kono sanaema none ije abe aroevu ije fu naebe marei. Ro e ije fu sanaema none ije abe aroriedufuo ije fune Asoe none e ije ja kuae fu Godi joneno kuaevu ijare fuosukua arorieke. ⁵⁵Jaeje ja Asoe none ije jaka naebe vierafera ro na nare vierafera. Ro na ivia igia kiako na fuje naka naebe vierafera vano kiakuva ije na ja kuaevu ijiege naka vua kufui kuariake. Rove na fuje nane vierafera ijadufuo na vua fuone naka iriniavo. ⁵⁶Ro igia fie, e asoe jone Eburame fuka maza ije bu na bietaniedufuo fu ije gakiro uruke vierafera. Rove fu ma vierafera na ume igia ruovo ijadufuo fu maza ije fune gaema igege fuka ma vierafera ireobo oemaremano kiae.

⁵⁷Jesu fu ijiege kuariamoga bu una kuae, Aeje a juaevasia one ije fuka ireobo baki. Ro a irerefuo kuae na Eburame nane gaevano kuae? ⁵⁸⁻⁵⁹Ro Jesu fu una kiae, Vua ige naka ma kuariave. Eburame bu rade biete rove naeje nane ude ijia firuafera vano kiamoga e Jiusi ije bu vua ije fievo buka isediae. Ijadufuo bune urina mune tuana kanakuvejoga fune Godido Are ije arena keke vae.

Jesu e nikuzeki ije amaerima ijene

9 ¹Areme Jesu fune oenoena e be bu ni kuzeki bieteva fu fino ije gae. ²Ro e vua fuone fievo ije bu una Jesu kuae, E Nijasiamo a vierafera e gure ni ije fu kuzema ije fu ise fuone ijare ke fu orafa ijiebuo ise ijare fu ije ni kuzemano kuae. ³Bu ijiege kuariavoga fu kiae, E gure ni ije fu kuzema ije fu ise fuone ro orafa fuone ijiebuo ise ijare ni kuzema baki. Ro ni fuone ije fume ijiege kuzekina bu rade Godido daro ijia fu kenuja fu una ni nafaega e bu gake. ⁴Ijadufuo na vierafera noka migegire ve ige fu uria sanaema ijia E Ije fu kiemo na ruaeva ijadufuo i ijene medufuo. Ro no saroeke fu ve titutekuma fu erare izege imekuma baki. ⁵Ro igia fie, maza ije na uria ume igia oenoego ije naeje na ume igadufuo sanaema ijeneno kiae.

6-7 Jesu fu e vua fuone fievo ije ijiege kuaria areme uri vi ufena abe sakae ijiakuma ijumijuma abe e ije ni kuzema ijadufuo niome ijia azirae. Areme fu urina kuae, Ni va do Saerome nafuema ijia nikubae one abe do ijia ruorano kuae. (Ro vua Saerome ijadufuo maeje Fu Kuamo Fu Vae). Ijadufuo e ni kuzeki ije fune va do ije Jesu fu kuaema ijia nikubae fuone ruemoga ni fuone fu una nafaemo fune are fuone ijia vae.

8 Fu una vakoga kairafa fuone ro e gue bu gae. Areme bu urina kuae, E ije fubite e nikuzeki ije fu vame ijia oenoekinu e ije ire binobino sarefiriamo ijareno kuae. 9 Ro e gue bu kuae, Ije fune fureno kuae. Ro gue bu kuae, E ije no vierafe fu e ni kuzeki ijieki rove fu e beno kuae. E ije bu dabe ijiege kuaevoga e ije ni nafaema ije fuka korofuo urina kukuma kiae, Naeje na e ni kuzeki ije ja ude gieva ije narenko kiae. 10 Fu ijiege kuariamoga e ije bu una kiae, A ni one ije a irere abenoga fu una nafaemano kuae? 11 Ro e ije fu una kiae, Na e Jesuno kuavo ijare sakae matuana niome none ijia azirie. Areme fu kiemo na va do Saerome ijia ruezvoga ni none fu una nafaemano kiae. 12 Fu ijiege kuariamoga bu kuae, Ro e ije fu izieburekino kuavoga fu kiae, Na e ije fu ni none ije amaerinaro fune izege vako na naebe gaevano kiae.

13 Areme bune e ije ni nafaema ije mesirina una e Feresi ijiebuo vae. 14 Ro maza ije Jesu fu e ijene sakae matuana ni fuone ije kuzema ije amaerima ije fu maza ije e Jiusi bu mauike kario ijia. 15 Ijadufuo e Feresi ije bune kuke una usiaena e ije fu izege remoga fu una ni nafaema ijadufuo kuarae. Ro e ije fu una kiae, Na e ije fu sakae ijia matuana ni igia aziriema kiemoga na va do ruevo ni none fu una nafaemano kiae.

16 Fu ijiege kuariamoga e Feresi gue bu vua ije fiena una bue kuae, E ije fu maza ije no mauike karina Godido baname isoevo ijadufuo akae ije fuka nuvemo baki. Ijadufuo no vierafe e ijiege renoeno ije fu Godido ruelaema bakino kuae. Ro e gue bu kuae, E ijiege ise renoeno ije fu izege ire sumiki ijieki ije rekono kuae. Bu ijiege kuaena bune dabe ata guegue rei. 17 Ijadufuo e Feresi ije bu una e ije kiae, A kuo na Jesure ni none ije amaerimo na una ni nafaevano kue. Ijadufuo fuje a izege vieraefemano kiae?. Ro e ije fu una kiae, Na vierafe fu e Godido vua vieraefena kuaemo beno kiae.

18-19 Fu ijiege kuariae rove e Jiusi ijiebuo e mamekanu ije bu e ije bu ni kuzeki bietevoro fu una ni nafaema ije bu uria naebe ma vierafei. Ijadufuo bu una orafa fuone ije kiavo bu rovoga bu kiae, Ja vieraefega ame ige fube ame jone ja ni kuzeki bieteva ijene? Ro fu izege remoga ni fuone fu una nafaema ije kuaruoga no fieno kiae. 20 Rove orafa fuone bu una kiae, Ame gure fu fari nuvuone nore ni kuzeki biete. 21 Rove no ni fuone fu erare izege amaerimo fu una nafaema ije noka naebe vierafei. Ro kuke fu amekube baki ijadufuo ni kuaga fu korufuo vua maeje kuariano kiae. 22 Rove orafa fuone ije bu Jiusibuo e mamekanu ije jumeva ijadufuo

bu ijiege kuariae. Ijadufuo maeje e mamekanu bu ude kuae, Erare bu kuaeko Jesu fu e ije Godi fu kuamo fu ruaema ijeno kuaekuma e ije bu kuriaerenga bu are ije e Jiusi bu afuina vua kuaevu ijia arena vakono kuae.²³ Ijadufuo e ni kuzeki ijadufuo orafa ije bu kiae, Fu amekube bano ni kuaga fu korofuo izege fu ni nafaema ije kuariano kiae.

²⁴ Ijadufuo e Jiusi ije bune una e ije fu ni nafaema ijene kuae, No viera fega e ije ni one amaerijaema ije fuka ise renoeno. Ijadufuo a iviama Godido ive ijia kurana vua ije ka visuna kuaruono kuae.²⁵ Rove e ije fu una kiae, Na e ije fute ise renoeno ke fu baki ije naka bigae. Ro na ire besu na viera fega ije ude naka e ni kuzeki rove iviama nane una ni nafaevano kiae.²⁶ Fu ijiege kuariamoga bu kuae, Ro e ije fu irere rejae ro kuke fu izege remoga ni one ije fu una nafaemano kuae.²⁷ Ro fu una kiae, Na vua ije jane ude kuarievoga nane kuariae rove jaka naebe fie. Ja irerefuo una kuke fiekuae viera fega? Jabite jadua ja una e vua fuone fievo ije rekuae viera fegano kiae?²⁸ E ije fu vua ijiege kuariamoga buka uri madima areme kuae, Noeje no e Mosisido vua fievo ro are a e ijadufuo vua fiemono kuae.²⁹ No isuibe Godi fuka samadukua Mosisi kuaraema ije none viera fega. Rove no e ije a kuaemo ije fu izia ruaema ije noknaebe viera fegano kuae.

³⁰ Bu ijiege kuaravoga e ije fu kiae, Vua ije ja kuaevu ije na fiegafu oeseradie. Fu izia ruaema ije jaka naebe viera fega rove na viera fega ni none ige fune fure amaerijie.³¹ Ro kuke no viera fega Godi fu e ise renoeojo ijiebuo vua ije fu fiemo baki. Ro fune e ije bu maza boeje fuone baname isoekinu ro irere fu viera fega ijia renoeojo fu vua buone fiemo.³² Ro iko zinume sakae ige amaeriva ijia ruoma iviama ige e be fu e ni kuzeki be amaeriamo fu una ni nafaema baki.³³ Ro e ije na kuaevu ije fu Godido ruaema bakibitie fu izege ire sumiki ijieki ije rekuma bakino kiae.³⁴ E ije una ni nafaema ije fu ijiege kuariamoga bu una kuae, E gure buka ise ijiakuma bieteva gure, A viera fega aka are no nijasokiro viera fegano kuae? Areme e mamekanu ije bune ijiege madima areme ka mediruna dabe makave ijia akoevo fu are ije bu afuina vua kuaevu ije arena keke vae.

³⁵ Areme rade Jesu fu izege e Jiusibuo e mamekanu bu e ije fu amaerima ije fuone reva ije fie. Ijadufuo fu e ije rerena bie areme kuae, Abe Ema igiebuo Fari ige na ma viera fegano kuae.³⁶ Ro e ije fu una kuae, A viera fega e ije erarega ni kuarie na fu ma viera feno kuae.³⁷ Fu ijiege kuariamoga Jesu fu una kuae, E ije a gaema ije fure iviama igifure manina osiki vua kuaemono kuae.³⁸ Ijadufuo e ije fu uri Jesu auge sana kuri tuakafana kuae, E Ireobo, iviama nane a ma viera fegano kuae.³⁹ Ro Jesu fu una kuae, Na ume igia na ari ruaeva ije na e ige izege bu viera fegano kenoejo ije ke mazie giakiro rue. Na e ije bu Godido vame naebe gavo ije ifejiaga bu gake. Ro e ije bune gavono kuaevu ije buka

una e ni kuzeki igege rekono kuae. ⁴⁰Jesu fu vua ijiege e ije kuaramoga e Feresi gue ijia ireva bu vua ije fie. Ijadufuo bu una Jesu kuae, A ijiege kuaedo nodua nobite no ni kuzekino kuae? ⁴¹Ro Jesu fu una kiae, Ja ni kuzebitie ja ise ije jabe renoedufuo. Rove ja kuae no ni mano kuaevu ijadufuo jaka uria ise renoejono kiae.

Jesu fu e mave-sifibuo samuagiamo ijia mena kuaema ijene

10 ¹Jesu fu vua ije kuariama arema una vua be ijiege mena kuariae. Fu kiae, Naka ma kuariavo fiefo. E ije fu mave-sifi ijiebuo viene bu umateva ije fu aregaro fume mujuebe ijia ajia urana aru vako e ije fuka e inieki ro kuke fu e kaniomo. ²Ro e ije fu viene ma ijia aru vako ije fu ma e mave-sifi samuagiamo. ³Fu vaga e ije viene samuamo fu viene dauvega fu aruna mave-sifi fuone ijiebuo ive ijia kiake bu fiela usiae nuvega fu kaenamiana keke vako. ⁴Fu kaenamia keke ude kiakinu vako bu ijia nuvevo. Ijadufuo maeje bu itire fuone ije bune mukoe fiela vierafei. ⁵Ro bu e be bube nuve vake ijadufuo maeje bu itire fuone bu fievo bakido buka subinae vakono kiae. ⁶Jesu fu vua ijiege mena kuariae rove e ije bu vua ijadufuo maeje buka naebe mukoe fiela vierafei.

Jesu fu e mave-sifi mukore samuagiamo ijene

⁷⁻⁸ Ijadufuo Jesu fu una kiae, Na ma kuariave, naeje na mave-sifi ijiebuo viene ijene. Ro e ije gue bu ude ruaeva ije buka e inieki ro kuke bu e kaniavo. Ro bu e mave-sifi samuagiamo baki ijadufuo mave-sifi ije bu itire buone ije buka naebe fie. ⁹Ro naeje naka viene ma ijene. Ijadufuo erarebe bu none ruakuva bu viene ma ijia aruna are none ijia vake. Bu viene ijia aru vakinu ro una usiaena va ire maeje inoeke. ¹⁰Ro e inieki ije fume iniemekinu ro mave-sifi ije kame arafiriakinu kaniakiro fu ije ruomo. Ro naeje na ruaeva ije na ma karivako ije abe miaga ja abekina jaka maza boeje vame ma ijia ma karivake.

¹¹ Ro naeje naka e mave-sifi mukore samuagiamo ijene ijadufuo nane oemaredo na buefu baroneke. ¹²Ro e ije fu mave-sifi ije fu fuone baki ro bume ebe fuaevega fu samuagiamo ije fube mukoe samuagiak. Ijadufuo fu siroe mave-sifi sakiamo fu ruakuma fuka jumena kovake. Fu kovake siroe fu urana mave-sifi ije sakiana kame arafiriakuva buka subina dabe giegisa vake. ¹³E ije bume e be fuaevega fu mave-sifi samuagiamo ije fu siroe ruakuva fuka kovake. Ijadufuo maeje mave-sifi ije bu fuone bakido fube bu vafaena mukoreigia samuagiak.

¹⁴⁻¹⁵ Ro naeje na e mave-sifi mukore samuagiamo ijene. Ro Asoe none ije na fune vierafei ro nadua na fu nane vierafei. Ijadufuo vame besu ijiege mave-sifi none ije na bune vierafei ro nadua bu nane vierafei. Ijadufuo na oemarekinu buefu baronekilo vierafei. ¹⁶Ro mave-sifi none gue bu dabe giegisana oenoeko ijadufuo bu iviama faere ukua ijia

oenoevo baki. Ijadufuo na vierafe naka kaenamia roga bu besu ireke na nosukua samuagiakega bu itire none ijiaru fieke. ¹⁷Na Asoe none ije fuka na oetuamo ijadufuo maeje naneka kono mave-sifi ijiebuo baronekiro vierafei. Ro na baronekuva rade fu kiega na una urina ijia fivake. ¹⁸Naeje fu erare manima bakido fube na kanie na baroneke. Ro naneka kono vajae none ige abe miaga bu kanie na baroneke. Ijadufuo maeje na daro namo ijadufuo na ijiege re areme rade na daro none ijia una urike. Ro vame ije fune Asoe none ijare kuariema ijadufuo na ijiege rekono kiae.

¹⁹Jesu fu vua ijiege kuariaemoga e Jiusi ije bune dabe bue kuaena ata guegue rei. ²⁰E uruvana bu kuae, E ije fuka kavene ise ijare niromomo ijadufuo fu nigofo iserei. Ijadufuo ja irerefuo jaka vua fuone ije fiekuae vierafevano kuae. ²¹Ro e gue bu kuae, E ijiege kavene ise niroema ije fu izege vua maeje ijieki ije kuaenoekuma baki. Ro kuke fu izege e ni kuzeki ije amaeriaga bu una ni nafaekono kuae.

E Jiusi bu Jesu ijuoneva ijene

²²Areme maza ije ve damo ijia e Jiusi boeje bune una Jerusareme ijia afui. Ijadufuo maeje bu maza ije bu isuibe Godido Are viene bu daoveva ijadufuo iro ina oemarekuae bu ijia afui. ²³Ijadufuo maza ijia Jesu fu Godido Are ijadufuo guove be bu kua Soromonido Banadeno kuavo ijia aruna oenoe. ²⁴Fu ijia oenoenoga e Jiusibuo e mamekanu gue bu gana usiae fu manino ijia ire ufuaenoena areme kuae, A veze mukoreigia kuaruoga no a irerefuo igia oenoeno ijadufuo maeje fiela vierafeke? A vieraferga a E Ije Godi fu kuaga fu ruakono kuaema ijega ni samadukua kuaruoga no fiено kuae?

²⁵⁻²⁶Bu ijiege kuaravoga fu una kiae, Na vua ije nane ude kuariae rove jaka uria naebe ma vierafei. Ro igia fie, ire sumiki ige na renoevo ije na Asoe none ijadufuo daro ijia renoeve. Ijadufuo ja ijia giena na ma vieraferduo rove jaka baki ijadufuo maeje ja ma mave-sifi none baki. ²⁷Na mave-sifi none ije nane vierafe ijadufuo na kiavone bu itire none ije fiela nuvedievo. ²⁸Bu nuvediega na vame ma karivako ije abe miaekina bube oekiro bu ijia ma karivake. Ro mave-sifi none na samugiaivo ije e bino bu umui none ijia faradia turana kaenamia usiae vakuva baki. ²⁹Ijadufuo maeje Asoe none ije fu mave-sifi ije kena vajiemma ije fuka e daroki fure ire boeje asidiae. Ijadufuo fu erare fu asina mave-sifi fuone ije bino umui fuone ijia faradia turana kaenamiana usiae vakuva baki. ³⁰Ijadufuo asoe none ijiaki irere no revo ije fu besuno kiae.

³¹⁻³²Jesu fu ijiege kuariamoga e ije bune una kuke mune tuana kanakuvejoga fu kiae, Na ire sumiki ka mukore boeje na nidua jone ijia renoejo jane gie. Rove ja irere ijare ja fuka isediaga ja na kaniekuae renoejono kiae. ³³Rove bu una kuae, No ire sumiki ije a renoeno ijadufuo kanakuaevejo baki. Ro are koro Godido ive ije dabe buze imo no ijadufuo

kanakuveje. Aeje ame ema no vareki rove aka koro dabe Godi igege renoeno kuae. ³⁴Bu ijiege kuaravoga Jesu fu kiae, Isuibe vua akae jone bu isoeva ijia Godi fu vua be ijiege kuaemo bu isoe, Jaeje ja godino kuae. ³⁵Ro vua ije no vierafega fuka ma fu izege furikuma baki. Ijadufuo Godi fu e ije ja vua fuone maeje fievo ije fu kia, Jaeje ja godino kiae. ³⁶Ro Asoe none na fune vierafe ijadufuo fu kiemo na ume igia ruae. Ro ja irerefuo kie a Godido ive ije dabe buzeivono kieve. Jabite ige na kia nana Godido Farino kiaeja ja ijadufuo ijiege reve. ³⁷Ro ja giega na Asoe none ijadufuo i ije na naebe mevoga ja ijadufuo na naebe ma vieraferkuva ije fune marei. ³⁸Ro ja naebe vua none na kuariavo ije fiela una na ma vieraferkuva nive ire sumiki ige na renoevo ijia giana na ma vieraferfo. Ja ijiege rekuva ja ijia vierafero Asoe none fu nosiki oenoe ro nadua na Asoe none ijiaki oeonoevoro ja ijiege vieraferkono kiae.

³⁹Jesu fu ijiege kuariamoga e ije bune una kuke fare tokuvejoga fune giana bu uniakona vae. ⁴⁰Fune Jerusareme arena una kuke Do Joden tuana gara are ije Joni fu e do ruoriaema ijia finoekiro vae. ⁴¹⁻⁴²Fu ijia vakoga e uruvana bu biona fuone ruakinu kuaevu e Joni fu ire sumiki bino fu naebe renoeno no gae. Rove vua irere boeje fu e garadufuo kuaruema ije fuka mano kuae. Arema e ka uruvana bu ve ijia una fu ma vierafera kuae, E ije fu ma E Ije Godi fu kuae fu ruakono kuaema ijeno kuae.

Rasarasi fu baronema ijene

11 ¹⁻²Ro e Rasarosi bara Matakiro Meribuo maki ije bu are Beteni ijia kari. Ro e Rasarosi fu adame ireobo be abei. Ro bara Meri ije bara ije fu oere udi mukore urimo fu abena Jesudo dia ijia usiana soma areme nigofo u fuone ijia fijaema ijene. ³E Rasarosi adame funeka ma ireobo remo ijadufuo makirafa bu uri vua ijiege Jesu nijae. Bu nijana kumei, E Ireobo kai one a oetuamo ije fuka adame ireobo abemano kumei. ⁴Ijadufuo Jesu fu vua ije fiela uri kuae, E Rasarosi adame fu abeno ije fu baronedufuo. Rove rade fu una uriga e bu ijia Godido daro ije fu izege imeno ije gake. Arema bu ijia una Godi dabe aroekinu ro Fari fuone ige na aroriekono kiae.

⁵⁻⁶Ro Jesu fu Matakiro Meri ro maki buone Rasarosi ije fuka ireobo oetuamo. Ijadufuo fu vua ije Rasarosi fu visimo ije fune fie. Rove fu naebe migegire ijia vae fu arena una kuke mu inokiro ijia fi. ⁷Arema rade fu una e vua fuone fievo ije kiae, Roga una sakae Judia ijia vano kiae. ⁸Jesu fu ijiege kuariamoga bu una gue kuae, E Nijasiamo sakae Judia a una vakuvenco ije e Jiusi ije bu nitua igiefureki mune tuana kanakuvejo a ijadufuo urina igia ruae. Rove aka una ijia vakiro vierafermano kuae. ⁹Bu ijiege kuaravoga fu kiae, Maza ije fuka jiagadogo manino. Ijadufuo erare fu maza ijia oenoeno ije fube arikanake ijadufuo maeje fu maza

ijia oenoeno ijadufuo fune rerekina oenoeno. ¹⁰ Ro fu titutema ijia oenoekuma fuka dia kame ire bino ijia nizukiake. Ijadufuo maeje fu izege mukoreigia rerekina oenoekuma bakino kiae. ¹¹ Jesu fu vua ijiege kuaria areme uri e vua fuone fievo ije kiae, Kai nuvuone Rasarosi fu ninaedo na vakuva na saga fu una urikono kiae. ¹² Rove e vua fuone fievo ije bu una kua, E Ireobo Rasarosi fune ma ninaekuma no vierafe fu una urikono kuae.

¹³ Ro Jesu fu Rasarosi fune ma baronema ijadufuo fu ijiege kuariae. Rove e vua fuone fievo ije bu vierafero fu ma ninaemaro bu ijiege vierafei. ¹⁴ Ijadufuo Jesu fu uri samadukua visu kuariana kiae, E Rasarosi fune ma baronei. ¹⁵ Rove magoe no naebe ijia kariko fu baronema ijadufuo fune marei. Fu ijiege baronekina na va kua fu una uriga ja ijia gana una na ma vierafeke. Ijadufuo ni uriga no fu gake vano kiae. ¹⁶ Areme e Tomasi e ije bu kua Ufake Nafevano kuavo ije fu una kairafa gue kiae, E boege uriga noka E Nijasiamonu vuone gurena vaekina no fuina besu oeno kiae.

Jesu fu ma karivako ijiakiro oena una urivo ijene

¹⁷ Ro e Rasarosi fu baronemo bu abe mako ruiva ije fune mu inokirokiro inokiro furima ijia Jesu fu Beteni ijia kekemoga bu vua ije kuarae. ¹⁸⁻¹⁹ Ro are Beteni fu Jerusareme ivuake ijia ijadufuo e Jiusi uruvana bu bara Matakiro Meri giakuae ijia rueae. Bara inokiro ije bu makibuo baronema ijadufuo buka oefiane abeiva ijadufuo e ije bu bara ije ifefiakuae ijia rueae.

²⁰ Ro bara Mata fuka oefiane ireobo abena fino ijia bu kua Jesu ruomonu kuavo fu fiena fune kekena vame gafia biekiro vae. Ro Meri fu uria are gafia e ijena fi. ²¹ Bara Mata fune kekena va Jesu bienna kuae, E Ireobo a igia fibitie maki none ije fube ijiege baroneke. ²² Rove ivia na vieraferga a fuefuo irere Godi kuarakuma fuka rekono kuae. ²³ Mata fu ijiege kuaramoga Jesu fu kuae, Maki one ije fune baronei rove na vierafe fu una urikono kuae. ²⁴ Rove Mata fu una kuae, Na vierafe maza radekuma ije ruakuma maki none ije fu una urina fivakono kuae.

²⁵ Areme Jesu fu kuke una Mata kuae, Naeje na vame ma karivako ijiakiro oena una urivo ijene. Ijadufuo erare fu na ma vieraferkuma e ije fu baroneke rove kavene ijia fu una ijia fivake. ²⁶ Ro erare fu ni uria fino fu na ma vierafermo e ije fu vame ma karivako ije abeke. Ijadufuo a vua ige na kuaravo ije abe fiena ma vierafermano kuae? ²⁷ Jesu fu ijiege kuaramoga Mata fu kuae, E Ireobo na vieraferga aeje a ma Godido Fari. E ije bu kuae fu ruakono kuaeva ijeno kuae.

Jesu fu nimema ijene

²⁸ Areme bara Mata fune una va are gafia kekena mauike Meri kuae, E ije e nijasiamonu ije fune ruaema gafifureki oefuo kiemono kuae. ²⁹ Fu ijiege

kuaramoga Meri fune migeigire kekena Jesu biekiro vae. ³⁰Ro Jesu fu naebe are ijia kekei ro fume uria vame game Mata fu biema ijia manine. ³¹Ijadufuo Meri fu keke vakoga e Jiusi ije fu samua kariva ije bu gake fu vakoga bu usiae dabe arafiri. Bu vierafero fute game makifuo mako viene ijia nimekiro vakoro bu ijadufuo nuvei.

³²Bara Meri fune vakuma game Jesu fu manino ijia kekena uri augē sana kuae, E Ireobo a igia fibitie maki none fube ijiege baronekono kuae. ³³Rove Jesu fu uri Merikiro e Jiusi ije bu niraevō ije giamo fuka ireobo oefiae. ³⁴Ijadufuo fu urina kiae, Ro ja Rasarosido surive ije ja abe iziebure mako ruivano kiae. Fu ijiege kiamoga bu una kuae, E Ireobo no abe gafi mako ruivano ni ro gano kuae. ³⁵⁻³⁶Rove Jesu fuka ireobo oefiae ijadufuo fu ijia nimenoga e Jiusi ije raea bu ije gae. Areme bu una bue kuae, E gare fuka Rasarosi ireobo oetuamo ijadufuo fu gare nimenō gano kuae. ³⁷Rove e gue bu kuae, Fu ude e ni kuzeki ije amaerimo fu una ni nafae. Ro fu igia fimabitie fu Rasarosi ifejakuma fube baronekono kuae.

Rasarosi fu una urima ijene

³⁸Areme bune Jesu mesirina vakuma mako ije bu Rasarosi nujana mune dabe viene ije bijuiva ijene nijae. Bu nijaevoga fu mako ije gamo fuka una ireobo oefiae. ³⁹Ijadufuo fu kiae, Mune gure ja dabe mako viene gure bijuiva ijene vajamani garege nijano kiae. Rove bara Mata e ije baronema ijadufuo maki ije fu una kuae, E Ireobo e Rasarosi no abe nujaeva ije fune mu inokirokiro inokiro furi. Ijadufuo no mune gure bio nijakuva fuka ise rikono kuae. ⁴⁰Mata fu ijiege kuaramoga Jesu fu una kuae, Mata nabe ude kuarana kua a ma vierafero Godido sanaema ije a gakono kuae?

⁴¹Areme e ije bune uri mune ije vajamanina ikene ijia nijavoga Jesu fune kake saove gufia verikinu baname isoe. Fu baname isoena kuae, Asoeno na one baname isoenvone aka fiemo ijadufuo naka ireobo one oemareve. ⁴²Na maza boeje one baname isoenvone a irere na kuaravo ije a fiemo. Rove iviama na baname ijiege isoega a irere na kuaravo ije fiela rega e ige ireva bu ijia gake. Areme bu ijia vierafero naeje nane ma are kiemo na raea varo bu ijiege vierafero kuae. ⁴³Areme Jesu fune uri e ije bu nujaeva ijene urukeigia kuae, Rasarosi una keke rono kuae! ⁴⁴Jesu fu ijiege kuamoga e ije fu ugone ije bu dabe utina nujaeva ijiakuma una keke ruae. Areme Jesu fu una e ije kiae, Ugone gure iraejaga fu vano kiae.

E ije bu Jesu kanakuae vierafero ijene (Matiu 26:1-5, Maki 14:1-2, Ruki 22:1-2)

⁴⁵Areme e boeje bu Matakiro Meri giakuae raea ije bu Jesu ire sumiki fu rema ije gana buka una fu ma vieraferi. ⁴⁶Rove e gue bu Jesu ire ije fu remo bu gaeva ijene una va e Feresi ije kuariae. ⁴⁷Ijadufuo e

Feresi ijiajiko e mamekanu Godido zinone ifaejevo ije bune una e guena afuina vua kuae. Bu kuae, E ije fuka ire sumiki uruvana renoeno ijadufuo fuje na dabe izege reke? ⁴⁸No ire ije fu renoeno ije no gana arekuva e uruvana buka una fu ma vierafeke. Ro kuke e Romukobuo e mamekanu bu ije giakuva buka uri e boege no kanuokinu Are Ireobo no baname isoeko ije matukono kuae.

⁴⁹Ro maza ije e Kaefasino fu juaevasia ijia fu e Godi zinone ifaejemo ijiebuo e ireobo rei. Ijadufuo fu ijia fido fure urina kiae, E gurie vua ije ja kuaeko ije ja mukoreigia vieraferkinu kuaeko baki. ⁵⁰Ijadufuo igia fie, na vierafe e besu fu e boege nuvuoefuo baronekuma ije fuka mareke. Ro no areke e Romuko bu uri aesakae nuvuone boege kemuokuva fuka marekuma baki. ⁵¹Ro e Kaefasi juaevasia ijia fuje fu e Godido zinone ifaejemo e ireobo be. Ijadufuo vua ije fu Jesu fu e Jiusi ijiebuo baronedufuo kuaema ije fume fure vieraferna kuaema baki ro fune Godire vieraferjamo fu kuae. ⁵²Ijadufuo Jesu fu baronekuma fu e Jiusi ijiaru karauniakuma baki. Ro fu kuke Godido anafa boege erarebe bu dabe giegisana are irore igia karinoeva ijene karauniiana kaenamiaga bu una agane besu reke.

⁵³Ijadufuo e Jiusi ijiebuo e mamekanu ije bu ve ijia vua ije fiena bune zinuevena uri Jesu kanakuae vua kuaena ijunami. ⁵⁴Bu ijiege kuaeva ijadufuo Jesu sakae Judia fu oenoema ije fu naebe una e ijiebuo nidua ijia oeno. Ro are ije fu ijia arena una urina sidove Eferame ae sao ivuake ijia e vua fuone fievo ijena ijia fikiro vae.

⁵⁵Ro maza Fasova ije e Jiusi bu iro ijo ije fune ivuare. Ijadufuo e boege bune are buone ije arena una iro ijadufuo kanafuikuae una Jerusareme ijia besu afui. ⁵⁶Bu ijiege revo ijia bu Godido Are ijia aruna besu afui karina Jesu rerekiru bue kuae, Ja vierafe Jesu fube iro igia ruake fu bakino kuae? ⁵⁷E Feresi ijiajiko e Godido zinone ifaejevo ije bu ijiege rekinu uri e ije kuariana kiae, Erare Jesu fu iviama iziebure fino ije gakuma ni migegire kuaruoga no farena abe tono kiae.

Bara ijare ire ka ma mukore Jesudo reima ijene
(Matiu 26:6-13, Maki 14:3-9)

12 ¹Areme maza ije bu iro Fasova idufuo ije fune ivuarema ijia Jesu fune una ruoma are Beten e Rasarosi fino ijia kekei. Ro e Rasarosi ijeja e ije fu baronemoga Jesu fu kenujamo fu una urima ijene. ²Fu una ijia romoga e ije bu Jesu oemarejana fuefuo ire kanaufui. Ro Rasarosi fu ijia Jesuki fikoga makifuo Mata fu ire afena vajiae. ³Areme Jesu fu ire ije ino ijia bara Meri fu urina do be bu ine nadeno kuavo ijadufuo safine ijia amaeriva fuka udi mukore urimo ije abena ruea. Fu abe kekena Jesudo dia ijia usiaejama areme nigofo u fuone ijare abe fijae. Ro do ije buka moni ma ireobo ijia fuaevejo rove bara ije fu naebe ije

ireobo vierafei. Ro fume dabe una Jesudo dia ije soejae. Fu ijiege remoga ire ijadufuo udi ijare are ije bu karina ire ijo ije funeka irarae.

⁴⁻⁵ Rove e Judasi e Jesudo vua fiemo be (e ije fu maza rade Jesu abe e ani ije miaga bu kanadufuo) ijare uri Meri kuae, A ire udi mukore urimo ije a irerefuo abe usiae? Ire ije fuka mukore ijadufuo abe nijaekina a abe fuaevena moni abe e sinuome baki ijene bino ivajakuma fuka marekono kuae. ⁶ Ro e Judasi vua ije fu ijiege kuaema ije fu e sinuome baki ije mukore ifejamo ijadufuo fu ije kuaema baki. Ro fuje fu e Jesudo vua fievo ijebuo moni ije samuamo ro kuke fuka e inieki ijadufuo fu moni buone gue fure iniemeno ijadufuo fu vua ijiege kuae. ⁷ Rove Jesu fu una kiae, Ja bara ige ire ije fu noefuo remo ije jade vafuvo. Fu maza ije na baronega fu ire ije abe aziriedufuo fu ije iviama mimatame. ⁸ Ro igia fie, e ije sinuome baki ije bu maza boeje jaena igia oenoeko. Rove naeje nabe maza boeje jaena igia oenoekono kiae.

⁹ Areme maza besu ijia e Jiusi ije bu fieke Jesu fu are Beteni ijia oenoeno bu fiena e boeje bune ijia vae. Ro bu Jesu fuosukua gakuae vaeva baki ro bu kuke e Rasarosi e ije fu baronemo Jesu kuamo fu una urima bu ije gakuae ijadufuo vae. ¹⁰ Ijadufuo Jiusi e mamekanu ije bu e Rasarosi duaku kanakuae vierafe ijadufuo bu Jerusareme ijia kari kuaena ijusanami. ¹¹ Ijadufuo maeje fure baronemoga Jesu fu kenujamo fu una urikuma ijia e Jiusi uruvana bu e buone mamekanu ije arena una Jesu ma vierafe ijadufuo bu ijiege rei.

Jesu Jerusareme aru vakoga e boeje bu fu oemarejaeva ijene
(Matiu 21:1-11, Maki 11:1-11, Ruki 19:28-40)

¹² Areme nituame e boeje Jerusareme ijia iro Fasova ije ikuae ruaeva ije bu Jesu fu Jerusareme ruomo ije fie. ¹³ Ijadufuo e boeje bune uri kukuame kiaeje ije mukiena vame ijia Jesu bienumakuae vae. Bu usiae vakinu urukeigia vijekinu kumei, No Godido oemareke. Godire e Isurerokobuo Kini ije fu E Ireobo ijadufuo ive ijia ruomo ijene oemarejakono kumei. ¹⁴⁻¹⁵ Ro Jesu fune izege bu isuibe buki akae ijia isoena kuaeva ijiege fune fanuve doniki ijadufuo ado ijia ajia fina Jerusareme ijia rue. Ro vua ije bu ijiege isoe,

E sidove Zaeoniko ije E Kini jone ije fu fanuve doniki ame iviaeko
ado ijia ajia fina ruomono jade jumevono kuae.

¹⁶ Ro e Jesudo vua fievo ije bu vame binobino e ije bu Jesu fake revo ije bune giae rove buka naebe mukore vierafei. Rove bu vakuma rade e bu Jesu kanavo fu baronemoga Godi kuamo fu una urina sanaema fuone ijia vakoga bu ijia una vierafe. Bu vierafero vua game bu isuibe buki akae ijia isoena kuaeva ije bu fuefuo kuaeva ijadufuo bu fu dabe ijiege revaro bu ijiege vierafei.

¹⁷ Ro kuke e gue bu ni buone ijia irena gakoga Jesu fu Rasarosi mako ijia kuamo fu una urina keke romoga bu gaeva ijiebe vua ijene dabe kuaena

iravae.¹⁸ Ro e gue bu vame sumiki daroki fu rena Rasarosi kenujaema ije fieva ijadufuo bu usiaena vame gafia Jesu biekuae vae.¹⁹ E ije bu ijiege revoga e Feresi gue bu oenoekinu giana kuaevu, Jame garaeje giao. E boeje buneka biona fu ma vieraferkinu dabe arafiri vake. Rove noeje note izereva ijadufuo no bune ijia arena una fu dabe arafiri vakono kuae?

E Gurikiko gue bu Jesu rerei

²⁰ Ro e Gurikiko gue bu Jerusareme ijia maza Fasova bu iro ivo ijia baname isoekuae ruae.²¹ Ijadufuo bu usiaena e Firifi are Besaeda sakae Gareri guove ijia ruaea ijene bie. Bu bierna kuae, E ireobo, no vierafe noka Jesu gakuae vierafervano kuae.²² Bu ijiege kuavoga Firifi fune va Eduru kuana bune buosiki vakuma Jesu fino ijia usiaena vua ijene kuarae.²³ Rove Jesu fu una kiae, Na vierafe maza ije e bu Ema ijiebuo Fari ije abe kurosi kanaga Godi fu kuaga fu una urina sanaema fuone ijia vadufuo ije fune igifureki.²⁴ Ro vua ige naka ma kuariavo fiego, Ire fiene fo besu fu saerena uria ane fuone ijia kirakuma fu izego sakae ijia arina una uruvana tavuakuma baki. Ro fiene fo ije fuka saerena damuko sakae ijia arikuma ijare fuka una uruvana tavuake.²⁵ Ro erare fu ume igia maza boeje una fuone vieraferfema ijiaru oetuakinu kenoekuma rade fu izego una vame ma karivako ije abekuma baki. Ro erare fu ume igia maza boeje una e gue vieraferkinu oetuana ifejianoekuma fu rade vame ma karivako ije abeke.²⁶ Ro e be erare fu noefuo imekiro vieraferfuma nika uri na kenoevo makae none ijia nuvediefo. Ro e ije noefuo imenoevo ije bu are iziebureki na fivo bu naena ijia karike. Ro kuke erarebe bu noefuo imenoevo ije Asoe none fuka bu kame aroriakono kiae.

Jesu fu rade fu baronedufuo ije kuariaema ijene

²⁷ Jesu fu ijiege kuariama areme uri e vua fuone fievo ije kiae, Iviama oe none ige fune ma bijukurie ijadufuo na izego reke? Nabe Asoe none kuako, Ni maza ije na isejavaekuvejo ijia ifejiena kenujieno kuake? Na vierafe no vua ijiege una Asoe none kuarakuva fuka naebe marei. Ijadufuo maeje ume igia na ari rueva ije nane ijiege isejavaekiro ruaevano kiae.²⁸ Ijadufuo fune una Asoefuo baname isoena kuae, Ate Asoeno ni e boeje nijasiaga bu ive one dabe aroeno kuae. Arema e vua fuone fievo bu fieke Godi fu saove gufia ijiege kumei, Na ive none sanaema ije nane isuibe abena e boege nijasiae. Ro iviama na una kuke sanaema none nijasiaga bu gana ive none dabe aroriekono kumei.²⁹ Rove e boeje ivuake ijia ireva bu fiema una bue kuae fu saove kumeno kuae. Ro gue bu kuae fu anerake vua kuaemano kuae.³⁰ Bu dabe ijiege kuaevoga Jesu fu kiae, Vua kave gufia fu kuaemo ja fieva ije fu noefuo kuaema bakiro fu e boege joefuo kuae.³¹ Rove ivia maza ige Godi fu e ume igia oenoeko ijiebuo ise ije ke mazie gia areme fu e ume igadufuo e ireobo Setanido daro ije dabe utaga fu bazuareke.³² Ro maza ije bu na abe nifurikuva na ijia e boeje kaenamiaga bu una none

ruakono kiae. ³³Ro Jesu ijiege fu kuaema ije fu maza ije bu rade fu dabe kurosi kanaga fu baronedufuo fu ijadufuo kuariae.

³⁴Ro e boeje bu una kuae, No akae nuvuone ijia fu kuaema ije fu kuae, E Ije Godi fu kuaga fu ume igia ari ruakono kuaema ije fube baronekiro fu ijia fi vakono kuae. Ro a irerefuo kuae, Ema ijiebuo Fari fu baronega bu abe kafe nifurikono kuaeme? Ro Ema ijiebuo Fari ije a kuaemo ije era fu izieburekino kuae? ³⁵Bu ijiege kuaravoga Jesu fu una kiae, Maza ige sanaema ije fu jiagado nana vakuma baki. Ijadufuo urina maza ige fu sanaema ijia mukoreigia vieraferkinu kenoekina jabe titutema ijia isema renoedufuo. Ijadufuo maeje erare fu titutema ijia oenoeno ije fu izege mukoe rerekiru oenoekuma baki. ³⁶Ijadufuo iviama Kuraesi naeje na sanaema ijene. Ijadufuo jauria ige na jaena oenoejo ijia mukoreigia na ma vieraferkuva ja una sanaema ijadufuo e rekono kiae.

Jesu fu ijiege kuariama areme fune uri bu uniana izege sauimo buka naebe gae. ³⁷Jesu fu ire ma sumiki boeje e Jiusi ijiebuo niome ijia rena nijasiamonu bune giae rove buka naebe fu ma vierafe. ³⁸Ro ije bu ijiege naebe ma vieraferva ije bune izege Asaea e Godido vua vierafera kuariama fu isuibe buki akae ijia isoema ijiakuma riarekiro bu ijiege rei. Ro vua ije fu kuaema ije bu ijiege isoe,

E Ireobo, eranebe vua ige no kuariaeva ije fiena ma vierafei? Ro eranebe E Ireobo ijadufuo daro ije fu imeno ije gaevano kuae?
³⁹⁻⁴⁰Godi fu ijiege kuaema ijadufuo e ije bu naebe fu ma vierafe. Ijadufuo maeje fu kuke kuae,

Godire e ijiebuo niome ije kame kuzejiae ro nigofu buone ije naebe kame samadirejiae. Fu ijiege rejiaekina bube ni nafaena rereke. Ro bube mukoe vierafera una none roga nare amaeriakono kuae.

⁴¹E Asaea vua ije fu ijiege kuaema ije fune ude Jesudo sanaema ije gaema ijadufuo fu vua ijiege kuae.

⁴²Ro ve ijia e Jiusi ijiebuo e mamekanu gue buka una Jesu ma vierafei. Rove bu una e Feresi ije jumeva ijadufuo bu Jesu bu ma vieraferva ije bu naebe abe samadirei. Ijadufuo maeje bu vierafero bu e Feresi ijiebe sosi ije bu vako ije rorukuriakiro bu ijadufuo ijiege rei. ⁴³Ro kuke bu vierafe buka ema ijiebe kame aroriakuae bu ije vierafei. Rove bu Godire kame nidosiana aroriadufuo ije buve isekube vierafei.

Jesudo vua ijiebe e kame mazie giadufuo ijene

⁴⁴Areme Jesu fu uri urukeigia kuariana kiae, Erare fu na ma vierafermo ije fu nanaru vierafermo baki ro fu E Ije na kiemo na ruaeva ijene dua ma vierafermo. ⁴⁵Ro erare fu na giemo ije fune kuke Asoe none ije fu na kiemo na ruaeva ije gamo. ⁴⁶Ro ume igia na ruaeva ije na sanaema ijene abena rueae. Ijadufuo erane fu na ma vierafermo ije fu titutema ijia finoeno baki ro fu sanaema none ijia finoene. ⁴⁷⁻⁴⁸Ro erare fu na

ijuoegafiena vua none maeje naebe fiena iriniemo ije e ije fu fina ise fuone ije mazie giadufuo ije fu ijia fine. Ro na ruaeva ije na e ume igia ise renoejo ije ke mazie giakiro ruaeva baki. Ro name ise buone bu renoejo ijia karauniakiro ruae. Ro vakuma maza radekuma ijia bu vua none maeje boeje na kuariaeva ijiebe una ise jone ja reva ije kame mazie giake. ⁴⁹Ijadufuo maeje name nare none vierafeva ijia kuariavo baki ro na Asoe none fu kiemo na ruaeva ijadufuo vua ijiaru abe kuariave. ⁵⁰Ijadufuo vua fuone ije fu ja ifejiaga ja vame ma karivako ije abeke. Ro vua irere boeje na kuariavo ije nane Asoe none fu kuariemo na ijiaru kuariavono kiae.

Jesu e vua fuone fievo ije dia sojiaema ijene

13 ¹⁻²Areme maza Fasova ije e Jiusi bu iro ivo ije fune ivuare. Ro Jesu fu vierafero maza ijia fu ume ige arena una Asoe fuone ijadufuo vadufuo ije fune ivuaremaro fu ijiege vierafei. Ro maza fuone boege fu ume igia oenoema ijia fuka e fuone ije oetuana ruoma ka maza radekuma ijia kekei.

Ijadufuo Jesu fu mu be e vua fuone fievo ijena fina ire i. Ro Setani fune ude Judasi e Saemoni Isekariotido fari ije biesirikiro fu oe fuone ijia ari. Ijadufuo fu Jesu abe e ani ije miakiro vierafei. ³Ro Jesu fu vierafero ire boege fune Asoe fuone ijare kena daro fuone rotire ijia naejae. Ro kuke fune fure kuamo fu ari ruaedo fune una fu fino ijia vakiro fu ijiege vierafei. ⁴Ijadufuo fune urina ugone be fu ado abiesema ije daove njia areme uri tavero abe ivie fuone ijia kirae. ⁵Areme fune uri disi ijia do jiana e vua fuone fievo ijebuo dia ije sojiamma areme tavero abena fijiae. ⁶Jesu fu ijiege dia sojia ruoma e Saemoni Fita fino ijia kekena dia fuone sojakuvengoa fu kuae, E Ireobo a vierafe a dia none sojiekiro vierafermano kuae?

⁷Rove Jesu fu una kuae, Saemoni a iviama ire ige na revo ije a naebe mukoe vierafe. Rove a sone rade gana vieraferkono kuae. ⁸Fu ijiege kuaramoga Fita fu una kuae, E Ireobo, dia none ige a sojiekuvenco ije naka isediemono kuae. Ro Jesu fu una kuae, Na dia one ije naebe soejakuva ije aeje a e vua none fiemo bakino kuae. ⁹Jesu fu ijiege Saemoni Fita kuaramoga fu kuae, E Ireobo a dia none sojiekuma ni umui ro nigofo none ijikuma sojieno kuae. ¹⁰Ro Jesu fu una kuae, Erare fune ude do foteke ruema ije funeka marei. Ijadufuo maeje fu vajae fuone umine ije fune soema ijadufuo fube una do rueke. Ro fu do ruekiro vieraferkuma fume dia ijiaru soke. Ro igia fie, e gure ja kariva ije ja fune maradiae rove e besukua fuka uria umigino kiae. ¹¹Ijadufuo maeje Jesu fu erare rade fu abena una e ani ije miaga bu kanadufuo ije fune vierafei. Ijadufuo fu ije kiae, E boeje ja fune maradiae ro e besu fuka umigino kiae.

¹²Ijiege rena Jesu fune e vua fuone fievo ije dia sojiamma furi. Areme fune ugone fuone abe una abiesena fune una ari fime kiae, Ja iviama ire gure na reva ije jabe gienia vierafei? ¹³Ja na kie, E Nijasiamo ro E

Ireobono kievo ije na vierafe fune mare ijadufuo maeje naeje na e ijene. ¹⁴⁻¹⁵ Na E Ireobo ro E Nijasiamo jone rove naka uri dia jone ije sojiae. Ijadufuo iviama ire gure na reva ije na rena ja nijasiae. Ijadufuo jadua ijiege kojo kena una e isesina rena uri e gue oetuakinu ifejiafo. ¹⁶ Ro vua ige naka ma kuariavo fiego. E ije fu e ireobo befu imeno ije fu izege una e ireobo fuone ije asina fure e ireobo reke? Ro kuke e ije fu figa e kiaga bu vua abe va e gue kuariavo ije bu izege una e ireobo buone ije asina bure e ireobo reke? ¹⁷ Ro ja urina vua ige na kuariavo ja fieva ije abe mimatana kenoekuva jaka oemarekinu karike.

¹⁸ Ro vua ige na kuariavo ije na e boeje jare fiekiro na ije kuariavo baki. Rove naneuria ijia oe jone boeje nane gia furiva ijadufuo na ije ja kei. Rove na vierafe vua ije bu isuive buki akae ijia isoena kuae,

E ije fu nosiki ire inoeno ijare una dakude na ziegafiemano kuaema ije fuka riarekiro na ije kuariave. ¹⁹ Na vierafe naka uria igia kuariaga ja fiela vieraferkina rade ire ije fu rega ja ijia gana vierafero naeje na E Ije bu kuae fu ruakono kuaema ijero ja ijiege vieraferke. ²⁰ Ro vua ige naka ma kuariave. Erare e ije na kiaga bu vua none maeje abe kuarianoeko ije oemarekinu kaenamiaivo ije bune nadua mesirieve. Ro kuke e ije bu na oemarekinu mesirieve ije bune Asoe none ije fu na kiemo na ruaeva ije duaku mesirivono kiae.

Jesu fu irerebe rade fuone redufuo ije kuariaema ijene
(Matiu 26:20-25, Maki 14:17-21, Ruki 22:21-23)

²¹ Jesu fu vua ijiege fina kuariagake funeka oe bijukurakuvene. Ijadufuo fuka uri samadukua visuna kuariana kiae, Naka ma kuariave e gure ja kariva ijia e besu fuka na dabe una e ani ije miakono kiae. ²² Fu ijiege kuariamoga e vua fuone fievo bu vua ije fiela vieraferga fuka naebe marei. Bu Jesu vua ije fu erado kuaemo ije buka naebe vierafer ijadufuo bu una bue ganami. ²³ Ro e vua fuone fiemo be fu mukoe oetuamo ije fu Jesu ivuake ijia fine. ²⁴ Ijadufuo e Saemoni Fita fu uri e ije ni kojamo fu gamo fu kuae, Kame are ijia kuaga fu erado kuaevoga kuaro no fieno kuae. ²⁵ Fu ijiege kuamoga e ije fu Jesuki ivuake ijia fino ije fune tuana Jesudo vakinu kuae, E Ireobo vua ije a kuaemo ije a erado kuaemono kuae?

²⁶ Ro Jesu fu una kuae, A e ije na burete abena vuaeni guria abiesena abe e ije maga a ijia gana vieraferkono kuae. Ijadufuo fune urina burete abena vuaeni ijia abiesena abe e Judasi Saemoni Isikariotido fari ijene mae. ²⁷ Jesu fu burete ije abena e Judasi mamogana Setani fune migegire Judasido oe ijia vua ise vieraferjae. Areme Jesu fu uri Judasi kuae, Ni migegire irere a vieraferma ije reno kuae. ²⁸ Ro e boeje fata ijia afuina kari ire ije bu Jesu fu irerefuo vua ijiege Judasi kuaraema ije buka naebe vierafei. ²⁹ Ro e Judasi moni buone ije fure samuagiamo ijadufuo

bu vierafero fute kuaga fu moni ijia bino kena una va ire bino fuaevekiro kuaemaro bu ijiege vierafei. Ro be fute kuaga fu moni ijia bino kena una va e sinuome baki ije vajakiro kuaraema ro bu ijiege vierafei.³⁰ Ijadufuo Jesu fune burete ubine ije abena e Judasi mamo fu abe ikinu keke vae. Ro maza ije fune ve mukuveno ijia fu ijiege rei.

³¹ E Judasi fune vakoga Jesu fu urina kiae, Maza ije e bu Ema ijiebuo Fari ijadufuo sanaema ije gadufuo ije fune ruae. Ijadufuo e bu na dabe vame binobino revo ijia e boeje bu Godido sanaema ije gake. ³² Ro Godi fu vierafe fuka migegire Fari fuone ige na mesiri una sanaema fuone ijia vakiro vierafe. ³³ Ijadufuo uviarafano, na vierafe nabe una maza uruke jaena igia oenoek. Ro ja na naebe giekova jaka uri rerieke. Rove na ude Jiusi e mamekanu na kuariaeva ijiege na kuke ja kiave, Ja are na vako ije jabe ijia vuake. ³⁴ Ijadufuo na akae iviaeko be kuariako ni fiego. Ro akae iviaeko ijeja nika jone oetuanamifo. Ni izege nare ja oetuanana ruaeva ijiege una jone oetuanamifo. ³⁵ Ja jone ijiege oetuanamikuva e ije bu ijia giana vierafero jaeje jane ma e vua none fievo ijero bu ijiege vierafero kiae.

Jesu fu Fitare rade fedufuo kuaraema ijene
(Matiu 26:31-35, Maki 14:27-31, Ruki 22:31-34)

³⁶ Jesu fu ijiege kuaramoga e Saemoni Fita fu una kuae, E Ireobo a are izia vakiro kuaemono kuae? Ro Jesu fu una kuae, A iviama are na vako ije abe ijia vuake. Ro a sone vakuma rade a ijia nuvedie vuakono kuae. ³⁷ Ro Saemoni Fita fu una kuae, E Ireobo na iviama naneka oefuo baronena are a vakuveno ijia vuakiro vierafei. Ro na irerefuo arekono kuae? ³⁸ Saemoni Fita fu ijiege kuaramoga Jesu fu una kuae, A vierafe ane manido a noeefuo baroneke? Na vua ige naka ma kuaravo fiene. A ivia muge kukoruko fu naebe kumema ijia e bu noesina kuakuva aka maza inokubeke feke. A fena kiako, Na e ije ja kuaevi ije naka naebe vierafero vano kiakono kuae.

Jesu fu vame ije Godido vako ijene

14 ¹ Areme Jesu fu una kiae, Jade uruvana vieraferokin oefiane abekiro nime Godi ma vieraferokin ro nadua ma vierafero. ² Ro are gufe asoe none fu fino ije fuka guove boeje. Ijadufuo na vakuva naka are jone bino amaeriake. Ro na Asoe none ijadufuo are guove ije fu naebe ireobobitie na vua ije nabe kuariake. Rove are ije fuka ma ireobo ijadufuo na ije kuariave. ³ Na ude ajia va are jone amaeri areme na una ro kaenamia na fivo ijia vaga jadua ja naena ijia karike. ⁴ Ro are ije na vako ijadufuo vame ije Jane vierafero ja ijia nuvedieno vuakono kiae.

⁵ Jesu fu ijiege kuariamoga e Tomasi fu una kuae, E Ireobo no are a vakuveno ije noka naebe vierafei. Ijadufuo no izege vame ije mukoe

vierafena ijia nuveda vuakono kuae. ⁶Rove Jesu fu una kuae, Tomasi, naeje na vame maeje ro vua maeje ro ma karivako ijene. Ijadufuo vame maeje Asoe none fu fino ijia vadufuo ije fune vame besu ijiaru. Ro vame ije jane duvado none ijia vake. ⁷Ro ja na mukoe giena vierafekuva ja kuke Asoe none ije gana vierafeke. Rove iviama ja fuje jane vierafeva ijadufuo Jane gaevano kiae.

⁸Ijadufuo e Firifi fu uri kuae, E Ireobo no vierafega aka Asoe one ije nijasuoga no ga fu oemaduono kuae. ⁹Rove Jesu fu una kuae, Firifi! Na maza boeje naka jaena oenoe rove jaka uria na naebe mukoreigia giena vierafei. Naka ma kuariave, erare fune na giema ije fu Asoe none fune gae. Ro ja irerefuo kie, Ni Asoe one nijasuo no gano kieve? ¹⁰Firifi, a na giemo ijadufuo ni ma vierafero naeje na maza boeje Asoe none ijiaki finoeve. Ro Asoe none fu nosiki finoenoro ijiege vierafeno kuae. Areme Jesu fu una e vua fuone fievo boeje kiae, Vua boeje na kuariavo ije name nare kuariavo baki. Ro vua ije fu Asoe none ijadufuo vua. Ijadufuo i irere na menojo ije fu Asoe none ije fu nosiki fino ijare i fuone ije mene.

¹¹Ro igia fie, naeje na Asoe none ijiaki finoe ro fuje fu nosiki finoeni ijadufuo ja ije ma vierafedufuo. Ro ja naebe na ma vierafekuva ni i fuone na menojo ijia giena una na ma vierafe. ¹²Na vua ige naka ma kuariave, erare na ma vierafekuma e ije fudua fu i ige na menojo ije menoike. Ro rade na una Asoe none fino ijia vakuva e ije bu iviama i isesina menojo ije buka i mamekanu bino meke. ¹³⁻¹⁴Ro ja ire binofuo ive none ijia kiekova naka ifejiake. Na ijiege ifejiaga e bu ijia giana una Asoe none dabe aroeke.

Godido Kavene Akae fu abe nujaeuoko kuema ijene

¹⁵Ro ja na mukoe oetuakuva ja vua none boeje mukoe fiena iriniana renoeke. ¹⁶Ja ijiege renoekova na Asoe none kuaga fu e ije ja ifejiadufuo ije abe nujaesiaga fu jaena maza boeje fi vake. ¹⁷Ro e ijeja Godido Kavene Akae maeje ijene. Ro e ume ige ise renoejo ije bu Kavene Akae ije abekova baki. Ijadufuo maeje fuje bu gavo baki ro kuke bu fu mukoe vierafevo baki. Rove jaeje jane fu mukoe vierafe ijadufuo maeje fu oe jone ijia fikinu ro maza boeje jaena oenoeno.

¹⁸Ro na ja nabe uniako vaga ja josukua karinoeke ro na una ja kariva ijia ruake. ¹⁹E ume ige ise renoejo ije bu maza sibaneke ijiaru na bube gieke ro jaeje ja una na gieke. Ro naeje na baronena una urina ijia fivako ijadufuo jadua ja ijia karivake. ²⁰Ijadufuo maza ije abekuma ja ijia giena vierafero naeje na Asoe none ijiaki finoe. Ro jaeje ja naena karinoe ro nana oe jone ijia finoevoru ja ijiege vierafeke. ²¹Ro erare bu vua none boeje na kuariavo ije mukoe fiena iriniavo e ije bu na oetuavo. Ro e ije na mukoe oetuavo ije Asoe none fu e ije mukoe oetuake. Ro nadua na e ije mukoe oetuakinuro naka kono abe e besubesu nijasiaga bu na e izeki ije bu giena vierafekono kiae.

²² Jesu fu vua ije kuae furinoga e Judasi e ije fu Jesu abena e Jiusi miaema ije bakiro e Judasi be ijare urina Jesu kuae, E Ireobo a izeredo a una no nuvuosukua nijasuoga no a e izeki ije gana vierafekiro e ije ise renoejo ije a arekono kuae? ²³ Fu ijiege kuamoga Jesu fu una kuae, Ro erare bu na oetuakuva bu vua none ije mukoe fiena iriniaga Asoe none fu e ije oetuake. Ro kuke nadua na Asoe none iijiaki maza boeje oe buone ijia karinoeke. ²⁴ Ro erarebe bu naebe na oetuakuva bube vua none ije mukoe fiena iriniake. Ro vua ije ja fieko na kuariaeva ije fu vua none baki. Ro vua boeje bu Asoe none gufe fu kiemo na ruaeva ijadufuo vua.

²⁵ Na vua boeje na uria ige na jaena ume igia oenoeko na ijia kuariave. ²⁶ Ro e ije fu ja ifejiadufuo ije Godido Kavene Akae ijene. Ro ije fu Asoe none ijare ive none ijia kuaga fu ari jone ruake. Fure arina ire boeje nijasiaga ja vua boeje na kuariaeva ije jabe totekiro ja mukoe vieraфenoeke.

²⁷ Nane vakuve ijadufuo na daro miaga ja oemarekinu kafaena karinoeke. Ro vame ijiege kafaena karivo ijieki be ja ume igia gakuva baki. Ijadufuo jade uruvana oefiane abekinu jumevo. ²⁸ Ro vua ije na vaekiro una ruadufuo ije name kuariavo Jane fie. Ro ja na mukoe oetuakuva jaka none oemareke na una Asoe none fu fino ijia vase. Ijadufuo maeje Asoe none fuka e anuigi fure na asidie. ²⁹ Na vua boeje na ude kuariaekina ire maeje bu rade rega ja giana ma vieraфeke. ³⁰⁻³¹ Na vieraфe nabe jaena uruvana fina vua kuariake. Ijadufuo maeje Setani e ije ume ige samuamo ije fune ruome. Setani fu daro none fu asima baki. Rove naka Asoe irere fu kuariemo na ije irinana renoeve. Na ijiege renoega e ume ige bu ijia gienaa vieraфero naka Asoe none oetuavoro bu ijiege vieraфekono kiae. Jesu fu vua ijiege kuaria areme kiae, Ni uriga no are ige arena vano kiae.

Jesu fu ine ove ijiekino kuaema ijene

15 ¹ Jesu fu e fuone vua fievo ije kiae, Naeje na ine ove maeje ro Asoe none fu e juare ije samuamo ijene. ² Fu giaga ine kiae none bino bu naebe fo kiraевo ije fu kaniatura koreke. Ro kiaeje bu fo kiravo ije fu mukoreigia amaeriaga bu fo uruvana kiravo. ³ Ro vua none na kuariaeva ije fune ise jone ije fikorejiamo Jane una maradiae. ⁴ Ro izege na oe jone ijia finoeko ijiege ni jadua maza boeje naena besu karinoefo. Ro igia fie, ine kiaeje fu izege korofuo fo kirakuma baki ro fu ove fuone ijia bijakuma fu fo kirake. Ijadufuo ja vame besu ijiege naebe maza boeje naena karinoekuva jabe fo kirake.

⁵ Naeje na ine ove ijene ro jaeje ja ine kiaeje none ijene. Ijadufuo erarebe bu maza boeje naena oenoe ro na buina oe buone ijia finoekuva e ije bu ine ije fo boeje kiravo ijene. Ro na naebe jaena finoekuva ja izege fo kirakuva baki. ⁶ Ro eranebe bu naebe naena karinoekuva e ije fu ine kiaeje bu ufunaa korega bu miane naovo ijiege bu kame are ise miane naeno ijia korega bu ijia naona furike. ⁷ Ro ja maza boeje naena karinoekinu ro vua none ije iriniakuva ja ire bino vieraфena Godi kuakuva fuka ifejiake.

⁸ Ro eranebe ja e vua none fievo rena uri oetuanamikinu vame maeje renoekuva ja ine ije fu fo uruvana kiramo ijiege reke. Ja vame maeje ijiege renoevo ijia e bu Asoe none ijadufuo ive ije dabe nidoekinu aroeke. ⁹ Na Asoe none fuka na oetuamo ijadufuo nadua na vame besu ijiege ja oetuavo. Ijadufuo maza boeje janika na oetuakinu vua none iriniafo. ¹⁰ Na Asoe none ijadufuo vua ije mukoe fiena irinavo ijadufuo na fuone oetuamo ijia maza boeje bijuana finoeko. Ijadufuo jadua ja vua none mukoe fiena iriniekuva ja none oetuamo ijia bijuana karivake.

¹¹ Na vua ijiege kuariaekina ja maza boeje oemarevo none ije abega fu oe jone ijia nana iraraeke. ¹² Ijadufuo vua none ige na kuariavo ije fiena renoevo. Janika izege na ja oetuavo ijiege maza boeje una jone oetuanamifo. ¹³ Ro igia fie, e be erare fu kairafa fuone ijiebuo baronekuma ije fuone fu e oetuamo ije fuka ma ireobo. ¹⁴ Ja irere na kuariavo ijia renoekuva ije jaka ma kairafa none. ¹⁵ Ro na iviama ja nabe kiako ja e none i mejono kiake. Ijadufuo maeje e ije fu e befu imeno ije fu e ireobo fuone irere fu vierafera renoeno ije fuka naebe vierafei. Rove naeje na vua irere boeje Asoe none fu kuariema ije nane ja kuaria furi. Ijadufuo nabe kiako ja e none imejono kiake ro na kairafa noneno kiake. ¹⁶ Ro jaeje jame jare none ruaeva baki ro na nare ja kevo ja ruea. Ijadufuo na vierafera ja va maza boeje ive none ijia vame maeje ijiaru kenoedufuo. Ja ijiege renoekuva ja ire binofuo ive none ijia Asoe none kuakuva fuka ifejiake. ¹⁷ Ro na una kuke kia nika jone mukoreigia oetuanamikinu karinoefo.

E ume igia ise renoevo bu e Jesudo vua fievo ije nibijiavo ijene

¹⁸ Ro ja e ume igia ise renoevo bu ja ziegafiana nibijiakuva ni vierafero bune ude na ziegafie ro rade bu ja ziegafiaevaro ijiege vierafero. ¹⁹ Ja e ume igia ise renoejo ijiebuo vame bu kenoevo ijia nuvediana buenina kenoekuva buka una ja oetuadufuo. Rove ja vame buone ije ja ijia nuvediavo baki. Jaeje na nare kevo ja una vame none maeje ijia nuvedieve. Ijadufuo e ume igia ise renoejo ije buka ja ziegafiake. ²⁰ Ro ni vua ije na ude kuariaeva ije vierafero. E ije e befu imeno ije fube una e fuone ireobo ije asina e ireobo reke. Ijadufuo e buka izege na bu dabe arafirievu ijiege bu kuke rade ja kame arafiriak. Ro bu vua none ije mukoe fiena iriniabitie bu kuke vua jone mukoe fiena iriniak. ²¹ Buka ire ise boeje jone reke ijadufuo maeje jaja e none ro kuke bu e ije fu na kiemo na igia ari ruaeva ije bu naebe mukoe vierafei. ²² Ro na naebe ume igia arina vua none ige abe kuariaebitie e ise renoejo ije bu izege ise buone ije mukoreigia giana vieraferuva baki. Rove na vame ma ro ise ije nane kuariae. Ijadufuo bu izege una kuaeko no ise ije no naebe mukoe giaeava ijadufuo no bigiakre revano kuaekuva baki. ²³ Ro e ije erare na ziegafimo ije fune kuke Asoe none ijedua ziegafame. ²⁴ Ro na naebe ume igia ire sumiki bino e bu revo baki ije

renoevabitie e ije bube ise bu renoeva ijadufuo isejavaeke. Rove nane buina oenoekinu ire sumiki boeje renoekoga bu ijia una ise buone ije korubuo ganami. Ijadufuo buka una na abero Asoe none ije fuosiki no ziegafue. ²⁵Bu vame ijiege none revo ijia vua ije bu isuibe buki akae ijia isoева ije fune riarei. Ro vua ije bu kuaeva ije bu ijiege isoe, Bu vua ma ijadufuo na ziegafieva bakino kuae.

²⁶Ro e ije fu ja ifejiadufuo ije fu Asoe none fino ijia ruake. Ro e ije fu Kavene Akae ije fu Godido maeje abe samadirenoeno ijene. Nare Asoe none kuaga fu Kavene Akae ije abena ja nujajake. Ro fure vua none ije abena una ja kuariake. ²⁷Areme ja uri vua none abena una e gue kuariake ijadufuo maeje jane iko zinume ijia naena oenoekinu vame none boeje jane gia furi.

16 ¹Ro naeje nane vakuve ijadufuo na vua ige kuariaga ja uri griesana ma vieraferkukeno. ²Ro ja e Jiusibuo are bu afuina vua kuaovo ijia aru vakuva buka kuriaerena rorukuriake. Ro va maza abekuma bu e ige ja oenoejo ijia bino kaniaga ja oeke. Ro bu ijiege rekuva bu vierafero bune Godido i mevoro bu ijiege vieraferke. ³Bu Asoe none ijiaki no bu naebe ma vierafero ijadufuo bu ire ise ijieki jone reke. ⁴Na vua ijiege kuariakina bu oenoene ire ise bino jone rekuva ja vierafero vua ije nane kuariaevaro ja ijiege vieraferke.

Kavene Akae i fu meno ijene

Na iko zinume ijia vua ijieki bino na naebe kuariae ijadufuo maeje na uria igia jaena besu oenoeve. ⁵Ro iviama nane una e ije fu kiemo na ruaeva ijadufuo vakuve ro ja naebe na kie, A izia vakuveno kieve? ⁶Rove ja iviama vua ige na kuariavo ja fieva ijadufuo jaka oefiadiame. ⁷Ro naka ma kuariave, na magoe joefuo vake. Ijadufuo maeje na vakuva nare Godido Kavene ije kuaga fu jone ruake. Ro na naebe vakuva E Ije fu ja ifejiadufuo ije fube ruake.

⁸Ro Kavene Akae fu ruakuma fure e ume igiebuo ise bu renoejo ije samadukua nijasiaga bu korubuo giake. Ro kuke fure vame maeje nijasiaga bu ijia kenoike. Ro fure maza ije Godi fu una e ume igia oenoeko ijiebuo ise ke mazie giadufuo ije kuariaga bu vieraferke. ⁹Ro ise buone ijeja bu na ma vierafero baki. ¹⁰Ro kuke maturaedufuo ijeja, naeje na maturaeva ijadufuo nane una Asoe none fu fino ijia vake. Ijadufuo na vakuva ja una na giekova baki. ¹¹Ro kuke Kavene Akae fu ruakuma fure e ume igiebuo ise ije kena mazie giake. Ijadufuo maeje Godi fune ude Setani e ije ume ige samuamo ijadufuo ise ije dabe mazie gae.

¹²Ro igia fie, naka vua boeje kuariakiro vierafer rove fuka uruvanado ja izege mukoreigia fiena vieraferkuva baki. ¹³Rove Kavene Akae ije vua ma ijiaru vieraferkuva fu ruakuma fure ja samuagiakinu ifejiaga ja Godido vame maeje ijiaru nuve vake. Ro fube vua fuone fu vierafermo ije kuariake

ro vua boeje fuka Godi fu kuaramo ijiaru ja kuariake. Ro kuke fure irere bu rade rekuvejo ije kuariaga ja fiela vierafeke. ¹⁴Kavene Akae ije fu vua boeje na kuaravo ije abe ja kuariaga e boeje bu none sanaema ije dabe aroekinu oemarenoeke. ¹⁵Ro ire boeje Asoe none fu samuagiakinu ro renoeno ije buka none. Ijadufuo Kavene Akae fu ruakuma fu vua none boeje binodua kuke kuariakono kiae.

Oemarekinu ro oefiane abeveo ijene

¹⁶Jesu fu ijiege kuariama areme uri kiae, Ja maza isekube furikuma rade jabe na gieke. Ro kuke ja maza isekube furikuma ja ijia sone una na giekono kiae. ¹⁷Jesu fu ijiege kuariamoga e gue vua fuone fievo ije bu una bue kuae, Vua ije fu irerefuo ijiege kuaruome? Fu kuo ja maza isekube furikuma jabe una na gieke. Ro maza isekube furikuma no ijia sone una fu gakono kue. Ro kuke fu irerefuo kuo, Nane una Asoe none ijadufuo vakono kuemano kuae. ¹⁸E vua fuone fievo ije bu kuae, Vua ije fu kuae, maza isekube furiko kuema ije fu irerefuo ijiege kuarue? No vua ije fu kuaema ije noka naebe fievano kuae.

¹⁹Rove Jesu fune uria ijia giaga bu vua ijadufuo una duna kuakuae vierafevaga fune giae. Ijadufuo fu una kiae, Na giaga jaka vua ije na kia ja maza isekube jabe na gieke ro maza isekube furikuma ja una na giekono kiaevo ijadufuo dabe una joe saguve. ²⁰Naka ma kuariave, Rade jaka niraekinu oefiane abeke. Rove e ume igia ise renoejo ije buka oemareke. Ro maza rade oefiane jone fu bakirega jaka una oemareke. ²¹Ro na vua be bijana kuariako ni fiefo. Bara be fu ame bietekuveno ije fuka vajae fiane abeke. Ro fune vakuma ame bietemo ije vajae fiane fuone fune furima ijadufuo fube una uruvana vierafeke. Ro fuka ireobo oemareke ijadufuo maeje fu ame fuone ije fune biete. ²²Ijadufuo jadua ja vame besu ijiege redufuo. Iviamaka jaka oefiane abeve rove rade na una ja biediakuva jaka oemaredufuo. Ro ije ja ijiege oemarevo ije fu erare bijukuriakuma baki ro fune maza boeje ijiege navake.

²³Ro ja vakuma maza ije na kuariavo ije ruakuma ja una ire binofuo na kiekuva baki. Ro igia fie, ja rade ire binofuo Asoe none ije ive none ijia kuakuva fuka vajiale. ²⁴Ja isuibe ja naebe ire binofuo Asoe none ije ive none ijia kuarae. Rove iviamaka ja ive none ijia kuakuva fuka ifejiaga ja maza boeje oemarekinu karivake.

Jesu fu irere rade redufuo ije kuariaema ijene

²⁵Ro vua boeje na kuariaeva ije na ke mena kuariae. Ro vakuma maza abekuma nabe una vua bino ijiege mena kuariake. Ro naka Asoe none ijadufuo fuesina samadukua visuna kuariaga ja fieke. ²⁶Ro maza ijia nabe nare maza boeje una joefuo Asoe none ije ire binofuo kuarake. Ro janeka kojo ive none ijia kuaraga fu ifejiake. ²⁷Asoe none fuka ja mukoreigia

oetuamo ijadufuo maeje jaka na oetuakinu ma vierafero naeje na Godido Fari fure kiemo na ari ruaevaro ja ijiege vierafei. ²⁸Naeje na Asoe none fu fino ijia arina ume igia ruae. Ro iviama nane ume ige arena una Asoe none ijadufuo vakono kiae.

²⁹⁻³⁰Areme e vua fuone fievo ije bu urina Jesu kuae, E Ireobo iviama vua a kuaruomo ije no gaga a naebe abe mena kuaruome. Ro vua boeje aka ma samadukua visu kuaruome. Ijadufuo fu erare una a duna binobino kuakuma baki. Ro iviama no gaga a ire boeje aneka vierafei ro kuke a ema irere bu vierafevo ije ane ude giana vieraefemo. Ijadufuo no ma vieraferga aeje ane ma Godido ruae mano kuae.

³¹Bu ijiege kuaravoga Jesu fu kiae, Iviama jabe ma vierafei? ³²Maza ije fu ruome rove fune iviama igigureki. Ijadufuo ja subinae are jone ijia giegisa vaga na ja dabe ijia abuozie vake. Rove naeje na nosukua baki ijadufuo maeje na Asoe none ijiaki oenoeve. ³³Na vua ijiege kuariaekina vua ije fu ifejiaga ja oemarekinu dazena karinoeke. Ijadufuo maeje e ume igia ise renoejo ije buka ire ise binobino jone rega jaka isejavaeke. Rove igia fie, ume igadufuo daro ije nane nare asi ijadufuo maeje daro none ije fuka ma ireobo. Ijadufuo jade mamoe kiro nika griesano kiae.

Jesu fu e vua fuone fievo ijiebuo baname isoema ijene

17 ¹Jesu fu vua ijiege kuariama furi areme fu uri kake kave gufia rerekiru baname ijiege isoe. Fu kuae, Asoeno mazani ije na barone areme una uridufuo ije fune ruae. Ijadufuo ni e boeje ijiebuo nidua ijia na aroriena nidosiekina na ive one dabe arorakinu nidosane. ²Are na daro miema ijadufuo na ume igia e boeje samuagiave. Ro e ije a kena na vajiemia ije nare vame ma karivadufuo ije abena miake. ³Ro vame izege ma karivako ije abedufuo ijeja, e buka vierafero aeje aka Godi maeje besu ro Jesu Kuraesi naeje are kiemo na ruae. Ijadufuo bu osiki no ijiege ma vieraferkuva bu vame ma karivako ije abeke. ⁴Na one sanaema ije nane abena e ume igia kariva ije nijasiae ro kuke i one boeje a kiemo na ruaeava ije nane me furi. ⁵O Asoeno, ni iviama sanaema one ije abe miene. Ni sanaema one ije a isuibe aesakae ige naebe amaerima ijia na osiki besu fivo a miemo ijene abe una miene.

⁶⁻⁷Na e ije are ume igia kena una na vajiemia ije oesina nane kuariae. E ije bu e one are kena una na vajie. Bu vua one buka mukoe fiena irinavo ijadufuo iviama bu ma vieraferga ire boeje na renoejo ije fune one ruomoro bu ijiege vieraferve. ⁸Ro vua one a kuariema ije nane abe bu kuariavoga bune mukoe fie. Ijadufuo bu ma vieraferga naeje are kiemo na ume igia ari ruae.

⁹Ijadufuo iviama na buefuo baname isoeve. Na e boeje ume igia ise renoejo ijiebuo baname isoeve baki. Ro name e ije are kena vajiemia na ijiebuo baname isoeve. ¹⁰Ijadufuo maeje e none ije bu e one ro e one ije

bu e none. Ro e none boeje na kaenamiaeava ije bu ive none dabe arorieve. ¹¹Ro ivia nane aesakae ige arena una one vuake ro e none vua fievo ije bu ume igia karike. Ijadufuo Asoeno E Akae, ni ive one a abena na miema ijadufuo daro ijia bu samuagiane. A ijiege samuagiaga bu izeve nore osiki besu karivo ijiege bu agane besu rena karine. ¹²Na ume ige na buina oenoeva ije nane ive one a abe miema ijadufuo daro ijia samuagiae. Ijadufuo e besu fu naebe a ijuemana vae rove fune e besukua ijare a ijuemana una fuone vieraferma ijia vae. Ijadufuo maeje fu vua one bu buki acae ijia isoena kuaeva ije fuka riarekiro fu ijiege rei. ¹³Ro iviama nane una one vuake ijadufuo na uria ige na buina ume igia oenojo ijia na vua boeje kuariake. Na ijiege kuariaekina oemarevo none ije fube furikiro fuka maza boeje oe buone ijia nana iraraeke. ¹⁴Ro vua one ije nane abena bu kuariavoga bu abe e boeje kuariakinu mimatana nijasiae. Rove e ume igia kariva ijiebe bu ziegafiana vua buone bu naebe mukoe fie. Ijadufuo maeje na e vua none fievo ijena no e ume igeko baki.

¹⁵Ro baname ige na buefuo isoevo ije na a kuaga a bu kaenamiaga bu aesakae ige arena vuakiro na ijene isoevo baki. Ro name a kuaga a bu mukoreigia samuagiakina kavene ise Setani fube bu biesiriana kaenamia una vame ise ijia vake. ¹⁶Ro naeje nana e ume igeko baki ijadufuo budua bu e ume igeko baki. ¹⁷Ro vua one ije fuka ma ijiaru ijadufuo ni vame one maeje nijasiaga bu ijia nuvena e acae rena karinoedufuo. ¹⁸A na kiemoga na ume igia ruaeva ijiege na kuke bu kiaga bu vua one abena ume igia e kuarianoike. ¹⁹Na kono nane abena jinone ijiege foteke a mae ijadufuo budua buka vame besu ijiege e acae reke.

²⁰Ro na buosukua buefuo baname isoevo baki ro na kuke e ije bu vua buone mukoe fiena una na ma vierafermo ijiebuo baname isoeve. ²¹Na baname isoega bu agane besu rena karinoike. O Asoeno izeve na oe one ijia firo a oe none ijia fino ijiege na vierafermo buka oe nuvuone ijia karike. A ijiege rekuma e ume igia kariva ije bu vierafermo naeje na ma are kiemo na ume igia ruaevapo bu ijiege vierafermo. ²²Na sanaema one ije a abe miema ije nane abe bu miae. Na abe miaekina bu izeve no osiki besu kariva ijiege buka besu karinoike. ²³Ro na vierafermo buka izeve are maza boeje oe none ijia finoeno ijiege nadua naka oe buone ijia finoega bu una agane besu redufuo. No ijiege besu rekuva e boeje ume igia oenojo bu guona vierafermo na ma are kiemo na ume igia ruaevapo bu ijiege vierafermo. Ro kuke bu vierafermo a na oetuamo ijiege aka bu oetuamoro bu ijiege vierafermo.

²⁴O Asoeno, na vierafermo e ije a kena vajiemba ije buka naena are na fivo ijia karidufuo. Ro kuke buka sanaema none a abena miema ije gake. Ijadufuo maeje ane iko zinume sakae ige a naebe amaerima ijia ane na oetuae ijadufuo a sanaema one ijene abe mie. ²⁵Asoeno aeje aka e maturaema ijene. Rove e ume igia karinojo ije a buka naebe mukoe

vierafei. Ro na aeje nane mukoe vierafe ro kuke e none vua fievo ije budua bune vieraferga are kiemo na ume igia ruae. ²⁶Na a e izeki ije nane bu kuariana nijasiae ro na vierafe naka uria kuke kuariadufuo. Na ijiege kuariakina bu izege a na oetuamo ijiege bu una e gue oetuakina na maza boeje oe buone ijia finoeno kuae.

Bu Jesu fare toeva ijene

(Matiu 26:47-56, Maki 14:43-50, Ruki 22:47-53)

18

¹Jesu fu ijiege baname isoema furi areme uri e vua fuone fievo ije kaenamiana fune are Kidironi amare ijia vae. Ro are ije bu vaeva ije bu inekina kusare ni binobino oeva bu ijia vae. ²Ro Judasi e ije Jesu abe e ani miadufuo ije fu are ije fune vierafei. Ijadufuo maeje Jesu fu maza boeje e vua fuone fievo ijena va are ijia kari vua kuaenoenaro una ruovo. ³Ijadufuo e mamekanu Godido zinone ifaejevo ijia kiro e Feresi ije bune e juo karioj ijia kiro e bijaevu ije bino kena Judasi uniaejavu fu kaenamiana ijia vae. E boeje bune juvuakina magu ro raete ije kena bune Jesu rerena are ijia vae. ⁴Ro Jesu fu vame boeje izege bu fuone rekuvejo ije fune giana vierafei. Ijadufuo e ije bune fu rerena vakoga fu biona ruakinu kiae, E gare juvuamagu abe ruovo garie ja era rerenoevono kiae?

⁵Fu ijiege kiamoga bu una kuae, No e Jesu are Nasaretiko ije rerena ruovono kuae. Ro Jesu fu una kiae, E ije ja rere ruovo ije na igifurekino kiae. Ro Judasi e ije Jesu abena e ani miadufuo ije fu e ijena ruaema ijia manine. ⁶Ijadufuo Jesu fu kia e ije na igifurekino kiamoga buka una gafaejia durinami. ⁷Areme Jesu fu kuke kiae, E garie ja era rerena ruovono kiae? Ro e ije bu una kuae, No Jesu e Nasaretiko ije rerenoejono kuae. ⁸Areme Jesu fu una kiae, Na uria iko ja rovoga na kia na e ije na igifurekino kiae rove jaka naebe fie. Ja vieraferga jane ma na rerienoejoga nine e none gure gue kiaga bu vano kiae. ⁹Fu ijiege kuariaema ijadufuo maeje fu vierafe vua gafe fu ude Asoefuo baname isoena kuae, Asoeno na e ije a kena na vajima ije nabe ijuoegafiakono kuaema ije fuka riarekiro fu ijiege kuariae.

¹⁰Ro Saemoni Fita fu sime be ka uiki jiagadogo ije fare manino. Ijadufuo fu uri ijare dabe e be e ireobo Godido zinone ifaejamo ijadufuo imeno ije adane maeneke fuone ije kana daturae. Ro e ijadufuo ive ije Makasi. ¹¹Rove Jesu fu una Fita kuae, Ire ije a remo ije fu naebe mare ijadufuo sime one ije abena una suave fuone ijia abiesene. Na vierafe naka vajae fiane ige Asoe none fu vierafe na abedufuo ije abekono kuae.

Jesu bu mesiri Anasido vaeva ijene

¹²Areme e bijaevu ijia kiro e ireobo buone bu samuagiamo ijia kina e Jiusi gue ije bune Jesu fare toma areme mesirina e Anasido are ijia vae.

¹³ Ro e Anasi fu e Kaefasido ajuame ro kuke Kaefasi fu juaevasia ije fu e Godido zinone ifaejamo e ireobo be. ¹⁴ Ro fure ude e Jiusi ije kiae, Fu e besu ijare e boeje nuvuefuo baronekuma fuka marekono kiae.

Fita bu Jesudo kuavo fuka fema ijene
(Matiu 26:69-70, Maki 14:66-68, Ruki 22:55-57)

¹⁵ Bune Jesu mesirina Anasi e ireobo Godido zinone ifaejamo ijadufuo are ijia aru vakoga Saemoni Fitakiro e Jesudo vua fiemo be ije bu nuvena ijia vae. Ro e Anasi fu e Jesudo vua fiemo be ije fune vierafei. Ijadufuo e ije fuka aruna game bu vua kuaevu ijia vae. ¹⁶ Ro Fita fu naebe guove ijia aru vae ro fume va viene ijia mani. Ijadufuo e Jesudo vua fiemo be ije fu aru vaema ijare una kekena ro bara viene samua manino ije kua areme Fita mesiri una guove ijia vae. ¹⁷ Bu aru vakoga bara ije fu uri Fita gana kuae, Eko na vieraafega adua a e gume bu tonu mesiri aru vaeva ijadufuo e vua fuone fiemo beno kuae. Rove Fita fuka jumei ijadufuo fu una kuae, Nana e fuone bakino kuae. ¹⁸ Ro e ije e Anasido imejo ijiakiro e juo kario ije buka iduadiaeva ijadufuo bu miane ifaejema ijia iruana irei. Ijadufuo Fita fune va e ijena miane iruana ijia manine.

E ireobo Godido zinone ifaejemo ijare Jesu duna kuaraema ijene
(Matiu 26:59-66, Maki 14:55-64, Ruki 22:66-71)

¹⁹ E ireobo Godido zinone ifaejemo ije fune urina Jesu vua ije fu e nijasianoeni ijiakiro e vua fuone fievo ije fu kaenamiana oenoeno ijadufuo duna binobino kuarae. ²⁰ Fu ijiege kuaramoga Jesu fu una kuae, Na maza boeje naka e boeje ijebuo nidua ijia vua none kuarianoe. Na are isesina jone ja afuina vua kuaevu ijia ro kuke Godido Are ije e Jiusi abero e Jiusi baki bu maza boeje baname isoevo ijia aruna vua nijasiakinu kuarianoe. Ro vua bino na naebe mauike nuriete kuariaenoe. ²¹ Ijadufuo a irerefuo na duna binobino kuarieme? A duna ijiege kuariekiro vieraafekuma ni e guraeje kiaga bure vua irere na kuaenoejo bu fieva ije kuarano kuae.

²² Jesu fu ijiege e ireobo ije kuaramoga e Godido Are ije juo kario be fu ivuake ijia manido fu uri nikubae ijia kanae, Fu kanakinu kuae, E ige a erare kuaga a vua ijiege una e ireobo gare kuaramono kuae. ²³ Ro Jesu fu una kuae, Ro a vieraafega na vua ise irere ije e ireobo gare kuaraejoga ni are e boeje kuariane. Ro a vieraafega vua irere nare kuaraeva ije na ma ijadufuo kuaejoga a irerefuo na kaniemano kuae? ²⁴ Areme Anasi fune kiamo bune Jesu mesirina una Kaefasido are ijia vae. Ro Jesu umui ije bu toeva ije bu naebe iraejae ro bume ijiakuma mesirina vae.

Fita bu Jesudo kuavo fuka una kuke feima ijene
(Matiu 26:71-75, Maki 14:69-72, Ruki 22:58-62)

²⁵ Ro Fita fuuria e guena miane iruana manine ijadufuo e ije fuina ireva ijiebe urina kuae, E gure no vieraafega adua a e gufafuo vua fiemo

beno kuae? Rove Fita fuka oe bijukurae ijadufuo fu migegire una kiae, Nanaka ma bakino kiae. ²⁶Ro e be e ireobo zinone ifaejemo ijadufuo imeno ije fu ijia manine. Ro e ije fu e game Fita fu muge sime dabe ada kana daturaema ijadufuo agane be. Ijadufuo e ijare uri Fita gana kuae, Na vierafe adua na Jesuki muge gamia gaevano kuae. ²⁷Fu ijiege kuaramoga Fita fu kuke una kuae, Na e ije ja kuaovo ije naka bigaevano kiakoga kukoruko fu saroruba ijia kumei.

Jesu bu mesiri Faereti fino ijia vaeva ijene
(Matiu 27:1-2,11-14, Maki 15:1-5, Ruki 23:1-5)

²⁸Areme bune suoke ve iko abaesako bune Kaefasido are ijia Jesu mesirina una usiaena Faereti e Romukobuo e ireobo ijadufuo are ijia vae. Ro e Jiusi gue bu Jesu mesiri vaeva ije bu naebe are guove game e boeje bu koto revo ijia aru vae. Ijadufuo maeje bu iro Fasova buone ije ikuae vierafe ijadufuo bu akae buone tuasekuae jumena bu naebe are guove ijia aru vae. ²⁹Ijadufuo Faereti fu kekena kiae, E gufe ja mesiri none ruaeva ije fu irere rema ijadufuo ja ije mesiri ruaevano kiae. ³⁰Ro bu una kumei, No fu nobe masoke ijiege mesiri ruake. Rove fune korufuo isema rema ijadufuo no ije mesiri one ruaevano kumei. ³¹Bu ijiege kumevoga Faereti fu kiae, E gufe ja mesiri ruaeva ije ise fuone bino na naebe fie. Ijadufuo ni kojo mesirina abe akae jone ijia vierafera reno kiae. Rove e Jiusi ije bu una kumei, No konovuo e kaniaga bu oekuva nok acae nuvuone tuasekono kumei. ³²E ije bu Jesu dabe ijiege reva ije fune uria ijia e bu izege fu dabe arafiriga fu isejavaena baronedufuo fu kuaema ijiakuma riarekiro bu ijiege rei.

³³Areme Faereti fune una aruna Jesu kuae, Aeje ane ma e Jiusibuo Kini ijeno kuae? ³⁴Fu ijiege kuaramoga Jesu fu una kuae, Duna ije a kuariemo ije ame are vierafera kuarieke bu ebe noefuo kuaravo a fiema ijadufuo a ijene kuariemono kuae? ³⁵Ro Faereti fu una kuae, Ro a vierafera nana e Jiusi? Bu e one ijiakiro e Jiusibuo e mamekanu ijiibe mesirana none ruae. Ijadufuo a irere ije remano kuae? ³⁶Faereti fu ijiege kuaramoga Jesu fu una kuae, Nana e kini jone ume igeko bu e boege samuagiavo ijieki baki. Ro na ume igadufuo kinibitie e none na nuvedievo ije buka na vafaena una jaena bijaedufuo. Rove na are none maeje na kini rena samuadufuo ije fu ume igia bakino kuae. ³⁷Jesu fu ijiege kuaramoga Faereti fu una kuae, Ijiekido na vierafera a e kini beno kuae? Ro Jesu fu una kuae, A kie aeje a e kini beno kie? Rove igia fie, ume igia bu bietanieva ije na vua maeje abe e ume igia oenoeko ije kuariake. Ijadufuo erare fu vame maeje oetuana kenoeno ije fu vierafera vua na kuariavo ije fuka maro fu ijiege vierafera. ³⁸Jesu fu ijiege kuaramoga Faereti fu una kuke kuae, Ro vua maeje fu irereno kuae? Areme Faereti fu una kekena e Jiusi makave ijia ireva ije kiae, Na e gufadufuo ise bino na naebe

giaedo nabe abena isekafake. ³⁹Ro vame jone ja kevo ije ja maza Fasova ruomone ja kiega na e dibure karivo ijia e be kenujaga fu vako. Ijadufuo ja vierafega fune maredo na e Jiusibuo Kini ije kenujaga fu vakono kiae. ⁴⁰Rove e boeje buka una gue vijekinu kumei, No Jesu no iseduo ro no vierafe a e Barabasi kenujaga fu vano kumei. (Ro e Barabasi fu e inieki be fu dibure ijia fino ijene).

E ije bu Jesu dabe kurosi kanakuae kumeva ijene

19

¹Ijadufuo Faereti fune e bijaevo ije kiamo bune Jesu mesiri makave ijia uslaena dabe ifi. ²Areme bune uri ukiese ufuna atevema dabe Jesudo nigofo ijia abiesae. Bu ijiege rena uri kuke ugone kavuane ka mukore ije dabe uruaejae. ³Areme bune dabe varaemekinu biesirina kuae, No vierafe e ige fu e Jiusibuo kinino kuaena uri uikubae ijia kanae.

⁴Bu dabe ijiege rekoga Faereti fune una kuke kekena e Jusi ije kiae, Na e gufadufuo ise be na naebe gae ijadufuo na mesirina roga ja gano kiae. ⁵Areme Jesu fune ukiese ije bu ateve abiesaeva ijiakiro ugone kavuane bu uruaejaeva ijiakuma keke ruae. Fu keke romoga Faereti fu urina kiae, E ije igifurekino ni gano kiae. ⁶Ijiege rena Jesu fune keke romoga e mamekanu Godido zinone ifaejevo ijiakina e Godido Are juo kario ije bu Jesu gae. Bu gana uri vijena kumei, Abe kurosi kana abe kurosi kanano kumei. Bu ijiege kumevoga Faereti fu una kiae, Na e igadufuo ise bino na naebe giaedo nabe abena isekafake. Ijadufuo ni kojo abena kurosi kanano kiae. ⁷Faereti fu ijiege kuariamoga e Jusi boeje buka urina kumei, E ije fu korufuo kuae, Nana Godido Farino kuae. Rove akae nuvuone ije no e ijieki ije noka kaniaga bu oevo ijadufuo no vierafe fuka baronekono kumei.

⁸Bu ijiege kumevoga Faereti fu vua ije fiena fuka ireobo jumei. ⁹Ijadufuo fu una aruna Jesu kuae, Aeje a e izekono kuamoga Jesu fu naebe una gue kuarae. ¹⁰Ijadufuo Faereti fu una kuae, A vua bino naebe kuarienkuma ni vierafe na daro nado na kia bu dabe kurosi kanake. Ro kuke na manido na kenujaga a vakono kuae. ¹¹Faereti fu ijiege kuaramoga Jesu fu una kuae, A kie na daro abevano kie. Rove igia fie, a osukua daro ijieki ije a izege abekuma baki ro fune Asoe none gufare abe mae. Ijadufuo e ije erare na abena una a maema ije fuka ise ma ireobo remano kuae. ¹²Jesu fu ijiege kuaramoga Faereti fu vua ije fiena una vame be fu izege rena Jesu kenujaga fu vadufuo ije rerei. Rove e Jusi ije buka una uri kuriae kuriaekigia kumei, A e ije kenujaga fu vakuma aeje a gamani Sisado kai baki. E be erare fu kuae nana e Kini beno kuaekuma e ije fuka Sisado e anino kumei.

¹³Areme Faereti fu vua ije bu kuaravo ije fiena uri Jesu mesiri kekena makave are ije e bu koto fievo ijia ruae. Faereti fune kekena fata ije e

mamekanu bu karina koto fievo ijia ari fi. (Ro fata ije e Iburukobuo isama ijia bu kua Gabatano kuavo). ¹⁴ Ro mazani ije fu iro Fasova bu idufuo ije kanafuidufuo. Ro mazani ije fune uvuoka abema ijia Faereti fu urina e Jiusi ije kiae, E ige manino ije Kini jone ijeno kiae. ¹⁵ Fu ijiege kuariamoga e boeje buka urukeigia una kukuma kumei, E ije ka dabe kurosi kanaga fuka baroneno kumei. Ijadufuo Faereti fu una kiae, Ja vierafe fube maredo na e Kini jone ije dabe kurosi kanakono kiae? Rove e mamekanu Godido zinone ifaejeko ije buka una kumei, No Kini ije fu no samuaguomo ije fune e Sisa fuosukuano kumei. ¹⁶ Bu ijiege kumevoga Faereti fune kiamoga e azo kenoejo ije bune Jesu mesirina dabe kurosi kanakuae vae.

Jesu bune dabe kurosi kanaeva ijene
(Matiu 27:32-44, Maki 15:21-32, Ruki 23:26-43)

¹⁷ Areme Jesu fune uri kurosi fuone dabena uruo ije bu kua E Nigofo Ane Igokino kuavo ijia vae. (Ro uruo ije e Iburukobuo isama ije bu Gorogotano kuavo). ¹⁸ Ijiege rena bune Jesu mesirina vakuma uruo ijia usiaena dabe kurosi ijia kanae. Areme bune kuke e inokiro kame Jesu bu kanaeva irifo ijia guegue kanae. ¹⁹ Bu ijiege kaniakoga Faereti fu vua be ijiege isoena dabe Jesudo kurosi ubine ijia kanae, E Jesu fu are Nasaretiko fu e Jiusibuo Kini ijeno kuae. ²⁰ Ro vua ije fu isoema ije fu e Iburukiro Reteni ro Guriki ijiebuo isama ijia isoe. Ro are ije bu Jesu abe korosi kanaeva ije fu sidove Jerusareme ivuake ijia. Ijadufuo e Jiusi uruvana bu ijia oenoeko ije vua ije bu davo. ²¹ Faereti fu vua ijiege isoemogaro e Jiusi ijiebuo e ireobo Godido zinone ifaejemo ije fuka naebe oe marei. Ijadufuo fu una Faereti kuae, Vua gare a isoena kuae e ije fu e Jiusi ijiebuo Kinino kuaema ije arene. Ro nime kua, E ije fu kuae nana e Jiusi ijiebuo Kinino kuaema ijadufuo ijiege isoeno kuae. ²² Fu ijiege kuaramoga Faereti fu una kuae, Na vierafe irere na kiavo bu isoева ije fune mare ijadufuo fu uria ijiege navakono kuae.

²³ Areme e azo kevo ije bune Jesu dabe kurosi kana areme uri ugone fuone boeje bu azoeva ijene ke atana inokiro kiro inokiro nama areme karina buone ivajuonami. Bu ijiege re areme bune kuke uri ugone fuone be ni besu saguiva fu ado abiemo ijene abei. ²⁴ Areme bune uri bue kuae, No vierafe ugone ige nobe abe faraekiro no kasi abe akoega erare abega no gakono kuae. Ro ijiege bu reva ije bu Godido vua bu isuibe buki akiae ijia isoena kuaeva ijiakuma riarekira bu ijiege rei. Ro vua ije bu ijiege isoe,

Bu ugone none ije kame bukiki ivajuonami areme uri ugone none mukore ije abekuae kasi dabe akoevano kuae.

²⁵ Ro Jesu asie fuone bara Merikiro uviafuo bara Meri e Kirofasido bara ro Meri Magadara bu kurosi ije bu Jesu kanaeva ivuake ijia irei.

²⁶Ijadufuo Jesu fu una nese giake asie fuone ijiakiro e vua fuone fiemo be fu mukoe oetuamo ije bu ijia irei. Ijadufuo fu asie fuone ije kuae, Bara gume e guraeje fu fari oneno ni mukoe samuane. ²⁷Areme fu una dakude e vua fuone fiemo ije kuae, Bara guraeje fu asie oneno ni mukoe samuano kuae. Ijadufuo e Jesudo vua fiemo ije fu ve ijia bara ije mesirina are fuone ijia fikiro vae.

Jesu fu baronema ijene

(Matiu 27:45-56, Maki 15:33-41, Ruki 23:44-49)

²⁸Areme Jesu fune viera fega ire boeje fu ume igia rekiro ruaema ije fune rema furi. Ro kuke vua ije bu buki akae ijia isoena kuaeva ije fuka riarekiro fu kume, Naka do duadiemano kumei. ²⁹Ro kurosi zinume ijia bu do vuaeni be jiana ijia nijae. Ijadufuo Jesu fu ijiege kumenoga bu uri atebae abena do vuaeni ijia abiesena abe ine ijia bijana abe Jesudo itire ijia azirae. ³⁰Areme Jesu fu vuaeni ije sia ina areme kumei, Fune furimano kumena ijia kuri ajuarena baronei.

Juvuave bu dabe Jesu ikene ijia bijaeva ijene

³¹Areme e Jiusi ije bu viera fe bu Faereti kuaga fu kiaga bu va e ije kurosi kaniaeva ijie bu masiane ije kaniatuate bu migegire oega bu nafena arikuae bu ije viera fe. Ijadufuo maeje mazani ije fu Faraede bu iro fasova ijadufuo kanafuidufuo. Ro kuke isuome ije fuka maza ireobo bu mauike karina Godi baname isoево. Ijadufuo e ije bu kaniaeva ije bu uria kurosi ijia kiriakuva fu naebe mareke. ³²Ijadufuo e azo kevo ije bune va gafia usiaena e inokiro ije bu kena Jesuna kurosi kaniaeva ijie bu masiane ije kania tuase. ³³Areme bu una usiae Jesu gake fune baronemaga bu naebe masiane fuone ije kania tuae. ³⁴Ro bu arekoga e bijaevu be fu uri juvuave ijare dabe Jesudo ikene ijia bijamoga kavuane ijiakiro do ijiebe saroruba ijia usiae. ³⁵Ro ire boeje bu revoga e ije fu ni fuone ijia manina glaema ijare vua igene dabe isoe. Fu ijiege isoekina jadua ja ijia dana ma viera fe kuaeva fu ije isoe. Ro vua irere fu isoena kuaeva ije fudua fu viera fega vua ije fuka ma. ³⁶Ro ire boeje bu ijiege reva ije fune izege bu buki akae ijia isoena kuaevae,

Ane fuone be bube kana tuasekono kuaeva ijiakuma riarekiro bu ijiege rei.

³⁷Ro kuke buki kafare be ijia bu isoeva fu kuae,

E ije bu ikene ijia bijaeva ije e uruvana bu gakono kuaeva ijiakuma riarei.

Jesu bu abe mako ruiva ijene

(Matiu 27:51-61, Maki 15:42-47, Ruki 23:50-56)

³⁸Areme rade Josofu e are Arimatiako ije fu Jesudo surive nafena arikiro viera fei. Ijadufuo fune va Faereti kuamo fu keno kuamoga fune

va Jesudo surive nafena ari. Ro e Josofu fu e be Jesu ma vierafemo. Rove fu korofuo fu naebe abe samadire ijadufuo maeje fu Jiusi e mamekanu ije jumei. ³⁹Ijadufuo Josofu fu vakoga Nikodimasi e ije fu ude mugē be Jesu gake vaema ije fu fuosiki vae. Fu ire udi mukore urivo inokiro ire arokiro me bu e oeva aziriaga suri buone bu naebe buraevo ije kena vae. Ro ire ijiebuo irufui buone ije buka teti kiroguremi ijiege.

⁴⁰Areme e Josofukiro Nikodimase bune izege e Jiusi bu buenina e oega bu ke utina amaeriavo ijiege uri ire udiki ije kena Jesudo surive azirana amaerima areme ugone ijia dabe uti. ⁴¹Ro are ije bu Jesu abena kurosi kanaeva ije fu juare be ivuake ijia. Ro kuke munuage be bu e uniaeava baki ije fu juare ijia. ⁴²Ro maza ije e Jiusi bu mauike karina Godi baname isoevo ije fune ivuareme ro kuke munuage tire ije fu ivuake ijia. Ijadufuo bu Jesudo surive ije abena ijia nujae.

Jesu fu una urima ijene

(Matiu 28:1-8, Maki 16:1-8, Ruki 24:1-12)

20 ¹Areme nituame Sanide suoke ve iko abaesako ijia bara Meri Magadara fune vakuma mako gafe bu Jesu nujana mune abe bijukuraeva ijia kekei. Fu kekena gake mune ije bu abe viene bijuiva ije bune dabe bio ikene ijia nijaeva fu gae. ²Ijadufuo fune una difurina vakuma Saemoni Fitakiro e Jesudo vua fiemo be fu oetuamo bu kariva ijia kekei. Areme fu kiae, E Ireobo nuvuone ijadufuo suri gafe bu nujaeva ije no vaga fu baki. Ijadufuo bute dabe izege nijaeva noka naebe vierafevano kiae.

³Bara ije fu ijiege kuariamoga Saemoni Fitakiro e Jesudo vua fiemo be bune usiae difurina mako gafe mukoreigia gakuae vae. ⁴Bu difurisae vae rove Fita fu saroekoga e be ijare ude asina vakuma mako gafia kekei. ⁵Rove fu naebe mako guove ijia aru vae ro fume makave ijia mani amaenena ugone ije bu Jesu utijaeva ije giae. ⁶⁻⁷Fu ijiege manina gamo ijia Saemoni Fita fu rade nuvena vakuma ijia kekena asina mako guove ijia arui. Fu aruna ugone ije bu abe Jesu utijaeva fu namo ijene gae. Ugone ije fu fuebe nakoro be ije bu abe nigofu utijaeva ije fu naebe irase ro fume uria izege bu ude utijaeva fu uria ijiege naovo fu giae. ⁸Areme e be ije fu ude difuri vaema ije budua fune rade nuvena aru ugone ije bu naovo ije giae. Areme fu ijia vierafero Jesu fune una urimaro fu ijiege ma vierafei. ⁹Rove e inokiro ije bu Godido vua ije bu isuibe isoeva fu kuae fu baronenaro una urikono kuaema ije buka uria naebe ma vierafei. ¹⁰Areme bune una usiaeena are buone ijia vae.

Jesu fu Meri Magadara ije biema ijene

(Matiu 28:9-10, Maki 16:9-11)

¹¹⁻¹²Ro bara Meri fu uria mako viene ijia manina nimeba una amaenena gake anera inokiro ugone abaeki saeva ije bu mako guove gafe

Jesudo surive fu ude naema ijia kari. Anera be fu Jesudo diaero ijia fikoro be fu nilegedo ijia fine. ¹³Meri fu amaene giamoga bu uri kuae, Bara gafe a irerefuo manina nimeno kuae. Ro fu una kiae, Na E Ireobo none ijadufuo suri ige bune dabe iziebureki nijaeva naka naebe vierafevano kiae.

¹⁴Meri fu ijiege kuarianaro una dakude gake Jesu fu ijia manino fu gae rove fu naebe mukoreigia gana vierafei. ¹⁵Areme Jesu fu uri kuae, Bara gure a e ije era rerena nimeno kuae? Fu ijiege kuaramoga Meri fu vierafero fu e juare ije samuamo ijare ro fu ijiege vierafei. Ijadufuo fu una kuae, E gare a isekie a vieraferga e surive ige are abe iziebure nijaejoga ni nijasiega na va abeno kuae. ¹⁶Rove Jesu fu una kuae, Merino kuamoga fu fiena una dakude e Iburukobuo isama ijia kua, Rabonino kuae. (Ro vua Raboni ijadufuo maeje E Nijasiamo.) ¹⁷Meri fu ijiege kuamoga Jesu fu una kuae, Na naebe una Asoe none fino ijia vae ijadufuo ade na niriakiemo. Ro ni una va e vua none fievo gafe kia, Naeje nane una Asoe none ro Asoe jone ro kuke Godi none ro Godi jone ije fuone vakono kiano kuae. ¹⁸Areme bara Meri Magadara fune una e Jesudo vua fievo ije kariva ijia vae. Fune va kekena kiae, Na E Ireobo fu na biediemo na gaevano kiae. Fu ijiege kuaria areme uri kuke vua irere Jesu fu kuaraema ijene kuariae.

Jesu fu una urina e vua fuone fievo ije bediaema ijene

(Matiu 28:16-20, Maki 16:14-18, Ruki 24:36-49)

¹⁹Areme Sanide maza besu ijadufuo mufuo ijia e Jesudo vua fievo boeje bune are buone viene boeje bijuma areme bune mauikeigia guove ijia kari. Ijadufuo maeje bu e Jiusi ijiebuo e mamekanu ije jumeva ijadufuo bu ijiege rei. Areme Jesu fume saroruba ije bu kariva ukua ijia manina kiae, Kafaevo ije fu jaenano kiae. ²⁰Fu ijiege kuaria areme uri umui tare fuone ije bu kaniaeva matane ijiakiro ikene bu bijaeva ijene nijasiae. Fu ijiege nijasiamoga bu ijia gana vierafero fu ma Jesuro buka oemarei. ²¹Areme Jesu fune una kuke kiae, Kafaevo ije fu jaena. Na Asoeno fu kiemo na ari ruaeva ijadufuo na ja kiavo ni usiaena vua none abena are irore igia kuariana vano kiae. ²²Areme fune uri ivua fuone vajiakinu kiae, Kavene Akae ige na miavo ijene abefo. ²³Ro igia fie, ja e guebuo ise ije giana arekuva Godi fudua ise buone ije fu giana areke. Ro ja ise buone ije ja naebe giana arekuva Godi fudua ise buone ije fube giana arekono kiae.

Jesu fu una Tomasi biema ijene

²⁴Ro maza ije Jesu fu una e vua fuone fievo ije bediaema ijia e Tomasi Didimasino kuavo ije fu naebe buina ijia fino ijia fu bediae. (Ro ive Didimasini ijadufuo maeje ufake nafei). ²⁵Ijadufuo e Tomasi fu maza be una romoga e Jesudo vua fievo bu uri kuae, Tomasi no Jesu fu igia ajia romo no gaevano kuae. Rove Tomasi fu una kiae, Na vua jone ma vieraferkuva baki. Ro na kono umui none gome igia umui tare fuone nero bu kaniaeva ijiakiro ikene bu bijaeva matane ijia uniakuva na sone ma vieraferkuva kiae.

²⁶ Areme fura besu furikoga e Jesudo vua fievo boeje bune una kuke gire ijia besu afui kari. Ro ve ijia Tomasi fune buina besu ijia fine. Bu viene boeje bune bijuma kariva ijia Jesu fume saroruba una ije bu kariva ukua ijia ruae. Fu ijia keke manime uri kiae, Kafaena ije fu jaenano kiae. ²⁷Fu ijiege kia areme una dakude Tomasi kuae, Naeje nane ma una uri ijadufuo uri umui gome one ije kena umui tare matane none ijia uniana giane. Ro kuke umui one ije akoena ikene none ige bu bijieva matane ije farena gane. Ni matane ijia giana una na ma vierafekiro a nuanamimo ije arenou kuae. ²⁸Fu ijiege kuaramoga Tomasi fu una kuae, E Ireobo na vieraferga aeje aka ma E Ireobo none ro kuke a ma Godi noneno kuae. ²⁹Ro Jesu fu una kuae, A vierafer ane ni one ijia giema ijadufuo a na ma vierafer? Rove igia fie, eranebe bu naebe ni buone ijia giero bume na ma vierafero ije buka oemareno kuae. ³⁰Jesu fu oenoekinu e vua fuone fievo ijiebuo nidua ijia ire sumiki ka mamekanu uruvana binodua renoe rove ire ije gue bu naebe buki igia isoe. ³¹Ro vame sumiki gue fu kenoema ije na buki igia isoева ije na e ige joefuo isoe. Na ijiege isoekina ja ijia dana ma vierafero Jesu fu ma Godido Fari ro fure kuamo fu ume igia ari ruaemaro ja ijiege vierafero. Ja ijiege fu ma vieraferkuva ja vame ma karivako ije abeke.

Jesu fu una e vua fuone fievo gue Do Gareri irifo ijia biediaema ijene

21 ¹Areme maza sibaneke furikoga Jesu fu una kuke e vua fuone fievo gue ije do Taebiriasi irifo ijia biediae. Ro vame izege Jesu fu biediaema ije fu ijiege. ²E Saemoni Fitakiro Tomasi Didimasi ijiakina e Natanero are Keina Gareri guove ijeko ijiakina e Zebedido anafa inokiro ijiakiro e vua fuone fievo inokiro ije bu besu kari. ³Areme e Saemoni Fita fu uri kairafa gue kiae, Nane do gamia ugic abena kijume arafiriakе vakono kiae. Ro kairafa bu uri kuae, No vierafer nodua no aena vakono kuae. Ijadufuo bune uri vanage abena kijume arafiriana vae. E ije bu muge boeje kijume arafirianoeko fune vakuma ve irasekuvene rove kijume besukua be buka naebe kei.

⁴Areme ve iko gamia abaesamo ijia bu gake Jesu fu do irifo gura manino bu gae. Rove bu naebe vierafero fu Jesuro bu ijiege vierafer. ⁵Areme Jesu urina kiae, E nikaki garie ugic ije ja sanoejo ije jabe kijume bino karaevano kiae? Fu ijiege kiamoga bu una kuae, No kijume besukua be noka naebe kevano kuae. ⁶Areme fu una kiae, Ke nine ugic jone meruna una vanage gufa umui maeneke ijia okurana kijume bino karano kiae. Fu ijiege kiamoga bune uri ugic ije meruna dabe una vanage aene gufa ijia okurae. Areme bune una mediru gake buka izege merukuva baki. Ijadufuo maeje fune kijume ijiebe ugic ije funeka iritoje.

⁷Ro e vua fuone fiemo be fu oetuamo fu vame sumiki ije rema ije gae. Ijadufuo fu una Saemoni Fita kuae, Na vierafer e gare mani vua kuaruomo ije fu E Ireobo ijarenou kuae. Ro Fita ugone fuone fu azo nana oenoedo

fu ijiege kuamo fiena fu uri ugone fuone abe abiesena uma do ijia akoe. ⁸ Areme fune jaraekanana vakoga e Jesudo vua fievo gue bune vanagedo ugie ije kijume ivaeva ijiakuma meruna irifo garia vae. Ijadufuo maeje bu ivuake do irifo ijia oenoeko ijadufuo bu ijiege rei. ⁹ Arene bune do irifo ijia arina vakinu gake ire kijume ijare miane metirema ijia naekoro burete ije fu irifo ijia namo bu giae. ¹⁰ Areme Jesu uri kiae, Kijume ja karaeva ije bino kari roga no ifaejeno kiae.

¹¹ Fu ijiege kiamoga Fita fune una vanage ijia ajiana e Jesudo vua fievo ije ifejiana ugie ije kijume ivaeva ijene meruna dabe irifo ijia nijae. Kijume ugie ijia ivaeva ije buka ma uruvana (153) rove ugie ije fuka naebe farae. ¹² Areme Jesu uri kiae, Igia roga no ire ige ino kiae. Fu ijiege kiamoga e vua fuone fievo ije bu naebe una fuje era ije kuagae. Rove bu ma vierafega fune E Ireobo ijare ijadufuo bu ijia arei. ¹³ Areme Jesu fune uri burete ije abe tuasema areme kijume ije dabe buvuana ijiakuma ivajiae. ¹⁴ Ro Jesu fu baronena una urima ije fu ude maza inokiro e vua fuone fievo ije biediae. Ro fu una kuke ige biediamo bu gae.

Jesu fu Fita vua kuaraema ijene

¹⁵ Ijiege rena bune kari ire inama furinoga Jesu fu uri Saemoni Fita kuae, Saemoni e Jonido fari gure, a vierafe one a na oetuamo ije fube e gure gue bu na oetuavo ije asidiaemano kuae? Ro Saemoni Fita fu una kuae, E Ireobo izege na a oetuavo ije ane gienan vierafemano kuae. Fu ijiege kuamoga Jesu una kuae, Ni mave-sifi none ije mukoreigia samuagiaejiene kuae. ¹⁶ Areme Jesu una kuke kuae, Saemoni Fita e Jonido fari gure abe na mukoe oetuamo ke a bakino kuae? Ro Saemoni Fita fu una kuae, E Ireobo none na a oetuavo ije ane gienan vierafemano kuae. Rove Jesu una kuae, Mave-sifi none ije mukoreigia samuagiaejiene kuae.

¹⁷ Areme Jesu fu una maza radekuma ije kuae, Saemoni Fita e Jonido fari gure abe na mukoe oetuamo ke a bakino kuae? Jesu fu ijiege kuaramoga Fita fu vua ije fiemo fuka oefiae. Ijadufuo maeje Jesu fu maza inokubeke kuae, Abe na oetuaemano kuaema ijadufuo fu oefiae. Ijadufuo Fita fu una kuae, E Ireobo none a ire boeje ane giana vierafemano kuae. Saemoni Fita fu ijiege kuamoga Jesu fu una kuae, Mave-sifi none ije mukore igia samuagiaejiene. ¹⁸ Ro igia fie, auria e nikaki ije aka kekena are iziebure a oenoekiro vierafemano a ijia oenoene. Rove a vakuma eoradamo ije buka e be umui one kame kiriaejanan mesira are ije a naebe ijia oenoekiro vierafemano ijia vakono kuae. ¹⁹ Jesu vua ije fu ijiege kuaraema ije fu Saemoni Fita fu rade izege isejavaena baronega e bu ijia Godido ive dabe aroena nidoedufuo fu ijadufuo kuaae. Areme fu una Saemoni Fita kuae, Ni urina makae none ijia nuvedienan na kenoeva ijiege kenoeno kuae.

Jesukiro e vua fuone fiemo be fu oetuamo ijene

²⁰ Areme Saemoni Fita fu dakude gake e Jesudo vua fiemo be fu oetuamo ije fu rade nuve romoga fu gae. (Ro e ije fu ude bu Jesuna muge radekuma ijia ire ivo fu tuana Jesudo bijuakinu kuae, E Ireobo e ije erare a abena una e ani ije miakuveno kuaema ijare?) ²¹ Ijadufuo fu una Jesu kuae, E Ireobo ro e game ruomo ije fuje fu izege rekono kuae? ²² Ro Jesu fu una kuae, Fuje na ivia kuako a ni uria igia oenoeka na una rono kuaebitie na ijiege reke. Ro a irerefuo ije dabe ireobo vierafeme? Ijiege a vierafemo ije arekiro uri makae none ijia novediena ige na kenoejo ijiege kenoeno kuae. ²³ Fu ijiege kuaramoga e Jesu ma vierafevo bu vua ije e Jesudo vua fiemo be fube baronedufuo fu kuaema ije fie. Rove Jesu fu naebe kuae e ije fube baronekiro fu ijia fivakono kuae. Ro fume kuae, Na vierafe fu ijia ni uria fike na una ruakuvabitie na ijiege reke ro a irerefuo ije abe ireobo vieraferemono kuae? ²⁴ E Jesudo vua fiemo be ije fu kuaema ije fu noesina kuae. Nare ire boeje Jesu fu remo na giakinu fieva ijene buki igia isoe ijadufuo vua boeje buka ma.

Vua radekuma ijene

²⁵ Ro Jesu fu kuke ire ka ma uruvana binodua rei. Rove na ire boeje fu renoema ije buki igia isoabitie na izege isoe furikuva baki. Ro kuke e ume igia oenoeva bu izege vua boeje mukoreigia dana vieraferkuva baki.